

**Yesu Kristo Kiano Ioluano Vou  
Napano  
LUKA  
Bivitauiaio  
Verialiano Moti**

*Tukunu bulati na niosi nei*

Niosi nei, Yesu Kristo Kiano Ioluano Vou napano Luka Jirio, naio berii Yesu ber naio be toro napano Atua berkar rui ban taara nalo na Israel nua, ka mia rime i rilarurlo, a ka rilarur tomu nalo na yetemerba. Luka jiri ea kiano niosi nei ber Yesu nei, Atua soʻpi kiano niununo naruei bio naio ka riverial ioluano vou van taliñasa nalo. Naruei bior vite nei, ioluano vou nei napano jirio, bujo ka tukunuano nalo napano aberial ka Atua tinien miia tomu nalo napano ajua jaleleano.

Vite dolu telabo napano romialio ea niosi nei, nina tukunuano nalo na tomu nalo napano amijog bo ajaaro. Tukunuano nalo telabo jibe na ajua mirano takurano [1] napano berial ka mia Yesu rime i, a ea mirano juo [2] napano berial ka Yesu moluo. Mia bereio ea mirano maariano, tomu nalo ajaaro napano Yesu meul bereio, a bavin ea Tiniabene. Toro napano jiri niosi nei, naio jiri niosi dolu tai bereio napano siano Atevi Nalo Kialo Inñauano Nalo.

Ea niosi juo nene nei, naio berial tukunuano nalo napano amiyotuba iorou ka bogo nei napano Yesu bavin ea Tiniabene.

Tukunuano nalo nei aberial ka tomu nalo napano amonea Kristo abinimei mirouano, a aba aberial kialo moneano nei ea vio dolu nalo. Niosi nei Yesu Kristo Kiano Ioluano Vou napano Luka Jirio abe torogio arolu [8]. Ea torogio juo nene, bija torogio ari nene be tukunuano nalo napano ajua niosi nei ga, nalo maka atua niosi tolu nalo na Yesu Kristo kanano Ioluano Vou napano Mataiu, Mak bija Jone nalo tolu ajiriio. Nene tukunuano napano berii agelo nalo napano amiou, a tukunuano napano berii tomu nalo ka avitkar nunu napano abinimei ka aial Yesu ea bogo nei napano naio moluo, a tukunu napano berii Yesu ea bogo na napano naio ban ea Atua kunuano ea bogo na naio be tete m̄eaku kiaga, a jamerijiano na toro novo na Samaria, a jamerijiano na kirtete napano ba kovio. Vite burtumoruo tealu nalo napano Luka berii van telabo ea niosi nei jibena. Naio berii bolkouano, a Niununo Lu, a tire nalo kialo vio ka aim̄au Yesu kanano, a berii napano Atua mijikia viekoko a toro, mijikia ridular kiano kariano.

*Torogio nalo na niosi nei*

Ilano moti 1:1-4

Jone Baruei, bija Yesu naljuo amoluo, a naljuo amiluo bavini 1:5—2:52

Jone Baruei kiano im̄auano 3:1-20

Jone Baruei baruei ea Yesu, a Sim̄aro milavono naio 3:21—4:13

Yesu mila kiano im̄auano ea tanobuku na Kalele 4:14—9:50

Yesu jaluvo den Kalele ba Yerusalemo 9:51—19:27

Yesu kanano sude maariano napano mila  
kanano iñauano yako Yerusalemo bija nalo  
na vaataro kean Yerusalemo 19:28—23:56  
Yesu meul bereio bija kiano tomu nalo amial  
naio 24:1-53

### *Iliano na be moti*

<sup>1</sup> Kiniou Luka nebivitauia tukunuano nei banso, toro na toru Tiovilas. Jibe ka napano jau komijikia ruei, tomu telabo abivitauia ruei tukunuano na vite nalo nei nanua amalmaluvo ka kito yuka tealó bar laka ruei.

<sup>2</sup> Vite nene nalo, kito maka reialio rimemedu ka mirado, mia tomu nalo napano jikar ea burupati nene, nalo aju amialio, a ka napano nalo ajibe ka tomu na be moti na Lilianiano Vou nabo, nalo naruei aberial sosolio batitig binimeí ban kito.

<sup>3</sup> Naruei jikar nanua ruei, kiniou nojoñña nebitii batitig ñesi dolu nalo nañña abivitauiáio, a nojoñña nabar iliano na vite nene nalo, naruei namial jibe bo ka ver nalavon ka navar torogio dolu nalo na tukunuano nei, novivitauia sosolio amei tibe ka niosi novo tai napano jakii memedu kiri ñarabo sesa nalo na tukunuano novo nei.

<sup>4</sup> Naio naruei nobivitauiáio ruei jo, mia kiniou najaaro ka notuvan riviedu ve kiamo, ka mia jau komijikia kovulukúio, komijikia kovitilubar ka vite nalo nañña kojoñña komijogio ruei amemedu ga a abe riano, ajavukia nañña kanaku niosi nei berialio.

*Nailiano mijuelar ban Sakaraia ka mia naio  
rivar Jone Baruei*

<sup>5</sup> Tukunuano nene naio jikar jibe nei: Ea bogo namã Parinio Tubo Erot naio jo mije tuboiano ea tanobuku na vio Yutea, toro lu tai, naio be m̃aratavo na Abija, a naio buru tira tai napano naio bunu miyotuba ea yati na kulo lu nalo, nina ea m̃aratavo na tormoruo Erono, Mosis kuruano re nua laka. Toro nene siano Sakaraia, a koano, siano Lesveti.

<sup>6</sup> Mia naljuo nei, kialo meuliano kiri memedu laka ea Atua kiano vitiano, ka namã amonmonea kiano tuboiano, a nalo ajumã amila bajago nalo na memedu kamã amila bogo nonovio ga, maka atumã ala belea tai.

<sup>7</sup> Mia vite takurano ga, naljuo maka ve kenerilo tai, bior tira nei Lesveti naio jumolumu ga, mia vonganei naljuo abinimei abe kulo moruo nalo laka ruei.

<sup>8</sup> Mia ka bogo tai, naio be bogo na Sakaraia kiano taara nalo monoka ava ala sida ea Atua Kunuano Lu, tavukia namã taara nalo amila terakurano ea sude nalo.

<sup>9</sup> Mia dam̃ariga, bogo namã amilala jibe na, nalo monoka ala tibe ka namã amiere m̃abujo, ka mia aleal nalo na vabe kalo naruei napano mia naio mijikia rila burum̃ara im̃auano nei ka mia m̃a riva joomo ea Vio Lu na Yimo Lu nei, ka risebi sida ea boda na jo. Mia ka bogo na amilaiio jibe na, mia Sakaraia siano mijoru loglogio, ka mia naio naruei riva rilaii burum̃ara im̃auano nene.

<sup>10</sup> Naruei monloglog bogo namã amisebi sida nene, ana naio ba joomo ka rilaiio, a burutiniobi toru na tomu nalo aju tavio ajumã abolkouo.

<sup>11</sup> Ana bogo na Sakaraia naio ba joomo, mia

miilobin naio ka mial Atua kiano nailiano tai napano naio miyotuba kanio, jikili ju tivelinio vameruo na boda nene.

<sup>12</sup> Mia bogo na Sakaraia mial nailiano nei, naio maka bunu rijikia ka mia tumãabe naruei, a merou toru bunu.

<sup>13</sup> Mia nailiano nei naio mil banio, berinavo “Sakaraia, jau komerou m̃ele re. Kiniou nebinimei ka neverial ga vanso ka Atua mijog kenemiu volkouano kube juo ruei, a mia koamo tira na Lesveti, mia naio rivar kenerimo solbouo suñano tai, mia bogo na naio riyotuba, mia jau monoka kesisia naio ka Jone.

<sup>14</sup> Mia bogo na naio riyotuba dovorovo, mia kuve juo tiniemiu saaro ve toru laka, tiniemiu sese, mia kamiu ve juo re ga, mia kulo dolu nalo bunu mia asaaro ve toru laka.

<sup>15</sup> Kiritete nene, mia naio rimei rive Atua kanano toro na toru tai, a mia naio tibe ka toro lu tai, mia naio rivel ka m̃arjuñelm̃elu vija uei na bitunu. Tikario ea bogo napano joa kia ga kenieno mabono, mia Niununo Lu to rivujolou ea naio ruei.

<sup>16</sup> Mia naio rive toro tai napano mia naio rivilig kulo Israel nalo ve telabo amei bereio ea Atua Soñi, kialo Tubo.

<sup>17</sup> Mia aial ka napano niununo a moroano nanua joa Naverialiano Elaija mia to rivare ka ga naio bereio, bior mia naio tukamu rimei, ka riverial ka mia Naverikariano naio rimei iorou ka naio vesiou re. Mia naio rivilig teta nalo kialo iviso nalo ka mia asidomial vatitig bereio kenerilo nalo, a mia rivilig tomu nalo namã amila kokorov tuboiano ka mia atakii bereio

bajago napano be masou a memedu. Ea m̃arabo nalo na naruei, mia naio rila vatitig rivu taara na tomu nalo tai ka mia ave Atua kiano, ka atu rorea naio ka mia riyotuba kalo.”

<sup>18</sup> Mia Sakaraia naio mijog iliano nei, ana naio berkanio nailiano nei, berinavo “Ai, abe kover re tibe na. Maka rijikia tibe na, bior kumemi juo nei m̃erenio batove ruei nei.”

<sup>19</sup> Ana na nailiano nei mil ban bereio, berinavo “Makanio, mia tibe ga na. Kiniou nebe nailiano Kapriel nei, nañã bogo nonovio najikili nojua Atua mirano ka m̃ã nabar kanano iliano, naruei naio miila kiniou nebinimeĩ easo ka neverial lilianiano novo nei vanso.

<sup>20</sup> Mo bogo na kiniou neberialio kaso, mia jau maka komoneaio, naruei kiniou never kaso ka mia kove buru, a mia jau koto tibe na rivano-o rivokar bogo na keial vite nalo nene ayotuba kaso, nina ea bogo nene rimemedu.”

<sup>21</sup> Mia bogo na nailiano jom̃ã mil kia ga jibe na ban Sakaraia, mia tomu nalo ajikili aju tavio kia ga vo, aju rorea bano deio, ana nalo aju ajidomii aberinavo “?Ka venia ana naio ba joomo, bijuku kiki jibe na?”

<sup>22</sup> Ana iorou kanio, ana naio batavio bereio, mia nalo amial ka naio maka bunu rijikia ril vanlo, naruei nalo abitilubar ka naio jo joomo naio mial titai napano mila naio jibe na. Naruei naio jom̃ã mil ka ga jum̃ano banlo, maka bunu ril be buru ga jo.

<sup>23</sup> Mia naio jidel dolu ka ga m̃ã jo mila kiano im̃auano ea Yimo Lu na Atua Kunuano, bano-o kiano bogo nene bisi, ana naio ban bereio vonuo.

24 Naruei nalo aju jibe na bano-o, mia maka vesiou, ana koano ĩigi, mia bogo na naio mial ka naio be m̃abono jibe na, mia naio ba jo vonuo ga bano-o bokar siberio jumo.

25 Ana ea bogo na, naio jo ber jibe nei, berinavo “!Atua bijuku bo tanea ban kiniou nei! Beamu tomu nalo ajuña abiti sa ea kiniou bior maka navar tete, mia vonganei, Atua naio mial kiniou, tinien miia kiniou, naruei naio midular imouiano na kanaku jumolumu nene ruei.”

*Nailiano binimei mijuelar ban Mere ka mia naio rivar Yesu*

26-27 Naruei Lesveti naio be m̃abono siberio ari ruei, ana na Atua miila kiano nailiano nei, Kapriel, ka riva riverial kiano iliano tai rivan niatira tai, siano Mere, napano naio be niatira tai na komeli na vio Nasarete ea tanobuku na vio Kalele. Ea bogo na, aberkar Mere nene ruei ka mia riva soro ka toro tai, siano Yoseve, napano naio miyotuba ea yati na Parinio Tubo Teviti re nua, mia Mere naio maka riva to rivija naio vo.

28 Ana na nailiano nei Kapriel naio binimei, miyotuba ka Mere, naio berinavo “Mere-o, abe Atua naio jo jaaro toru laka ka jau, naio milivu kaso, a naio jo bijaso riano.”

29 Mia bogo na Mere mijog iliano nei, naio jidom bijovijonio toru laka, ana ber mia riviti von, ka nailiano nei mil kirinovo laka ban naio jibe nei, ber nioti nene venia.

30 Karina nailiano nei mil bereio banio, berinavo “Mere, jau komerou re. Atua tinieno jaaro

kaso ga, mia rila buruñara ilivuiano tai rimei ea kiamo meuliano.

<sup>31</sup> Vonganei, mia jau kove ñabomo, vano-o mia kodu kenerimo suñano tai, a ver naio riyotuba kario, ana monoka jau kesisia ka Yesu.

<sup>32</sup> Iliano Lu re nua berii kenerimo nene ruei, na naio berinavo

‘Naio mia rive toro na toru, a mia siano rive “Atua Na Loa Laka Kenerinio,”

a Atua Tubo rila naio rimei ve parinio tubo tai, napano ridu jeleig korobinio re nua nene, napano parinio tubo Teviti,

<sup>33</sup> naruei mia naio rije tuboiano ka nalo napano na amiyotuba ea Yakovo kanano ñaratavo,

nina be kulo Ju nalo na aju vonganei, a ka mia nalo na amei iorou, a kanano nave-natuboiano mia naio maka rijikia ribisi bogu tai.’”

<sup>34</sup> Naruei Mere naio miilo toru laka ka iliano na ber mia naio rudu tete, ana bika den nailiano nei, berinavo “?Ana mia vite nene riyotuba sel tuñabe liki nei, bior kiniou maka nuvitu biju kumemi juo kanaku suñano vo?”

<sup>35</sup> Ana na nailiano berdoñe, berinavo “Mia Niununo Lu rivatove easo, a mia moroano na Atua Na Loa Laka kiano rimei sovokoso, ana na mia jau koñigi. Ana bior mia jau kotibe na, mia nalo averinavo kiritete lu napano mia jau koduio be ‘Atua kenerinio.’

<sup>36</sup> “Ea kanamo vitiiiano, jau komial tena kirisikili laka ka mia tibe na, ana bo ka jau kosidomii von koniomo tiramoruo Lesveti yako. Aju amial



aber mia naio rivar kulu re tete ga, mia naber kaso, naio be tiramoruo ruei, mia vonganei, naio kiano siberio ari ruei.

<sup>37</sup> Jau monoka tiniemo rimaio, ka jibe ka napano Atua ber ka tiramoruo Sera re nua laka, ea tivelinio ka naio, maka ve titai leleio napano mia naio rijikia re ka rilaiio.”

<sup>38</sup> Ana na Mere naio berdoŕe, berinavo “Ierinio ga. Kiniou nobe niatira na Atua kanano iŕmauano ga, mo kiniou nomijamo ga ka mia naio rila vite nalo na ayotuba ka kiniou tibe ka ga napano naio jidomio, tibe kanio na jau koberial ban kiniou na.” Ana na nailiano nene juvan naio ban bereio.

### *Mere ba miadu ka Lesveti*

<sup>39</sup> Ana na Mere joŕa jidomii nailiano nei kanano iliano nalo nei, karina naio jidom toru ka riva rial kenieno nene napano Lesveti, mia maka vesiou ga, ana naio jumolu den kiano vio, mila soŕeli ban ea ŕarkomeli napano Lesveti naio koano Sakaraia ajaio, nina ea tanobuku na suku nalo na vio Yutea.

<sup>40</sup> Mia Mere neibano bokar naljuo nei kunualo nene, naio ba bio Lesveti.

<sup>41</sup> Mia bogo napano Lesveti naio mijog lubar Mere jooŕo ka mil banio, naio mijog ka kenerinio napano joa naio, bijobijo toru. Naruei Niununo Lu binimei ea Lesveti, naio binimei bujolou eaio,

<sup>42</sup> naio miaga manenea, berinavo “Aiou Mere, Atua rilivu kaso ve toru laka, loa tira dolu nalo aviniu, a mia kanano buruŕara ilivuiano toa bunu kanamo ŕarati napano mia kovario!

<sup>43</sup> Kiniou maka nove tira na memedu leleio ka mia kanaku Tubo Kenieno rimei riadu ka kiniou tibe nei, mia namial kirinovo laka ban kiniou.

<sup>44</sup> Mia kanaku solbouo naio bitilubarso, naio jaaro toru laka, bior monloglog bogo napano numijog joomo be moti garuei, naio bijobijo toru laka ea kiniou.

<sup>45</sup> Kito juo rajaaro mia rajaaro, bior robiekar batitig Atua Sopi kanano iliano, a mia rimei rive riano van kito juo tavukia ga napano naio berkar ban kito ruei.”

*Mere miaia Atua ka iouano tai*

<sup>46</sup> Ana ka bogo na, Mere kanano iouano tai jibe nei, berinavo

“Kanaku iviso miaia Atua toru,

<sup>47</sup> niunuku jaaro toru laka ea Tubo kiaku ioruriano,

<sup>48-49</sup> naio mial kiniou nojotano,

tira na kiano imãauano tai,

naio be Atua na Moroano,

jidomial kiniou,

mila tonovo ban kiniou.

Taara nalo napano amei iorou, averii kiniou, averinavo

‘Tira nei, Atua milivu toru.’

Nomidular siano lu,

<sup>50</sup> tinien miia nalo namã ajutano kanio,

taara re nua, na iorou.

<sup>51</sup> Moroano na jumãano mila vite miroano,

naio jiburevure nalo namã tinielo jikili,

mila dedade ealo abeve terakurano.

<sup>52</sup> Mila bulag parinio tubo den jelelo,

bitiri bulag nalo namã jidomiano batove ga.

<sup>53</sup> Nalo namã jijerlo, naio bagan batitiglo,

nalo naña abe sanibaiano,  
naio mijil bulaglo, juñalo yauo ga.

<sup>54-55</sup> Naio mila naña berkario nua ban korobido nalo,

binimei miija kito, kanano kulo Israel nalo.

Maka rivitoviton ea Epraamo,

tinienriia kiano bajulukuti nañariga-o tobo to.”

<sup>56</sup> Naina naruei Mere kiano iouano maaro ea vio na, mia naio jo bija Lesveti bano-o bokar siberio tolu, karina ban ea kanano vonuo bereio.

### *Jone Baruei naio moluo*

<sup>57</sup> Naruei binimei monloglog bogo na mia Lesveti rudu kenerinio, mia naio barlar be sunñano.

<sup>58</sup> Mia bogo napano Lesveti kiano m̄aratavo bija tomu na vaataro nalo amijogial vite nei, nalo ajaaro toru laka bija naio ka Atua kanano burum̄ara tinieiiiano nei banio, ka beamu naio be jumolumu ga, mia vonganei naio barlar kenerinio motoru.

<sup>59</sup> Mia bogo na kiritete nei naio bokar bogoti aluo, ana abinimei ka ala pakuveu ka naio. Ka bogo na, ajidom ka adu siano bunu, avio ka Sakaraia, tibe ka karam̄ano siano,

<sup>60</sup> mia kiritete kenieno berbure, berinavo “Makanio, naio siano Jone.”

<sup>61</sup> Naruei nalo amil banio, aberinavo “?Venia na? !Maka lele garuei kanamo m̄aratavo tai napano adu sio na jibe na toa naio!”

<sup>62</sup> Naruei amil ka ga juñalo ban kiritete nei karam̄ano, ka avika denio ka naio jidom ka adu sio na vabe toa kenerinio nene.

<sup>63</sup> Ana na Sakaraia mil ka juñano banlo, ber adu m̃esi tai rimeĩ vanio, naruei naio bivitauia, berinavo “Siano, Jone.”

Vite na naruei mila nalo na vio na amiilo toru laka kanio,

<sup>64</sup> mia monloglog bogo na bunu, Sakaraia minano mijuo, naruei naio mijikia mil bereio, ana na miaia Atua.

<sup>65</sup> Mia tomu nonovio nalo na tanobuku na, amijogial vite nei, amiilo va kanio, mia tukunuano nene mererako janea m̃arkomeli dolu nalo na tanobuku na suku nalo na vio Yutea.

<sup>66</sup> Ana na nalo nam̃a amijogio, ajidom bijovijon toru laka kanio, bior abitilubar ka Atua juñano jo bijaio, naruei nalo ajum̃a abivika denlo, aberinavo “?Kiritete lu nei mia naio tum̃abe?”

### *Sakaraia berial iliano na Atua jian banio*

<sup>67</sup> Naruei Niununo Lu binimeĩ bujomagmago ea Sakaraia, kiritete telisu nei karam̃ano, ana naio berial jibe nei, ber

<sup>68</sup> “Kito raiaia kanado Atua siano, Tubo re Israel, batove kean kito, bulular kito,

<sup>69</sup> bitirilar kiano siyovo, miyotuba ea bajulukuti na kiano toro na im̃auano Teviti, ka mia rilarrur kito.

<sup>70</sup> Nina kiano verikariano nanua, naverialiano nalo aberialio, aber

<sup>71</sup> Naio mia rivuru bulag kito den kiado uolu nalo jum̃alo,

<sup>72</sup> tiniene ribobogia re kanano virakariano bija korobido nalo, tinien miialo kia ga vo.

73 Nina verikariano jikili nene bija korobido  
Epraamo,

74-75 nanua Atua berkar ber rilarur kito ka kiado  
uolu nalo juñalo,

ka romerou re bunu, rove lu,

romemedu kamu ea mirano, roinãau kanano ka  
legiano nonovio ea kiado meuliano.

76 Keneriku, mia avioso ka Atua Loa Laka kiano  
Naverialiano,

mia kotukamu ka kala vatitig Tubo kiano  
mãarabo.

77-78 Mia koverial ka mia Atua tinien riia kiano  
tomu nalo,

tinien tiilo, ana mia riviekokoa kialo kariano  
nalo,

a rilarurlo.

Mia Atua riila kiano kiriyulu telisu na kavijo ve  
moti rimererali kito,

79 rimei rimererali kito napano mña rojua meli-  
jokouo,

napano niununu namãariano miununuko kito  
ruei,

a mia rimei rimererali mãarabo na tuñaro ka  
rotuñareiel eaio.”

### *Jone Baruei miluo*

80 Mia bogo na yuka nalo aju abarlaka bano,  
Jone nene naio miluo bavin ririo bo, a kiano  
jidomiano meruo batitigio, a naio biekouo ea  
Atua kiano iñauano bo. A naio ba joa vio  
yauo, ka riva rivokar bogo na mia naio monoka  
riyotuba ea kulo Israel nalo miralo.

## 2

### *Yesu moluo Mataiu 1:18-25*

<sup>1</sup> Ana ka bogo na, parinio tubo na kulo Romo kialo, naio siano Sisa Okastas. Naruei naio berial ka mia monoka avuluku tomu nalo na venuo nalo naña ajutano ka kiano vitikariano.

<sup>2</sup> Iñauano na abuluku tomu nalo nei, naio be moti na amila jibe na, a ka bogo na amilaio, mia toro tai na Sisa kanano naio joña bitikar burumñara tanobuku nei na vio Siria, a toro na toru nene, siano Kuarenias.

<sup>3</sup> Ana ka ala iñauano nei, aberenio tomu nonovio monoka avanvan bereio ea kialo vio nalo, ka mia amijikia avivitauia vatitig sialo, a avuluku vatitiglo.

<sup>4</sup> Vite na naruei mila ana Yoseve naio jumolu den komeli na vio Nasarete, naña naio jojoaio, nina ea tanobuku na vio Kalele, ana naio bavin ea komeli na vio Betleem, ea vio na tormoruo Parinio Tubo Teviti naio moluo eaio nua, nina ea tanobuku na vio Yutea, bior Yoseve naio miyotuba ea yati na tormoruo Teviti nene.

<sup>5</sup> Mo Yoseve burukar koano Mere jakisorio, napano ka bogo na, vaataro ka rivarlar kenerinio.

<sup>6</sup> Naruei abe juo abano, mia bogo na nalo aju kia ga Betleem vo, mia Mere mijog ea naio ka kiano bogo na mia naio to joomo binimej nonovio naruei.

<sup>7</sup> Ana na Mere midu kenerinio motoru, naio be suñano, a naio bivikakari batitigio ka nikulñarauo, mia maka kanano vio nabo tai, bior abe juo amilavon ka ava atua yimo na valauo,

mia naio bujo ruei, naruei Mere mila kenerinio mon joomo ea vio na abagan temeul nalo eaio.

*Nailiano nalo amiyotuba ka navitikariano na nunu nalo*

<sup>8</sup> Naruei ka bogiano nene, be tomu tai namã abitikar nunu aju bija kialo temeul nalo, ea soro tavio ka Betleem nene ga.

<sup>9</sup> Naruei Atua kanano nailiano tai batove keanlo, a Atua kiano mermerano midulii rera vio nene jibe ka burumãara yulu tai, mila nalo nei amerou toru laka.

<sup>10</sup> Naruei nailiano nei mil banlo, berenio berinavo “Kamiu kumerou re. Kiniou nomidu iliano nabo tai ka naver ka kamiu, ka mia naio mijikia rila tomu nonovio ajog rivu ve toru laka.

<sup>11</sup> Ka bogiano nei ga, ea komeli na Parinio tubo Teviti re nua kanano, nina ea vio Betleem, kiritete solbouo tai naio moluo vonga, ka mia naio rive kenemiu ioruriano. Naina naruei be kenemiu Tubo, naio be Naverikariano namã Atua berkario nua ruei ka mia riilaio rimei.

<sup>12</sup> “A naina naruei be kijokijo na vite nene: Mia kamiu kuvileal kiritete telisu nene, napano amila kokouro ea naio. Mia kuvial ka napano abivikario ka niakulmãarauo nalo ga, ka mia adu naio ka rimon ea vio na temeul nalo salo sinaniano.”

<sup>13</sup> Naruei nalo amiilo ka soḡeli ga, burumãara taara na nailiano dolu nalo na vio mave abinimei amiasolo bija nailiano neibano. Naruei nailiano nalo nei amiaia Atua, a amiou aber

<sup>14</sup> “Mave niogovu, nalo ajuãã amiaia Atua toru, a ea yetemeriba nei, tumãaro joa tomu na Atua jaaro kalo.”

*Tomu na abitikar nunu nalo aba Betleem*

<sup>15</sup> Nailiano nalo aberial iliano nei ruei, bisi na ajaluvo den tomu na abitikar nunu nalo nei bereio, karina abavin mave niogovu. Naruei nalo nei ajumã aberverii vite nei banlo bereio, aberinavo "Ai, abe ravano. Bo ka rava Betleem ka reial vite nei miyotuba vonganei, napano Atua berial ka kito."

<sup>16</sup> Ana nalo amila sořeli, aba amileal Mere naio Yoseve, a amijaka aba amiadu ka kiritete sesa napano monea mãano vio namã abavagan temeul eaio.

<sup>17</sup> Mia bogo na amial vite nalo nei, ana aber bulavulag nonovio iliano nalo napano nailiano berial kalo ruei, tivelinio na kiritete sesa nei.

<sup>18</sup> Telikiti na kulo dolu nalo amijog tukunuano nei, tinielo bujo ka burumãara vameneano tai.

<sup>19</sup> Mia Mere, mijekar vatitig nonovio vite nalo nei jua kiano iviso, maka tiniene ribobogia, naio jomã jo jidomiio julaka ga.

<sup>20</sup> Mia tomu nalo nei aban bereio ea kialo nunu nalo, a ajumã abamenea Atua siano, a nalo ajumã amiaia naio toru laka ka vite kirinovo nalo napano amijogio a amialio, napano kir- imemedu ga ka nailiano nei kiano iliano napano berial banlo.

*Amidu Yesu siano banio*

<sup>21</sup> Telikiti napano kiritete bokar kiano sude takurano, naio be bogo na mia ala pakuveu ea naio. Amila jibe na, kario ajisia ka Yesu, napano sio nei be sio nanua nailiano berial kalo jukamu ruei, avona bisi ana Mere naio be řigi kanio.



*Amidu dovorovo Yesu ban ea Atua Kunuano Lu*

<sup>22-24</sup> Telikiti na Yesu miyotuba sude ari barlaka ruei vo, bisi na be bogo na monoka avuru sida na lakoniano ea Atua Kunuano Lu, nina bior burukija na tira na bar tete. Naruei aba aburu sida nene, jakii tuboiano na Mosis kiano berenio, berinavo “Talinãasa nalo amijikia aue ga vaama ve juo, p̃eli na kirisibo ve juo.”

Ana ka bogo nene, amidu dovorovo Yesu ban ea Atua Kunuano Lu, amiokoio ban Atua. Vite na jakii Mosis kiano tuboiano, na naio berenio “Tete suñano nalo nonovio na amoluo jukamu, nalo abe lu, abe Atua kanano.”

*Tormoruo Simion mial Yesu ea Atua Kunuano Lu*

<sup>25</sup> Mia be toro tai joa Atua Kunuano Lu ka bogo na, siano be Simion. Naio be tena vio Yerusalemo ga tai, naio be namemedu tai, a naio be toro tai nañã biekouo ea bajago na volkouano. Naio jororea jidom m̃elea ka rial Atua kanano Natinieiiiano, nina Naverikariano, rimei ea kulo Israel nalo ea bogokouo nei ajuai.

Mia Simion nei naio be toro tai nañã Niununo Lu jojoa m̃ã naio nañariga,

<sup>26</sup> mia Niununo Lu berial ka naio ruei ka mia naio rivakovio re vo rivano-o mia mirano rialio Atua kiano Naverikariano.

<sup>27</sup> Ana Niununo Lu buru naio binimei ea Atua Kunuano Lu, monloglog bogo na amidu kiritete sesa Yesu binimei, ka ala bajago na tuboiano nene.

<sup>28</sup> Ana Simion midu kiritete nene, ana naio miaia Atua a ber siva banio, berinavo

29 “Tubo toru o, vonganei nemial vite na jau koberkar ka kiniou, naio miyotuba ruei. Mila tuñaro binimei ea tinieku, ana vonganei jau komijikia kajamo ka kiniou kanamo naimãauano, nataluvo den yetemeriba nei neviedu.

30 Ea miraku ga namial kanamo Ioruriano,

31 napano komiila binimei ea tomu kinkin nalo na yetemeriba nei miralo,

32 javukia yulu tai napano jiloglogso ka kulo dolu nalo, a ka mia aiaia kumemi kanamo kulo Ju nalo, bior kenememi mermerano nei, Yesu.”

33 Ana Yoseve naio Mere, abe juo amiilo toru laka ka Simion kanano iliano nalo namãa berii Yesu,

34 ana Simion mil bereio, milivu kalo, naruei naio mil ban Yesu kenieno, berinavo

“Atua mila kiritete nei binimei ban kito na vio Israel ka rila kito ve telabo rojoru, a kanio rila kito ve telabo rotumolu bereio.

Atua mila naio binimei jibe ka kijokijo tai, mia tomu ve telabo ail rivova ka naio,

35 ana tibena mia naio rila kialo jidomiano nalo napano mãa ajuluku nei amalmaluvo ea vio medave.

Mia tivelinio ka jau, mia jogvaiano tulu tiniemo tavukia iobogu na mira, mia kanamo iviso rivurupeio kar tenalo na napano mia ayotuba ka kenerimo nei.”

*Tiramoruo Ana mial Yesu ea Atua Kunuano Lu*

36-37 Mia tiramoruo tai bunu jo ka bogo nene, siano Ana, napano naio be naverialiano tai. A Ana nene, karamãano siano Vanuele, napano naio

miyotuba ea yati na tormoruo Aisere re nua. Naio joro nua ruei, ka bogo na naio be niatira kia ga vo, mia naio jo bija koano ka yuka aluo ga, ana koano ñaro denio. Naruei naio be taanou jibe na ga, bano-o kiano yuka bokario duelimo va arolu ba veri [84].

Naio be tira tai napano monmon ka ga ña jojoa ña Atua Kunuano Lu, napano naio joña bijurukar bogo na lotuano na kavijo bano-o bokario na kijevei, a dañariga naio mondulu ka ña jo bolkouo.

<sup>38</sup> Ka bogo na naruei, naio binimei vaataro kalo, ana naio bolkouo, ber siva toru ban Atua bior kiritete nei, a iorou ka nina, naio ba tavio ba joña berii Yesu ban tomu nalo naña aju ajirarag rorea ka Atua rimei rilarrur Yerusalemo, mia Ana ber bisivisii banlo ka kanalo Naverikariano naio binimei ruei.

*Yoseve nalo aban bereio Nasarete*

<sup>39</sup> Telikiti napano Yoseve naio Mere amila nonovio vite nalo nei biniu javukia naña Atua kanano tuboiano berenio, mo Yesu abatove bereio ea kanalo komeli na Nasarete, nina ea tanobuku na vio Kalele.

<sup>40</sup> Mia kiritete nene miluo binimei toru, a kiano jidomiano binimei be masou laka, a amial ka napano Atua miija naio ka naio rila vite nonovio rivu ea kiano meuliano.

*Yesu be ñeaku kia ga, naio berloglog tomu nalo ea Yimo Lu*

<sup>41</sup> Ana ka yuka nonovio, kulo Ju nalo ajumña amila kanalo jokoluolu tai, napano naio be

Sidomkariano na Ioruriano. A dañariga, nalo namña aju janea vio dolu, tiniel jii toru ka avavin Yerusalemo ka ala jokoluolu nene, a Yesu kanano tormoruo juo bunu amila jibe na.

<sup>42</sup> Ana ka yuka tai, bogo napano Yesu kanano yuka bokar duelimo ba juo [12] kia ga vo, aban bereio aburu Yesu bijalo.

<sup>43</sup> Mia amila vite nalo na jokoluolu nei bano-o biniu, ana tomu nalo amieliel bere abanvan ea kanalo vio nalo. Mia Yesu naio maka rivano, naio jobo kia Yerusalemo, mia kanano tormoruo juo, maka ajikiaio.

<sup>44</sup> Naljuo ajidomii aberiamña naio jo kovio bija lo bure burumñara taara na mñaratavo bija kanalo bilbilu nalo, mia nalo amiel ba bokar legiano momou takurano. Mia bogiano ana ajirag Yesu bano-o,

<sup>45</sup> mia maka aialio to vijalo, naruei nalo amial ka monoka atakii bere jaalo ava Yerusalemo alavon ka alealio.

<sup>46</sup> Amiel bogoti takurano momou, abinimei aboru bereio Yerusalemo, nalo ajiragio bano-o, ana ea bogoti dolu nene, be bogoti tolu na kialo ieliano, ana amileal vonga naio, amial naio joña jotano ea Atua Kunuano Lu. Naio jotano bija naverloglogiano nalo na vio na, naio joña mije tiliniene ka kialo iliano nalo, a joña bivika vikadeniano denlo.

<sup>47</sup> A nalo namña aju vaataro ka Yesu ea bogo na, amiilo toru ka kiano burumñara masouano a jikiaiano na, a kanio verdoŕeiano nalo namña naio jian ban nalo namña ajumña abika vite denio.

<sup>48</sup> Ana telikiti napano kanano tormoruo juo

nalo amial ka napano naio joṃa mila jibe na, amiilo toru kanio, ana kenieno mil banio, berinavo “! Ai, keneriku! ? Bior vaio ana kojidom ka kala lelan kumemi ve toru tibe na? Keialio, kumemi juo numisiragso-o mia, maka lele nuvillealso, komila kumemi numijog kirivova-o mia.”

<sup>49</sup> Ana ka bogo na Yesu midu verdoṣeiano tai banlo, napano ber jibe nei, berinavo “?Bior vaio ana kubano kumituṃa kumisirag kiniou janea vio dolu nalo jibe na? Juṃabe, kamjuo maka kumisidomii ka kiniou monoka notoṃa nala Teta kanano iṃauano joomo ea kunuano?”

<sup>50</sup> Mia verdoṣeiano na ber kalo, maka ajikia ajog lubar nioti nene.

<sup>51</sup> Naruei Yesu jumolu den vio nei, ana naio ban bijalo, abatove bereio ea kanalo vio Nasarete.

Ana Yesu jobo bijalo ea vio na, naio jo mijogkarlo bo daṃariga. A kenieno Mere naio joṃa jidomikar vite nalo nei joomo ea kanano iviso bogo nonovio.

<sup>52</sup> Mia yuka nalo aju abinimei abarlaka bano, mia Yesu jo miluo binimei toru nonovio, a kiano masouano bija kiano moroano jo binimei toru lie vo, mia Atua jo milivu kanio toru laka, mila ana tomu nalo amial naio bo laka, ajaaro toru kanio.

### 3

*Jone Baruei naio joa vio yauo, joṃa mioliolu ka naviligiano*

<sup>1-2</sup> Yuka tealoo bar laka ruei vo bisi, ana Jone Baruei, Sakaraia kenerinio, naio miyotuba ea vio

yauo. Nina ea bogo na burumñara parinio tubo Taiperias Sisa na vio Romo naio be tubo bokar kiano yuka duelimo ba jimo ruei, ana ka telikiti na naio bitiri bulag kanano tomu na tortoru nalo tai ruei, jibe Pontas Pailat, naio mije tuboiano ea vio Yutea, a Erot, naio mije tuboiano ea vio Kalele, a kuruano Vilip, naio mije tuboiano ea tano na vio Ituraia bija Trakonaetis, a Lesanias, naio mije tuboiano ea tanobuku na vio Abilini. Ana ka bogo na bunu, parinio kulo lu juo napano mña aju Yerusalemo, be Anas naljuo Kaivas.

Mia Jone joa vio yauo, ana Atua jian iliano ban naio,

<sup>3</sup> naio ba jeliviv ea tanobuku nalo na Yortano, naio jomña mioliolu berinavo tomu nalo monoka aviliglo, a avaruei, tibe na ana mia Atua riviekokoa kanalo kariano nalo.

<sup>4</sup> Naio mila javukia ga na nanua mña Naverialiano Aisea naio ber nua ruei ea kiano niosi, napano mña berenio

*“Niono tai naio jo bio ea vio yauo, berinavo:  
Kuvila vatitig Atua kanano mñarabo nalo,  
ka naio mijikia rimei ea kenemiu meuliano  
nalo.*

<sup>5</sup> *Mia monoka kuvitviniko bořařili nalo,  
a monoka kuvikili bulag yasuku nalo avatove  
rivu,*

*a vio nalo na jorokoro monoka nalo amemedu  
rivu,*

*a vio nalo na mña jukujukuduo monoka nalo  
aierivin rivu;*

<sup>6</sup> *tibe na, ana mia taara nonovio na tomu nalo aial kialo Ioruriano napano Atua riila riel ea m̃arabo nei riyotuba kalo.” Ais 40:3-5*

### *Tomu nalo abinimei ka Jone*

<sup>7</sup> Iñauano na be Jone kanano, naio jo ka m̃a rioliolu tibe na naruei, mia telikiti na tiniobi toru aba tavio ea vio yauo ka naio rivaruei ealo, naio mil jikili banlo, naio ber jibe nei berinavo “Kamui na kumitibe ka maro nalo ga napano amerou ka sebi tai ana aburo, mia kuberiam̃a kumijikia kuvuro ka buruta kenieno sebi na mia Atua rionio rimei? Makanio, bior maka kuvilig kamui vatitigio vo.

<sup>8</sup> Mia ver kube riano ka napano kumerou ka vironiano nei, kenemiu meuliano monoka avar m̃arati nabo napano rivare ka kenemiu viligiano nene. Mia kuvitikar, kuve re m̃arou bereio, tibe ka nam̃a kumila ruei, nam̃a kumituñã kuberinavo ‘Ee, kito roju bo ruei, bior kito naruei robe Epraamo kiano yati nalo memedu kia nei.’ Mia nina maka titenia, bior ver Atua sidom, naio mijikia rivar puruveru nalo na ga rim̃aukalo ave Epraamo kanano yati ve telabo, ka mia adu jelemiu.

<sup>9</sup> Kiniu neber ka kamui, ka m̃aryekesi jo ruei ka te bulag buruiesi nalo na maka avar m̃arati nabo, ka avukulo avan ea burutinia sebi.”

<sup>10</sup> Telikiti na tiniobi neibano amijogio amerou mia amerou, ana abika aberinavo “Mo aver tibe na, ana mia kumemi nuvila tum̃abe naruei?”

<sup>11</sup> Ana Jone berdoĝelo, berinavo “Toro na ĵano kulukoti juo, mia monoka naio rijamo ka tinene van toro na maka ve ĵano tai; a toro na be sano sinaniano miroano, mia naio monoka riviovio ka tealo van toro na maka ve sano taio.”

<sup>12</sup> A tomu na takis, naĵa abe tomu na juku-jukuano memedu, telabo bunu abinimei ka Jone rivaruei ealo, mia nalo bunu abitilubar kialo vovaiano nalo, naruei abika bunu aberinavo “?Naverloglogiano, tuĵabe ka kumemi, mia monoka nuvila tuĵabe?”

<sup>13</sup> Ana naio ber kalo, berinavo “Mia kuvar den tomu nalo rive verare ka ga nana mia monoka avuluio, mia to loa re, tibe ka naĵa kumilala mugaruei.”

<sup>14</sup> Mia tomu na mira tealo bunu abika jibe na ka Jone, aberinavo “?Mia kumemi, nuvila tuĵabe?”

Naruei naio ber kalo, berinavo “Kamiu kubar kenemiu tenalo na mira ana tomu nalo aju amerou laka ka kamiu, mila na bogo napano kamiu kumisidom vite tai, kuber ga, ana nalo monoka ajamo bior napano amerou. Mia bajago na, mia monoka kuvila re bereio. A kamiu kumituĵa tiniemiu mimi daĵariga ka kuber tom na tortoru nalo ajuĵa abulu kamiu telisu ga, ĵeli bare ga kovio vo, mia kamiu monoka kuvisaaro ga kanio.”

*Jone berenio mia Naverikariano rimei*

<sup>15</sup> Mia ea bogo na, kulo Ju ajidomii aber kialo Naverikariano vaataro ka maluvo, ana nalo amijog Jone kiano ilinovoiano nalo nei, ana



nalo ajaaro kanio, naruei vikadeniano joa kialo jidomiano, ajumña abivika, aberinavo “?Aa, ħeli toro na naruei, ħeli naio be kiado Naverikariano koviobo?”

<sup>16</sup> Mia Jone naio jomña ber lubarbario banlo, naio berinavo “Makanio, kiniou nebinimei jukamu, nojomña nabaruei ea kamiu ka uei ga, mia be toro dolu tai napano naio jo binimei iorou ka kiniou. Toro nene, naio loa lie vo ka kiniou, mia kiniou maka navare ka neialar kanano kulubue na jaano, ħeli nala kanano imauano dolu tai. Mia naio naruei, mia rivaruei ea kamiu ka Niununo Lu, rivija kanano sebi, ka risebi kon niamiamo nono den kenemiu meuliano nalo.

<sup>17</sup> Naio jibe ka napano naio midukar buruĥia marteai tai, ka mia rikurkar ka uiti nalo, riĥilig kon mārati nalo. Tibe na, ka mia naio rivar mārati uiti nabo nene ava vonuo, mia naio rivuku vinikiti nene rivan ea sebi tai napano mia maka rijikia rimāro bogo tai.”

<sup>18</sup> Nina naruei, Jone Baruei naio jomña mioliolu ka ioluano vou nabo ban tomu nalo jibe na naruei, a naio jomña ber iliano dolu nabo telabo ka tunukakarlo, a ka rilabonlo.

<sup>19</sup> Mia be toro tai naio tiniene maka saaro ka Jone nene leleio, nina be Parinio tubo Erot, bior ka napano Jone naio jomña mil banio ka napano naio burular tira nei Erotias, napano kuruano koano, mia mil banio bunu ka vite dolu telabo napano jomña milaiio.

<sup>20</sup> Mia loa ka kanano vovaiano dolu nalo, Erot tinien jer Jone banbano-o deio, ana jumolu buku naio ban ea yimo na lakoiano.

*Jone baruei ea Yesu**Mataiu 3:13-17; Mak 1:9-11*

<sup>21</sup> Mia bogo na Jone maka rivan ea yimo na lakoiano vo, naio joña baruei ea tomu nalo banbano-o, mia bogo tai ana Yesu bunu binimei ea vio nene, ana na Jone baruei ea naio bunu. Naruei telikiti na Yesu jaluvo den uei, naio joña bolkouo, ana vio mave betavo,

<sup>22</sup> naruei Atua kanano Niununo midu niabene, naio batove binimei jibe ka vaama tai, binimei bujo jua naio. Ana na Atua mil jel mave batove berkanio, berinavo “Jau kobe keneriku na, naña nejidomso toru laka. Tinieku joaso, tinieku jaaro toru kaso.”

*Yesu korobinio nalo**Mataiu 1:1-17*

<sup>23</sup> Mia iorou ka na Jone baruei ea Yesu, ana na naio jikar kiano iñauano naruei, ana ka bogo na, naio kiano yuka bokar duelimo va rolu. Mia yati na Yesu miyotuba eaio, nina tivelinio ka suñano, jikar ea Yoseve, napano amial jibe ka naio be Yesu karamño, naio jo ban jibe na:

Yoseve, naio be Eli kenerinio

<sup>24</sup> Eli naio be Matata kenerinio

Matata naio be Livai kenerinio

Livai naio be Melki kenerinio

Melki naio be Janae kenerinio

Janae naio be Yoseve kenerinio

<sup>25</sup> Yoseve naio be Matateas kenerinio

Matateas, naio be Amos kenerinio

Amos, naio be Neam kenerinio

Neam, naio be Esli kenerinio

Esli, naio be Nagae kenerinio  
26 Nagae, naio be Mat kenerinio  
Mat, naio be Matateas kenerinio  
Matateas, naio be Semein kenerinio  
Semein, naio be Yosek kenerinio  
Yosek, naio be Jota kenerinio  
27 Jota, naio be Joanan kenerinio  
Joanan, naio be Resa kenerinio  
Resa, naio be Serupapele kenerinio  
Serupapele, naio be Sieltiel kenerinio  
Sieltiel, naio be Neri kenerinio  
28 Neri, naio be Melki kenerinio  
Melki, naio be Adi kenerinio  
Adi, naio be Kosam kenerinio  
Kosam, naio be Elmñatam kenerinio  
Elmñatam, naio be Ere kenerinio  
29 Ere, naio be Yosua kenerinio  
Yosua, naio be Eliesa kenerinio  
Eliesa, naio be Jorim kenerinio  
Jorim, naio be Matat kenerinio  
Matat, naio be Livai kenerinio  
30 Livai, naio be Simion kenerinio  
Simion, naio be Yuta kenerinio  
Yuta, naio be Yoseve kenerinio  
Yoseve, naio be Jonam kenerinio  
Jonam, naio be Eliakim kenerinio  
31 Eliakim, naio be Melea kenerinio  
Melea, naio be Mena kenerinio  
Mena, naio be Matata kenerinio  
Matata, naio be Netan kenerinio  
Netan, naio be Teviti kenerinio  
32 Teviti, naio be Jese kenerinio  
Jese, naio be Ovete kenerinio  
Ovete, naio be Boasa kenerinio

Boasa, naio be Sala kenerinio  
Sala, naio be Nesono kenerinio  
<sup>33</sup> Nesono, naio be Aminatapo kenerinio  
Aminatapo, naio be Atmin kenerinio  
Atmin, naio be Ani kenerinio  
Ani, naio be Esrono kenerinio  
Esrono, naio be Peres kenerinio  
Peres, naio be Yuta kenerinio  
<sup>34</sup> Yuta, naio be Yakovo kenerinio  
Yakovo, naio be Aisak kenerinio  
Aisak, naio be Epraamo kenerinio  
Epraamo, naio be Tera kenerinio  
Tera, naio be Nao kenerinio  
<sup>35</sup> Nao, naio be Seruk kenerinio  
Seruk, naio be Reu kenerinio  
Reu, naio be Pelek kenerinio  
Pelek, naio be Epa kenerinio  
Epa, naio be Sela kenerinio  
<sup>36</sup> Sela, naio be Kaenan kenerinio  
Kaenan, naio be Avaksati, kenerinio  
Avaksati, naio be Sem kenerinio  
Sem, naio be Noa kenerinio  
Noa, naio be Lamek kenerinio  
<sup>37</sup> Lamek, naio be Metusela kenerinio  
Metusela, naio be Inok kenerinio  
Inok, naio be Jarete kenerinio  
Jarete, naio be Malalel kenerinio  
Malalel, naio be Kaenan kenerinio  
<sup>38</sup> Kaenan, naio be Enos kenerinio  
Enos, naio be Sete kenerinio  
Sete, naio be Atam kenerinio  
ana Atam, naio be Atua kenerinio.

## 4

*Sim̃aro nalo kanalo parinio tubo, napano Setano, milavon Yesu*

*Mataiu 4:1-11; Mak 1:12-13*

<sup>1</sup> Naruei telikiti na Yesu naio binimei bereio ea tanobuku na marauei na Yortano ea vio na Jone baruei ea naio, naio binimei bujo vatitig ka Niununo Lu. Ana na Niununo buru Yesu ban ea vio yauo bereio,

<sup>2</sup> mo naio joa vio na bano-o bokar bogoti duelimo va veri [40], napano mia sim̃aro nalo kanalo parinio tubo nei jom̃a milalilio. A ka bogoti nalo na, naio maka m̃a to sinano, banbano-o na mijog ka jijer naio.

<sup>3</sup> Ana Setano nene binimei, berinavo “Ver jau kobe Atua kenerinio riano, jau kover von ka puruveru na ka rimej rive joko, ka kosenio.”

<sup>4</sup> Ana Yesu berdoṣe, berinavo “Maka leleio, bior Iliano Lu naio ber ruei, berinavo

‘Maka toro rijikia rila toro rimeul ea sinaniano ga.’”

<sup>5</sup> Ana na Setano jidom rilavon Yesu bereio, naruei naio buru kanano jidomiano bavin ea burum̃ara burusuku tai. Ana vaarakurano ga naio jiloglog buruvenuo nalo na yetemeriba nei kanio,

<sup>6</sup> ana naio berkanio, berinavo “Navitikariano na vio nalo na, bija kialo mermerano nonovio nalo na, ajua jum̃aku ruei. Kiniou nabar siano kario, ka namijikia najamo ka van kei napano tinieku ka naio.

<sup>7</sup> Mo, ver jau kojorua jaaku ga, kobolkouo ka kiniou ga, mia kiniou najamo ka vite nalo na riviniu tua juñamo.”

<sup>8</sup> Mia Yesu berdoře, naio berenio berinavo “Iliano Lu naio berenio ber

‘Jau kobolkouo ka Atua ga, jau monoka kala kanano iñauano naio ve takurano ga, bior naio ga be kanamo Tubo.’”

<sup>9</sup> Naruei Setano naio jidom rila-von Yesu bereio, naio buru kiano jidomiano ba Yerusalemo, midu naio jo levlevi ea vio tai, mave ea Atua kunuano, ana berkanio, berinavo “Ver jau kobe Atua Kenerinio, koviako yetano. Ver jau kalaio, mia rivu ga na,

<sup>10</sup> bior Iliano Lu berii Atua, berinavo

‘Naio mia riila kiano nailiano nalo, ka mia amei atu avitiikarso, atukuku kaso.

<sup>11</sup> Mia aisopkarso mave ga ka juñalo ka mia kavan re jaamo ea puruveru.’” *Iouano 91:11,12*

<sup>12</sup> Mia Yesu berdoře naio bereio, berinavo “Maka leleio, bior Iliano Lu ber bunu ber

‘!Jau kolavon re Tubo kiamo Atua ka naio rila kanamo vite tai!’”

<sup>13</sup> Mia telikiti na Setano mila juboluboiano nalo nei bisi, ana buro denio, ba jo rorea ka rileal bogo dolu tai napano naio jidom ber mia mijikia tovulu Yesu eaio.

*Yesu jikar kiano iñauano yako Kalele*

*Mataiu 4:1-11; Mak 1:12-13*

<sup>14</sup> Karina, Yesu miel ea moroano na Niununo Lu, binimeĩ boru Kalele, mia tomu nalo ajumña

aberii naio banbano-o ba bokar vio nonovio ea tanobuku nei.

<sup>15</sup> Ana naio jomña ban ea kanalo yimo nalo na volkouano, naio jomña berlogloglo, naruei nalo ajaaro toru kanio, ajuña amidular siano bavin.

*Nalo na vio Nasarete amijilar Yesu*

<sup>16-17</sup> Bogo tai Yesu binimei boru ea kiano vio Nasarete, vio napano naio miluo binimei toru eao, ana ka Legiano Lu, javukia namña naio jomña mila bogo nonovio, naio ban bijalo ea kanalo yimo na volkouano. Ana aber naio rivuluku bulag Atua kanano Iliano Lu vanlo, ana na amidu niosi namña Aisea naio bivitauia binimei banio. Ana naio jumolu betavo ea niosi nene, mileal vio na naio jidom rivuluku bulag vanlo, ana naio bulukuio, napano naio ber jibe nei, berinavo

<sup>18</sup> *“Niununo na Atua kanano naio joa kiniou ruei, bior Atua naio jiloglog kiniou ka kiniou naruei noioliolu ka Ioluano vou nabo rivan talimasa nalo.*

*Naio miila kiniou nebinimei ka neverial van nalo na ajua lakoiano, ka vonganei, amijikia avanvan tavio bereio ga tibe na,*

*a ka kiniou neverial ka merebono nalo, ka vonganei, miralo mijikia rimei rivu bereio.*

*A naio miila kiniou, ka tomu nalo namña ajutano, napano kulo dolu nalo ajuña amila kikilo julaka, mia kiniou novuru bulaglo, amei atua vio tai nabo bereio.*

<sup>19</sup> *Tenene na, kiniou nemijikia nala rimeravo, ka vonganei, Atua mila kanano bogo vou nabo tai miyotuba ka tomu nalo nene naruei.”*  
*Ais 61:1,2*

<sup>20</sup> Telikiti na Yesu buluku nina bisi, ana na mijukukarko niosi nene, jian ber ban tikon, ana naio ba jotano mave ea jeleigio vio namã amioliolu eaio, ka naio ril van tomu nalo. Naruei nalo abiniu napano aju joomo aju abiti kilkil ea Yesu ka ajog ka venia napano mia naio river kalo.

<sup>21</sup> Mia bogo napano naio jikar kiano iliano, naio ber jibe nei, berinavo “Kiniou neber ka kamiu, ka Atua kiano Iliano Lu na kumijogio vonganei, iliano nalo nei kanano abinimei be riano bo vonganei ga, ea miremiu.”

<sup>22</sup> Mia telikiti na tomu nalo amijog Yesu kiano iliano nalo nei, amijog jibe ka naio mil bo mia bo, melokloko a m̃adigdig, mia nalo abameneaiu toru, ajumã aberverenio jibe nei, aberinavo “! Ana kema na, naio be Yoseve kenerinio ga na! ? Mia naio jomã bar tanea iliano novo nalo na ea vio be?”

<sup>23</sup> Ana na Yesu berdoṓelo, berinavo “Peli kumisidom kuver kanado iliano moruo tai ka kiniou, napano ber ‘Nakulekuleano, jau kala vatitigso beamu vo, karina jau komijikia kajai tomu dolu.’ Nina bior kamiu kumijog ruei ka bogo napano nojo yako Kapeneam, nojomã namieliel ka tomu telabo, tenene na kumitu kumisidomii kuber bior vaio ana maka nemei nala tena van kamiu ea kanado vio nei bunu.

<sup>24</sup> Be riano never ka kamiu, ka ver naveri-aliano tai, mia tomu na kanano vio memedu, maka ajikia asaaro kanio, maka ajikia avatove kanio.

<sup>25-26</sup> Nina be riano ga. Nejidom ka kamiu kuvisidomii von tormoruo Elaija re nua. Ka



bogo na, yuo maka rivovo bano-o bokar yuka tolu togio, a burum̃ara vituiano tai jovuko rera vio Israel. ?Ana Atua miila Elaija ba miija kei ka bogo na? Kam kuvialio, naio maka riila naio rivan ka riija taanou re Israel tai nam̃a aju amijog bova, mia naio miila ba miija taanou na bulukomeli na vio Serevati, nina ea tanobuku dolu na vio Saiton.

<sup>27</sup> A kuvisidomii von tormoruo Elisa kiano bogo bunu. ?Ka bogo na, tomu miroano na abar burumieni, mia Atua milarur kei? Naio maka rilarur nalo na Israel tai na bokar mieiano nei, mia naio milarur toro re Siria nei, Nomano. Be riano, kito tomu nalo nam̃a roju rober kito robe Atua kiano tomu nalo memedu, mia nalo nam̃a Atua miilalo abinimei ka ala im̃auano van kito, mia kito romielikue kalo ga.”

<sup>28</sup> Ana na nalo napano aju joomo ea yimo na volkouano nei amijog iliano nei, kialo jidomiano bilig ba be dolu, vonganei nalo tiniel jer Yesu toru.

<sup>29</sup> Naruei nalo ajerm̃i ka Yesu, ana aburio bano, aburu ba tavio ka kanalo komeli, ana aburu naio ba abavin ea burum̃ara yabalili tai napano kanalo komeli joaio ka ajidom avuku Yesu rivatove ea vio na naruei.

<sup>30</sup> Mia Yesu jaluvo den jum̃alo bea ga, ana naio miel jel burelo ga bano, naio juvanlo ajubo.

*Yesu ban ea vio Kapeneam, naio miilalar niadu tai*

*Mak 1:21-28*

<sup>31</sup> Ana na Yesu miel batove bokar komeli dolu tai na vio Kalele, nina be Kapeneam, mia

ka Legiano Lu berlogloglo ea kanalo yimo na volkouano.

<sup>32</sup> Mia nalo namña amije tilinielo amiilo toru laka, bior amijog Yesu kanano iliano temi bo, a Atua kanano moroano joaio.

<sup>33</sup> Ana ka bogo na, toro tai jo joomo naliko, napano niununo na sim̃aro va tai joa mila bulag naio, mia toro nene miaga m̃erere kirivova tai vo, naio mil ban Yesu, berinavo

<sup>34</sup> “?Ei, Yesu re Nasarete, kiamo vaio joa kumemi? !Peli jau kobinimei ka kalakiki kumemi, a! Bior nemijikiaso ruei, ka kobe Toru Lu nabo tai na Atua kanano.”

<sup>35</sup> Ana Yesu mil jikili ban niadu va nene, berbureio, berinavo “!Ee, abe keil re bunu! Jau kataluvo den toro na vonganei ga.” Ana niununo va nei buku toro nei mijoru iviso burelo, ana na naio jaluvo denio, buro bano, mia toro nei mijog bo bereio jo.

<sup>36</sup> Naruei tomu na vio nei amiilo toru laka, mia nalo ajum̃a aberverii Yesu, aber “Ei, iliano na jum̃abe tenia na? Nina be buruvayukouo tenia, kiano moroano buru tomoruo loa laka. Naio mil ga ban niununo va nalo, mia aburovuro jibe na ga.”

<sup>37</sup> Ana bior tena mia nalo ajaaro, ajum̃a aberial vatitig Yesu siano ba janea vio bokar vio nonovio na tanobuku nei.

*Yesu milarur Saimon Pitere kenieno simemi,  
naliko kulo dolu telabo bunu  
Mataiu 8:14-17; Mak 1:29-34*

<sup>38</sup> Ana Yesu jumolu den yimo na volkouano nei, mia naio ban ea Saimon kunuano, nina ea komeli na Kapeneam kia ga vo. Naruei ea vonuo nei, Saimon kenieno simemi naio jo mon ea ñano jogu, mie yulu, niabene bituvitunu, mia aberial ka Yesu, abika den naio aber jumabe ka tiramoruo nei.

<sup>39</sup> Naruei Yesu binimeï jikili ju tivelinio ka tira neibano, ana mo naio mil berbure mieiano nei, ana niabene binimeï menini nonovio bereio, naio mijog bo bereio, ana jumolu, ba milaii salo sinaniano.

<sup>40</sup> Mia bogo namã mñerenio batove, jibe ka na Legiano Lu na bisi, ana nalo namã nalo tealo amie ajumã, abarvarlo abinimeï ban Yesu, ana naio mije jumano monealo, mieliel kalo.

<sup>41</sup> A telabo kalo, siñaro nalo abava tavio denlo, napano ajumã amiaga, aberinavo “!Ei, jau naruei jau kobe Atua kenerinio a!” Mia Yesu berbure siñaro nalo nei ka mia aver re bunu titai leleio, bior amijikia ruei ka naio be Naverikariano riano.

*Yesu mioliolu janea tanobuku na Yutea*

*Mak 1:35-39*

<sup>42</sup> Mia kavijova kia ga vo, ana Yesu jumolu ana naio takurano batavio den yimo, ban ea vio tai napano be tumãro bo. Kar iorou, ana tomu nalo abinimeï kanio, ajirag naio bano-o mia amileal naio joa vio nei naruei, ana ajidom naio to naliko, amila vio ka averbure naio ka tuvanlo re,

<sup>43</sup> mia naio ber kalo, berinavo “Makanio, monoka kiniou nava noioliolu ka Ioluano vou nabo na navenatuboiano na Atua kanano nei van

komeli dolu nalo na aju keano vo, bior amiila kiniou nebinime i ka vite nei naruei.”

<sup>44</sup> Ana naio jaluvo denlo, ba mioliolu janea yimo na volkouano nalo ea komeli nonovio na tanobuku nei Yutea.

## 5

*Nalo napano Yesu biolo be moti, aba ajakisorio Mataiu 4:18-22; Mak 1:16-20*

<sup>1</sup> Bogo tai, ana Yesu joa yaba ueiyabo na toru nei, naña tomu tealo ajunã abio ka Ueiyabo na Kenasarete, a tealo abio ka Ueiyabo na Kalele. Ana ka bogo na, tomu nalo miroano laka ajumolu aju jelviviko Yesu, jibe ka vio telisu ga, bior ajidom ajog naio rioliolu ka Atua kiano iliano rivanlo.

<sup>2</sup> Mia Yesu mial ka uako sesa juo aju ga vaataro kalo yako, napano aburulo abavauro ajua baramudou ea bayono, a naio mial ka napano tomu nene nalo ajudobi ea tei, ajunã ajekon kanalo suņede.

<sup>3</sup> Mia Yesu miel bano-o biako ea uako sesa nei tinene, napano be Saimon kanano, ana naio berkanio ber naio riyuku lario rivajou lie kija ga. Naruei Yesu jotano ea uako sesa nei, ana naio jonã berloglog nalo napano ña aju bijilo uro.

<sup>4</sup> Mia bogo na naio mil banlo-o avona bisi, ana naio ber ka Saimon, berinavo “Kito, kiniou nejidom ravajou lie kija koyou von ka rovuku suņede beamu vo.”

<sup>5</sup> Ana Saimon berdoņe, berinavo “E abe toro na toru, kumemi numisidel ka tena ruei o-o

viomijeni nei, maka nuvokar niado tai leleio. Mia bior jau naruei kober ka kiniou jibe na, bo, kiniou najaaro ka rava lie kija bere vo.”

<sup>6</sup> Ana nalo aba amila jakiiio napano Yesu berenio, mia amiilo ka buruñara taara na niado napano bujo ea kialo suņede, mila kanalo suņede jikar ka buruboņeio,

<sup>7</sup> naruei abio nalo dolu nalo na ajua uako sesa dolu, ajuvanjuñalo kalo ka amei aijalo. Ana nalo nei abinimeĩ, ana aburu bitiran suņede ka niado nalo nei binimeĩ joomo ea buluku uako, bano-o uako juo nei abujovujo vatitigio, vaataro ka ña amadudu.

<sup>8</sup> Mia Saimon Pitere mial tenei, naio bitilubar ka Yesu ga mila tenei ea kiano buruñara mo-roano lu nei, ana minie tano ea Yesu jaano, berinavo “Tubo, kiniou nobe toro na bova ga tai. Bo laka ka kovuro den kiniou, jau kotu re vaataro ka kiniou.”

<sup>9</sup> Mia maka naio ga ve takurano, mia nalo dolu napano aju naliko ka aura nei, nalo abiniu abameneiaio toru laka ka buruñara tiniobi na niado na abokarlo,

<sup>10</sup> bija bunu Sepeti kenerinio juo nei, Yemesi naio Jone, napano naljuo amiasol Saimon amimau vio takurano, naljuo amiilo toru kanio.

Ana na Yesu mil ba Saimon, naio berinavo “Ei, jau komerou re ka vite na tibe na. Bior tikar banei, mia jau kovuru bere re niado, mia jau kotomã kovuru tomu nalo amei atakisor kiniou.”

<sup>11</sup> Ana nalo abinimeĩ bereio, aburu kialo uako nalo nene abauro bereio, mia maka bunu ala

titai, mia ajuvan kialo saba nalo biniu ju bo ga jibe na, ana ajakisor Yesu abano.

*Yesu mieliel ka toro na bar burumieni tai  
Mataiu 8:1-4; Mak 1:44-45*

<sup>12</sup> Ana iorou kanio, ea bogo tai, ana Yesu joa komeli na vio na tai, ana toro tai mialio, binimei ka naio, napano toro nene, mieiano na burumieni mila tanea niabene-e mia mila bulagio laka. Naruei naio binimei mijoru ea Yesu jaano, jegi banio, bika jikili denio berinavo “! Tubo! Kiniou nomoneaso jikili ka jau komijikia kalarur kiniou bereio, mia ver jau komijamo, kiniou nejidom nevikaso ka jau kalakon kiniou ga.”

<sup>13</sup> Mia Yesu maka rienien ka tokol kiano menko nene, mia midu jumano joaio, naio berinavo “Nao, kiniou nejidom komeravo.” Mia vaarakurano ga niabene meravo, burumieni nei mapmapvo denio.

<sup>14</sup> Ana na Yesu berkanio, berinavo “Komijog, jau kava koverii re tenei ka toro tai vo, mia vonganei ga jau kejaka kava kesel ea toro lu ka naio riia veveso mia mijikia riverial niabemo meravo ruei. Karina monoka kava kolotu van Atua a keisebi sida na kanamo lakoniano, tavukia nama Mosis naio ber monoka alaio.”

<sup>15</sup> Yesu naio ber toro nei naio riva riverii re vite nei, ana deio ga, maka vesiou ana ajuma aberverii Yesu banbano-o, ba bokar vio reraio biniu, mila ana tiniobi na toru aju abinimei ka ajog kiano iliano nalo, a ajidom ka rilarrur kialo mieiano nalo.

<sup>16</sup> Mia ka bogo nalo nene, Yesu jomña miel batavio ea tomu nalo bunu, naio jomña janea vio yauo, bolkouo ban Atua.

*Yesu mijikia biekokoa kariano*

*Mataiu 9:1-8; Mak 2:1-12*

<sup>17</sup> Mia ka bogo tai, ana Yesu jomña berlogloglo, mia Varisis tai naliko naverloglogiano na tuboiano ajumña ajutano ea vio nei, napano nalo abe nalo na komeli dolu nalo na tanobuku na Kalele bija Yutea, a tealo ajuvan vio Yerusalemo abinimei. Ana ka bogo na, Atua kiano moroano jo binimei toru nonovio ea Yesu, mila ana naio mijikia milarur tomu na mieiano nalo.

<sup>18</sup> Ana tom tai aþier toro na mieiano tai binimei, napano niabene biniu mñaro, mia nalo aþier binimei, naio mon ea ga mñano jogu. Ajidom adu naio riva joomo rimon vaataro ka Yesu,

<sup>19</sup> mia amial tiniobi toru jo joomo ruei, mia vio nene telisu laka, maka ajikia adu kialo bilbilu rivano. Naruei amidu naio abavin ea yimo, ana amijag bulag vodobi mave memedu ka vio na Yesu jotano loglogio, ana ajuvarvan toro nei bija mñano jogu batove ea buluvio nene ba jotano iviso ka tomu nalo, kamu kean Yesu mirano memedu.

<sup>20</sup> Mia bogo na Yesu mial vite nei, mijikia ka nalo aju abiekouo kilkili ea naio ka mia naio rijai toro na mieiano nei, ana naio berkanio berinavo “Koig, kiniou nebiekokoaso ka kiamo vovaiano nalo.”

<sup>21</sup> Mia bogo napano Varisis nalo bija naverloglogiano na tuboiano nalo amijog iliano nei, aju ajidomii kirivova-o mia, naruei nalo ajumña

abivika denlo, aberinavo “?Kei tenia m̃a jo mil niegeniege tolu na Atua siano jibe na? Atua ga takurano naio mijikia riviekokoa kariano, maka toro dolu bereio, mia tete na naio joña mil jibe na ka jo jidom ber naio naruei, naio be Atua ruei kovio.”

<sup>22</sup> Mia Yesu mijoglubar ea naio ka ajuṃa ajidomii kirivova jibe na ka naio, ana ber kalo, berinavo “?Kar venia ana tiniemiu nalo bujo ka jidomiano na kirivova jibe na?

<sup>23</sup> Ver never ka toro na mieiano nei, neverinavo ‘Kiniou nebiekokoaso ka kanamo kariano,’ ṗeli kiniou never kanio neverinavo ‘Jau kotumolu, keiel,’ ana ea iliano juo nei, tinene jikili ka averenio, a tinene naio monmaio ga. Nana berenio ‘Jau kotumolu, keiel’ naio jikili lie, bior mia kamiu kumijikia kuvitilubar ka kanaku iliano nei naio be riano ṗeli na makanio, ka napano toro nei naio jumolu ṗeli maka tumolu.

<sup>24</sup> Mia vonganei, kiniou noim̃au ka titai na mia kamiu kuveriam̃a Atua ga takurano mijikia rilaio, kanio mia kamiu kuvitilubar ka kiniou Kulorinio Kenerinio nemijev moroano. A kiniou neber ka kamiu, neberinavo moroano nene naruei naio bare ka kiniou nemijikia neviekoko kariano bunu ea yetemeriba nei. Kamiu kuvia-gago vatitigio.”

Ana Yesu ber ka namieiano nei, naio berinavo “Kiniou neber kaso, ka jau kotumolu, kojukular m̃amo jogu, jau keiel kava vonuo.”

<sup>25</sup> Mo soṗeli ga, ea mirano tomu nalo na aju amialio, toro nei naio jumolu jibe na, midu m̃ano



jogu miel batavio, ana ba vonuo napano naio miaia Atua ga naio jo bano.

<sup>26</sup> Mia bogo na tiniobi nei amial vite nei, abamenea naio toru riano, kuluniabelo p̃ili burevure biorio, a nalo ajum̃a amiaia Atua, ajum̃a aberinavo “!Uerei tom nei, riano ga, banei romial titai napano dolu laka!”

*Yesu bio Mataiu bunu, napano abio ka Livae, binimej jakisorio*

*Mataiu 9:9-13; Mak 2:13-17*

<sup>27</sup> Iorou kanio, ana Yesu miel kiki kija ga bano, naruei naio mial toro tai jom̃a jotano ea kiano vio na totanian na imauiano, joomo ea vio na m̃a barbiji veru na takis eaio. Toro nene siano tai Livai. Ana Yesu bio naio, berinavo “Jau komei katakisor kiniou.”

<sup>28</sup> Mia soṑeli ga Livai jumolu, juvan kiano im̃auano, juvan kiano saba nonovio ju bo ga jibe na, naruei jakisor Yesu.

<sup>29</sup> Karina, Livai nene miṃauka Yesu sano burum̃ara sinaniano tai ea kunuano, mia ka bogo na, tomu telabo dolu nalo nam̃a abarbiji takis bija tomu dolu nalo na jibe na, nalo bunu abinimej ajutano vio takurano naliko Yesu a kiano naiagagoano nalo ea sinaniano nene.

<sup>30</sup> Mia Varisis tealo, naliko kialo naverloglogiano na tuboiano tealo, amil niege naiagagoano nalo, aberinavo “?Bior vaio ana kumitum̃a kumisinan burukuti kamliko tomu na bova a tom na pariparilo kiri mererol na?”

<sup>31</sup> Mia Yesu naruei naio berdoṑelo, berinavo “Tomu na niabele jikili bo, maka m̃a tiniel tii

ka m̃a avan ea toro nam̃a mir̃auka mieiano, mia tomu nam̃a amijogjog mieiano, nalo naruei ajidom naio toru.

<sup>32</sup> Kiniou maka nemei ka novio nalo na ajum̃a aber amemedu ruei kamu ea Atua mirano ka atakisor kiniou, mia kiniou nebinimei bior tomu na bova jibe ka nalo na naruei, ka aviliglo rivior kialo vovaiano nalo.”

*Navikadeniano tai tivelinio ka atuvan sinaniano*

*Mataiu 9:14-17; Mak 2:18-22*

<sup>33</sup> Naruei nalo abika vikadeniano tai den Yesu, nalo aberinavo “Jone Baruei kanano naiagagoano nalo ajum̃a abokar jikili bajago nam̃a vatelabo, ajum̃a ajuvan sinaniano kam̃a abolkouo ban Atua, a Varisis nalo bunu ajum̃a amilala jibe na. ?Mia bior vaio ana kanamo naiagagoano nalo maka atum̃a alalaio?”

<sup>34</sup> Ana Yesu berdoḡelo, berii naio bija kiano naiagagoano nalo, jibe ka napano amijog bo laka ka bogo na naio jo naliko, ana mia ajog rivova iorou ka bogo na ver naio taluvo denlo. Naio berinavo “?Bogo na toro na soriano naio jo kean ea jokoluolu naliko kiano bilbilu nalo, kuberiam̃a mia amijikia atuvan sinaniano na jokoluolu nei to, asenio re? Peli ga.

<sup>35</sup> Mia ve bogo tai rimei napano mia avurular toro na soriano nei denlo, mia ka bogo na naruei mia nalo amijikia atuvan sinaniano bior amijog bova toru kanio.”

*Vite moruo a vite vou*

<sup>36</sup> Bajago nam̃a ajuvan sinaniano na, naio be bajago moruo tai na kulo Ju nalo kanalo lotuano,

mia Yesu jidom rila rimeravo vanlo ka bajago moruo nalo na jibe na, maka ajikia atusol vite vou nalo namã naio jomã berloglog kalo. Ana naio beri jamerijiano tai kalo. Naio berinavo “Jau maka kejikia kavar niati kulumãarauo tai na be terivou, kejedepẽ lario niati nene tai, ana jau kotulukoko ka kulumãarauo na be terimoruo ka toko vio na burupẽ be bulukuti eaio. Ver tibe na, jau komijedelar kule ga niakulumãarauo vou nene kurano ga, a niati nene, mia keial ve kirivova-o mia.

<sup>37</sup> A jau maka kejikia koison m̃arjuñelm̃elu vou napano jomã jarabujo kia ga vo rivan ea kulukuti nani napano be terimoruo namã amison m̃arjuñelm̃elu vatelabo ban ea ruei. Ver jau kala tibe na, mia m̃arjuñelm̃elu vou nei riyukuio, mia rila kulukuti nei saburu, ana mia m̃arjuñelm̃elu nene riio kule ga na, mia bati nene bunu rimej rivova.

<sup>38</sup> Mia m̃arjuñelm̃elu vou, monoka jau koison rivan ea kulukuti nani na be terivou bunu, na jikili bo, naruei komijikia kodu vatitigio m̃amo m̃arjuñelm̃elu to rivu eaio.

<sup>39</sup> A bunu, bogo namã tomu nalo ajumã amunu m̃arjuñelm̃elu na amim̃auka jiou kija ruei, mia asaaro re bunu ka amunu m̃arjuñelm̃elu vou napano amim̃auka vonganei ga, mia monoka averenio m̃arjuñelm̃elu moruo nei naio jesei kiano vo.”

## 6

*Yesu be tubo ka Legiano Lu  
Mataiu 12:1-8; Mak 2:23-28*

<sup>1</sup> Naruei ka legiano tai bereio, napano naio be Legiano Lu, Yesu naliko kiano naiagagoano nalo ajumã amiel abano, mia kanalo m̃arabo naio ba jel bure tiniavio na kon. Amiel jibe na naruei, mia naiagagoano nalo jijerlo naruei ana nalo ajavo bulag m̃arati tealo abal kon avona bisi ajenio.

<sup>2</sup> Ajumã amila jibe na, mia Varisis nalo tai ajua vio na ka bogo nene, napano aju amial Yesu nalo, naruei nalo aberinavo “!Ai, bior vaio kumitu kumila im̃auano na ea Legiano Lu jibe na? Jibe na, kamiu kumitu kumilakorov kanado tuboiano ga na.”

<sup>3</sup> Ana na Yesu berdoṗelo, naio berinavo “?Ii, ṗeli jibe na kovio, ana kamiu maka kuvuluku ea Iliano Lu bogo tai vo, ka vite nalo namã Parinio tubo Teviti re nua jomã milαιο? !Kamiu kumijikia rui tena! Naio naliko kiano tomu nalo jijerlo toru laka,

<sup>4</sup> naruei naio ba joomo ea Atua kiano Yimo Lu, mia midu joko lu namã tuboiano berenio kulo lu ga nalo amijikia asenio, mia Teviti nalo ajenio.”

<sup>5</sup> Ana Yesu ber kalo, naio berinavo “Kiniou Kulorinio Kenerinio, kiniou naruei nebe Tubo ka Legiano Lu, mia nemijikia neverenio venia na memedu ka mia alaio ea Legiano Lu, ṗeli na venia na maka rimemedu ka mia alaio re ea Legiano Lu.”

*Yesu mieliel ka jumevuluku tai ea Legiano Lu  
Mataiu 12:9-14; Mak 3:1-6*

<sup>6</sup> Ana ea Legiano Lu dolu bereio, Yesu ba ba joomo bereio ea yimo na volkouano, mia naio berlogloglo. Mia ka bogo na be toro tai bunu

jo joomo napano jumãano tivelinio vameruo be jumevuluku.

<sup>7</sup> Naruei naverloglogiano na tuboiano nalo bija Varisis nalo, napano tiniel jer Yesu ruei, aju vaataro ka naio ka bogo nei. Nalo ajumãa abitikuku vatitig bo ka naio ka alavon ka aleal bajago na bova tai eaio, jibe na naruei ajidom aial ka mia rieliel ka jumevuluku ea kialo Legiano Lu nei ðeli na mia rila re.

<sup>8</sup> Mia Yesu mijikia batitig bo ruei venia napano jo joomo ea kialo jidomiano nalo, naruei naio mil ban kema neibano, naio berinavo "Jau kotumolu, komei, kotu mave ea vio nei beamu vo," naruei toro neibano jumolu bano.

<sup>9</sup> Ana na Yesu bika den nalo neibano aju nei, naio berinavo "?Kiado tuboiano ber kito romijikia rala venia ka Legiano Lu nalo? ?Naio berenio bo ka kito rala tena bo ðeli na bo ka rala tena bova? ?Naio ber bo kanio kito ralarur kulorinio, ðeli na bo kanio rouebin toro rimãaro?"

<sup>10</sup> Ana Yesu barðilig, naio bitiilo abiniu jeliviv, avona bisi ana na naio ber ka toro neibano bereio, berinavo "Jau kovitirii jumãamo vonio." Mia monloglog bogo neibano ga toro nei naio mila jibe na, mia jumãano binimeis bo vatitigio bereio.

<sup>11</sup> Mia Varisis nalo tinielo kiri mimi, bano-o mãa tinielo bitunu mia bitunu vatitigio laka, naruei nalo abava tavio aber vonvon ka mia ala tumãabe ka Yesu.

*Yesu bitiri bulagio kiano naiagagoano duelimo  
ba juo*

*Mataiu 10:1-4; Mak 3:13-19*

<sup>12</sup> Ana iorou ka bogo dolu bereio, Yesu jaluvo denlo ban ea burusuku na toru tai ka tomã rivolkouo van Atua, naruei naio jo mila jibe na ea vio nene bano mia viomijeni konio garuei.

<sup>13</sup> Ana kavijo nene naio binimei bere, bio kiano naiagagoano nalo abinimei vio takurano ea naio, mia ea nalo nei naio berial nalo duelimo ba juo, napano bitiri bulaglo, berenio nalo nene naruei nalo abe atevi.

<sup>14</sup> Mia duelimo ba juo neibano, sialo nalo ajibe nei:

Saimon napano Yesu midu sio dolu ban ber

Pitere,

a Andru, na naio kuruano,

a Yemesi,

a kuruano Jone,

a Vilip,

a Bartolomio

<sup>15</sup> a Mataiu,

a Tomas,

a Yemesi, napano Alveas kenerinio,

a Saimon, nanua m̃a mila poletik, jidom ka rijil bulag kulo Romo,

a Jutas, na Yemesi kenerinio,

<sup>16</sup> a Jutas re Kariot, napano karina naio jiveluku ka Yesu.

*Yesu joã mioliolu a mieliel ka namieiano nalo  
Mataiu 5:1-12*

<sup>17</sup> Mia Yesu buru atevi nalo neibano abatove bereio, ana amileal vio vodobi tai, ana aba ajaiao. Ana ka bogo na, vio bujo ka Yesu kiano naiagagoano nalo miroano dolu nalo bunu, naliko burumãara tiniobi nalo na komeli dolu na vio Yutea, a kulo Yerusalemo bunu bija bunu

tomu na vio Taia a tom na vio Saiton napano ajumormolu den kialo vio rove yako ea tei na toru abinimei.

<sup>18</sup> Nalo nei abinimei ka ajidom ajog Yesu kiano iliano nalo, a bunu ajidom ka naio rieliel ka kialo namieiano nalo. Naruei Yesu milaiilo jibe na bano-o, ba bokar bunu tomu naña niadu jualo ña mila lelanlo vururu.

<sup>19</sup> Tomu nalo miroano laka, mia abiniu ga ajidom atokol Yesu, ka avokar kija buruñara moroano naña amial joña miyotuba ea naio, napano ña jo mila batitig tomu nalo miroano ruei.

*Yesu kiano verloglogiano nalo*

<sup>20</sup> Ana na Yesu joña bitii kiano naiagagoano nalo nene, karina naio berlogloglo, naio berinavo:

“Kamui naña kubitilubar ka ña kube talimñasa, ilivuiano toa kamui, bior kamui naruei, Atua naio be Parinio Tubo ka kamui, mia naio vitikar kamui.”

<sup>21</sup> “Kamui naña jijer kamui vonganei, ilivuiano toa kamui, mia kamui kuvijog ka kamui kubinimei kuvujo vatitig ka vite novo nalo.

Kamui naña kamui kumituña kumiteg vonganei, ilivuiano toa kamui, mia kamui kumijikia kuvisaaro.”

<sup>22</sup> “Kamui naña tomu nalo maka asaaro ka kamui, a napano ña maka asidom kamui, a napano ña amil niegeniege lelan kamui, a napano ña abuku bulag siemi nalo aberinavo kamui tomu na kirivova ga,

nina bior kamiu kube kiniou Kulorinio Kenerinio kanaku tomu nalo, ilivuiانو toa kamiu bunu.”

23 “Ka bogo nalo na jibe na, kamiu kuvisidom bijovijon re, mia kuvitatabujo vija saariano, bior ajuña amila lelan kamiu ea ga bajago na nanua ña korobilo nalo amilaio ban naverialiano nalo re nua. Mia naio bo ga, mia kamiu kuvijev buruñara ijaiano nene ea vio mave.”

24 “Mia kamiu tomu na sanibaiano mia rivova ve toru laka van kamiu, bior kamiu kubar kenemiu jogvuiano a kenemiu saariano na kenemiu meuliano nabo na ruei ea yetemeriba nei.”

25 “Mia kamiu naña mabomiu bujo batitig ruei jo, mia ve kirivova laka rivan kamiu, bior mia siser tanea kamiu ve toru laka.

A kamiu napano kumituña kubital banei kia ga vo, mia rivova laka rivan kamiu, bior mia kamiu kuvijog rivova ve toru laka mia kuviteg ve toru.”

26 “Mia kamiu monoka kuvitikar vatitig bogo napano tomu nalo aju amiaia siemiu. Verver tibe na, maka rivu ka kamiu bunu kuvisidomii kuver kubo, bior napano naverialiano sibusibiano re nua, kiado tormoruo nalo, ajuña amiaia sialo, mia Atua bitiilo abova ga, naruei naio mije vironiano banlo.”

*Yesu berii tinietiiano na uolu nalo  
Mataiu 5:38-48, 7:1-5*



<sup>27</sup> Ana na Yesu berenio, berinavo “Kamiau namãa kumijoglubarbar kanaku iliano, kiniou neber ka kamiau, neber: Monoka kito rosidom kanado uolu nalo, a monoka rovijuku rivu ka nalo namãa maka asidomii kito,

<sup>28</sup> a monoka reilivu ka nalo namãa amiolua kito, a monoka robolkouo kalo namãa ajumãa amila kiki kito.

<sup>29</sup> Verenio toro tai rujuba kulbibimo tivelinio, monoka jau kovilig kulbibimo tivelinio vanio ka rijikia rijuba bunu, mia verenio toro tai sikili ka rivar mãmamo koti, mia kasaaro ga ka kajamo ka mãmamo soto bunu van naio rivario.

<sup>30</sup> Mia ver toro tai rivika kiamo titai, monoka jau kajamo ka rivanio, a ver toro tai rudular kanamo titai, mia jau kovika re bunu ka rudu merano bere rivanso.

<sup>31</sup> Bajago na vabe namãa jau kojidom ka tomu nalo ala vanso, bajago nene naruei monoka jau kala rivanlo.

<sup>32</sup> “Mia ver kito rotumãa tiniedo riia ga nalo na ga mãmãa ajidom kito, nina maka ve titenia, bior tomu na kariano nalo tiniel jii tomu nalo namãa aju ajidomlo mugaruei.

<sup>33</sup> Peli na ver rotumãa rovijuku rivu ka ga nalo namãa abijuku bo mugaruei ka kito, naio bunu maka rive titenia, bior tomu na kariano nalo, nalo bunu ajumãa amila jibe na mugaruei.

<sup>34</sup> Peli na ver rotumãa rajamo ka veru van nalo na ga amijikia avar meran bereio, naio bunu maka ve titenia, bior tomu na kariano nalo, nalo bunu ajumãa amilala jibe na mugaruei.

35 “Mia kiniou neber ka kamiu, neberinavo: Monoka tiniemotii kanamo uolu, a mia kovijuku rivu kanio, a mia kajamo ka kanamo veru tibe na ga, napano kosidom bijovijon re ka na naio bario, ka mia naio mijikia rivar kean bogo tai, ĩeli na mia naio rivar kean lele re bunu. Mia ver jau kotoņa kalala tibe na, kojomņa kabar bajago na karamņado, Toro na Loa laka, mia naio sian kanamo ijaiano tai na mia ve toru lie vo, bior naio be toro tai napano kiano iviso bo ga ka nalo na maka atu aver siva vanio, ĩeli na nalo na ajumņa ajidomial nalo ga bereio.

36 Ver tibe na, jau monoka tiniem riia tomu nalo tavukia namņa karamņado tinien miialo.”

*Yesu berii tibureiano na toro dolu*  
*Mataiu 7:1-5*

37 Mia Yesu mil kia ga banlo vo, naio berinavo “Mia kamiu monoka kuvitu re mņa kuvitibure mņlea toro dolu ĩeli na kuvijev vironiano vanio. Aver tibe na, mia Atua tibure laka re kamiu tibena, mia naio rije re vironiano van kamiu. Ver kuviekokoa toro dolu, mia Atua riviekokoa kamiu,

38 mia ver kuvisian titai van toro dolu, mia Atua sian vite rimei van kamiu. Mia Atua sian vite van kamiu ve toru loa nana kamiu kumisiano, mia naio sian ve miroano lie vo, tavukia namņa ajosonu ea bake, ajan kakario, amielio bano-o mia josonu batitigio bo, vite nene nalo bujo magmago ana na jibirbili. Riano, mia avar van kamiu rive verare ka ga nana mņa kamiu kumituņa kumisian ban tomu dolu nalo.”

*Kamiu monoka kuvitii vatitig kenemiu meuliano*

<sup>39</sup> Mia Yesu jomã mil banlo kia ga vo, naio ber jamerijiano tai banlo, berinavo “?Jumãbe, ver toro tai ve merebono to, naio mijikia rivuru m̃arabo ka merebono dolu ka nalo ve juo ava aiel nunu? Peli ga, mia ave juo atibirbil avatove ea bulukuþili tai na!

<sup>40</sup> Naiagagoano, naio maka to loa nana berloglog naio, mia ver naio rila kakar vatitig vite nonovio na naverloglogiano berloglogio kanio, mia naio mijikia rimei rive verare ka kiano naverloglogiano.

<sup>41</sup> Maka rivu ka kotomã koververij niamiamo na telisu na joa kuruamo mirano, mia jau maka keial kar burumãara burupati iesi na joko miramo jo.

<sup>42</sup> ?Jumãbe jau koberiamã komijikia keil van kuruamo na, kover ‘Koig, mia nelelar niamiamo na joa miramo na beamu vo’? Ver tibe na jau kojomã kobitoviton ia kia ga ka kiamo vovaiano, a jau kojomã kejibure toro dolu kiano vovaiano ga. Jau komijikia ruei ka jau kobova ga, ana jau kojidom kala van tomu nalo ka aver jau kobo ruei. Jau monoka kodular beamu burumãara bulapati iesi na den miramo beamu vo, karina mo jau komijikia kovitii vatitig niamiamo na monea toro dolu mirano.”

*Buruiesi bija m̃arati nene  
Mataiu 7:16-20, 12:33-35*

<sup>43</sup> Ana Yesu ber bunu, berinavo “Buruiesi na bo maka rijikia rivar m̄arati na bova, a buruiesi na bova maka rijikia rivar m̄arati na bo.

<sup>44</sup> Nao, jibe na naruei, napano kito rojuṁa robitilubar buruiesi nalo ka ajuṁabe ea salo m̄arati. Marati nalo na bo a naṁa jesei bo, kito maka rotuṁa ravarlo ea soro na be niononoti, makanio.

<sup>45</sup> Toro na tiniene bo, naio joṁa miobijii vite nalo na bo jua kiano iviso, naruei bogo nonovio be kiano jidomiano na bo napano jo ka mijikia jian bulagio. Ana toro na bova naio jo miobijii vite nalo na bova jua kiano iviso, naruei naio jian bulag jidomiano na bova ga. Vite venia napano bujo toru ea toro kiano iviso p̄eli na kiano jidomiano, vite na naruei mia naio toṁa rimalmaluvo bogo nonovio ea niono.”

### *Yimo juo*

#### *Mataiu 7:24-27*

<sup>46</sup> Ana Yesu ber kalo, berinavo “?Bior vaio ana kumituṁa kubio kiniou kuber ‘Tubo o, Tubo o,’ karina maka kuvituṁa kumonmonea venia naṁa kiniou nojoṁa neber ka kamiu ka ṁa kuvilaio?

<sup>47</sup> Toro na ver binimei ka kiniou, mijog ki-aku iliano, naio monoka rimonmoneaio a naio monoka rilaiio. Toro naṁa rila tibe na, naio javukia tukunu tai napano berii, ber jibe nei:

<sup>48</sup> Toro tai jo miṁauka kunuano, mia toro nene be masou laka, joṁa mikil p̄ili nene nalo bululuo batove yetano laka ka rivokar vio na borotano jikili eaio, karina mebija m̄arte nene

nalo ea bulukuṽili nalo neibano. Mia bogu na bogu va, buruṽara ueimia mieraro, mia maka rijikia rila yimo rikulkulu leleio, bior toro nene miṽaukanio, miṽauka jikili bo.

<sup>49</sup> Mia toro naṽa mijog kanaku iliano nalo mia maka toṽa rimonmoneaio, naio jibe ka toro dolu tai. Toro nene naio bunu miṽauka kunuano tai, mia naio be vovu, miṽauka jumolu ju vorvoru mave ea ga borotano, mia ṽartea nene maka rivatove rivare leleio. Mia bogu na bogu va, buruṽara ueimia binimei, mila yimo nene mijoru, burukokorovio nonovio, bova laka.”

## 7

*Toro na toru na mira tai na Romo naio monea Yesu jikili*

*Mataiu 8:5-13*

<sup>1</sup> Naruei bogu na Yesu ber bulag nonovio kiano verloglogiano nalo nene ban tomu nalo bisi, ana naio ba jouro ea bulukomeli na vio Kapeneam.

<sup>2</sup> Mo ea vio na, be natukamuano na mira na kulo Romo naio jo, mia naio be kiano toro novo na iṽauano tai mie toru laka, vaataro ga ka riṽaro.

<sup>3</sup> Ana bogu napano naio mijog ka napano tomu nalo ajuṽa aberii ka mia Yesu rimei ea kialo vio naruei, ana bio navuriṽaraboiano na kulo Ju nalo, miilalo aban ka Yesu, ka avikanio rimei rieliel ka namieiano neibano.

<sup>4</sup> Naruei nalo nei abinimei ea Yesu, aberii toro namieiano nei banio, a abika jikili banio jibe nei,

aberinavo “Natukamuano na, memedu ka jau komei keijaio.

<sup>5</sup> Be riano ka naio maka ve kito tai, naio be toro re Romo ga, mia naio be toro tai naña jidomii mñlea taara na kiado tomu nalo, a naio bunu miija kumemi toru ruei ea vio nei, napano naio miñauka kenememi yimo na volkouano. Naruei numial bo laka ka ver kajaaro ka komei keial kanano toro na mie toru neibano.”

<sup>6</sup> Ana Yesu mijamo kanio, naruei ban bijalo. Aju amiel abano, ana bogo napano aju koalabo kija kia ga vo ka natukamuano na mira nei kunuano, mia nalo amial ka tomu tealo ajumña amiel abinimei. Nalo nei natukamuano nene kiano bilbilu nalo tealo bereio, napano naio miilalo abinimei ea Yesu, ka aver kiano iliano tai kanio. Naruei abinimei aber ka Yesu, aberinavo “Toro Romo nei miila kumemi nubinimei easo bereio, naio ber jibe nei, ber naio jo mila lelanso toru laka. Naio berenio berinavo naio mial naio jibe ka napano naio maka ve toro na bare ka mia jau komei joomo ea kunuano.

<sup>7</sup> A jidomiano nei bunu mila naio mial ka maka rivu bunu ka riyotuba kaso, bior naio maka ve Ju tibe kaso, mia naio ber ga, ver jau kover ga iliano tai, mia kanano toro neibano rijog rivu bereio ga na.

<sup>8</sup> Naio mijikia ka monoka tibe na, bior naio mijikia ka kanamo iliano mije moroano. Naio berenio berinavo vite na naio jibe ka tomu na mira nalo napano ajutano yetano ka naio, napano monoka ajogkar kanano iliano nalo. Ver naio river ka tai riverinavo ‘Jau kavano,’ naio monoka rivano, ñeli na riverinavo ‘Jau komei,’

naio monoka rimei, ĵeli na riverinavo 'Jau kala tibe na,' mia naio monoka rilaido. A naio berinavo naio bunu monoka rimauka vaio napano kanano natukamuano na toru river kanio. Jibe na naruei, naio monea ka ver jau kover titai ga, mia monoka tibe na."

<sup>9</sup> Telikiti na Yesu mijog iliano nei, naio miilo toru ka natukamuano nei kiano jidomiano, a bunu naio jaaro toru kanio, naruei mil ban tiniobi nalo napano ma aju naliko ka bogo nei, berenio berinavo "Kiniou neber ka kamiu, ka kiniou maka neleal leleio toro Ju tai napano naio tumolu tu sikili ea kiniou tibe ka toro nei."

<sup>10</sup> Mo iorou kanio, nalo nene aban bereio ea natukamuano nei kunuano, mia amiilo ka napano amial toro na mie neibano naio binimej bo nonovio bereio ruei jo.

*Yesu burumeulia taanou tai kenerinio meaku sumano den mariano bereio*

<sup>11</sup> Ana iorou kanio, maka vesiou, ana Yesu miel ba bokar markomeli dolu tai, siano Naeni, a jibe ka titiliu, kiano naiagagoano nalo naliko kulo dolu nalo telabo ajuma ajakisorio.

<sup>12</sup> Ana tilikiti napano Yesu nalo nei aju abinimej vaatara ka morouo labo na komeli nei, amial ka tomu nalo amidu buronlo amielvei abinimej, nalo aju apier tasimaro tai ka ava ativinio. Naio napano maro ruei, naio be meaku sumano tai, napano kenieno be taanou. Taanou nene, naio maka rivar kenerinio dolu tai bereio, naio bar takurano ga neibano maro ruei.

<sup>13</sup> Mia Yesu nalo aju amial nalo napano ma aju amiel abinimej, mia bogo na kiado Tubo

mial taanou nei, naio tinien miiaio toru laka-o mia. Naruei naio ban vaataro kanio, berkanio, berinavo “Ai, jau koteg re bunu.”

<sup>14</sup> Ana Yesu binimei vaataro ka tasiñaro nei, midu jumano joaio, a nalo napano ajumã aþier ba ajumomou ga aju jibe na, maka bunu aiel. Ana naio mil banio, berinavo “Koig, kiniou neber kaso, jau kotumolu bereio.”

<sup>15</sup> Naruei m̃eaku nei naio jumolu jibe na, jo mil banlo, ana amidular naio bereio, ana Yesu jukamu kanio ba ban kenieno bereio.

<sup>16</sup> Mia bogo na tomu nalo amial vite nei, burevure burelo toru laka, mia aju abamenea Atua, aberenio aberinavo “!Uerei, burumãara naverialiano na Atua kanano tai jumolu ju iviso ka kito vonganei naruei!” A tealo aber bunu, aberinavo “!Riano ga na! Atua miyotuba ka kiano tomu nalo naruei.”

<sup>17</sup> Mia tukunuano na tenei, ajumã aber liliano banbano-o bokar tanobuku na vio Yutea, bija vio dolu nalo napano m̃a aju ga vaataro kanio.

*Jone Baruei miila kiano naiagagoano nalo abinimei ea Yesu*

*Mataiu 11:2-19*

<sup>18</sup> Ana ea bogo na, Jone Baruei naio joa yimo na tetavokoiano ruei, ana kiano naiagagoano nalo abinimei ajukunu banio ka vite nalo napano m̃a Yesu joã milaio.

<sup>19</sup> Naruei Jone mil ban kanano tom juo, naio miilalo aban ea kiado Tubo, ka ava avika vatitig denio, ka naio be Naverikariano na, namã aju rorea ka mia rimeï, þeli na maka ve naio.



20 Ana amiel ka amei aial Yesu, mia bogo napano amileal naio, abika jibe nei naruei denio, aberinavo “Kenememi toro na toru nei Jone, jidom rijikia juñabe? ?Jau kobe toro na nanua mña aberenio ruei aber ka mia toro na toru tai rimei ve kiado navuriñaraboiano, ðeli na jau maka kove naio vo, mia monoka kumemi nuviturorea kiano vo ka mia toro nene naio rimei?”

21 Mia memedu ka bogo napano abinimei ka avika vikadeniano nei, Yesu jomña mieliel ka tomu na mieiano nalo, a jomña mijil bulag niadu nalo denlo, a jo mila merebono nalo miralo abinimei abo bereio, ana Jone kiano naiagagoano nalo amial vite nalo nei.

22 Naruei Yesu berdoþe vikadeniano nei, naio berinavo “Kamiu kuan bereio kuvoru ea Jone, ana mo kuverial vanio vite venia napano kumialio ðeli kumijogio ea vio nei. Ajibe ka vite nalo namña Naverialiano Aisea berial nua ruei, napano berinavo:

‘Merebono nalo, vonganei amial vatitig vite bo bereio ruei,  
 a javuluku nalo, vonganei nalo amiel bo bereio ruei,  
 a tomu nalo napano burumieni milalo, vonganei niabelo binimei meravo bo ruei,  
 a nalo na abe bulubau, vonganei tilinielo bo bereio ruei,  
 a tomu nalo na añarmño, vonganei amemeul bereio ruei,  
 a talimñasa nalo, vonganei neberial Ioluano Vou banlo ruei.’

<sup>23</sup> Mia kamiu kuva kuverial ka Jone bunu, kuverinavo "Toro napano ver maka leleio kiano jidomiano riveve juo ea kiniou bogo tai, ilivuiano toa naio."

*Yesu berii Jone Baruei*

<sup>24</sup> Ana bogo napano Jone Baruei kiano na-iagagoano nalo ajuvan ka avan bereio, Yesu berii Jone nei ban tomu nalo napano aju naliko, naio berinavo "¿Bogo naña kamiu kubatavio ea vio yauo na beamu, kamiu kuban ka kuvial venia? !Maka tinieku ka kamiu kuban ka kuvial buruburi naña jegi jomã miuvuio ðiligviligio!

<sup>25</sup> A maka tinieku bunu ka kamiu kuban ka kuvial toro na toru tai napano ña miya kulunãarauo na kirinovo a napano joa meuliano nabo, bior tomu nalo na jibe na maka ajikia atua vio na kiriniagiago jibe ka vio yauo na, mia nalo dañariga ajujua yimo nabo na be tubo na tortoru nalo kunualo.

<sup>26</sup> ¿Makanio, mia kiniou tinieku ka kamiu kubatavio ka kuvial naverialiano tai, inau? Nina bo na, mia kiniou neber ka kamiu, Jone naña kamiu kubatavio ka ña kumialio, naio loa laka, naio jovulu naverialiano nalo re nua,

<sup>27</sup> bior Atua berii naio ea kiano Iliano Lu ruei, naio berinavo

*'Kiniou nemiila kiaku atevi na binimei jukamu kaso, ka rila vatitig kiamo ñarabo.'*

*Malakai 3:1*

<sup>28</sup> "Riano neber ka kamiu, ka ea yetemeriba nei, Jone Baruei naio loa laka ka kulo dolu nalo abiniu. Mia nalo nonovio napano mia amei jouro ea Atua kanano navenatuboiano, riva rivokar

toro na maariano kalo nana jotano laka garuei, nalo na abiniu nalo loa laka ka Jone, napano mia avar Atua kiano ilivuiano nalo ve toru loa tovulu naio.”

<sup>29</sup> Mia bogo na aban amijog Jone Baruei jo mi-oliolu, berial m̃arabo na Atua ka ajikia aviliglo, mia tomu na bova telabo, ba bokar tomu na takis bunu, amial ka m̃arabo nene be riano, ana abiliglo ana Jone baruei ealo.

<sup>30</sup> Mia kulo dolu nalo, jibe ka Varisis bija naverloglogiano na tuboiano nalo, abilig taakalo ka m̃arabo na Atua naio mila ka ajikia aviliglo ka naio, ana Jone Baruei naio maka rivaruei ealo.

*Yesu naio mil jikili ban tomu nalo ea kiano bogo*

<sup>31</sup> Mia Yesu berii kulo m̃arou nalo nei ka bogo na, naio berinavo “?Mia kiniou never iliano na vabe na mia mijikia rivokar tomu re banei kialo bajago, ka river nalo tomu na ajum̃abe?

<sup>32-34</sup> Vite nonovio na Atua mila ka rilavonio rivu van kamiu, mia kamiu maka ku-visidomio ga, mia kumil niegeniege naio ga biorio. Bior bogo napano Jone naio binimej, naio jom̃a monodulu ka m̃a bolkouo, a naio bel ka m̃arjum̃elm̃elu, mia tomu nalo amial jibe na, nalo ajum̃a amilia naio aberinavo ‘Tete na sim̃aro juai.’

“Mia bogo na kiniou Kulorinio Kenerinio nebinimej nojo, nejinan batitig bo a nomunu batitig bo, naruei amilia kiniou, aberinavo ‘! Keal, tete na naio be toro nam̃a jinano m̃ele, a naio be toro nam̃a munu m̃elea m̃arjum̃elm̃elu, a

napano kanano bilbilu nalo, nalo abe tomu namãa abarbijii takis a tomu na abova!’

“Bior vite na naruei, kiniou nemial kamiu tomu na vio banei napano kamiu kumitibe ka kiritete nalo, napano ver ajuãa amiijeja ea vio yauo na komeli, mia nalo aviovio aiagiaga van kialo bilbilu sesa nalo, averinavo ‘!Oi, kamiu kubova na! Ver kumemi numituãa numue bulaiu, mia kamiu maka kuvisidom kuvolu rivija kumemi, ðeli na ver kumemi numituãa numiou ka iou na mãariano, mia kamiu maka kuvisidom kuviteg vija kumemi!’

<sup>35</sup> “Nina naruei, tomu nalo maka asidom Atua kanano mãarabo nalo, mia kirinãarati novo napano maluvo ea toro kiano meuliano na jo jakii Atua kiano mãarabo, rila rimeravo ka mãarabo na naruei naio be mãarabo na masouano napano be riano.”

*Tira tai ber aua riano bior kiano bajago va nalo*

<sup>36</sup> Mia Varisis nalo tai kalo, siano Saimon, naio berinavo naio jidom rimãauka Yesu sano sinaniano tai, ana Yesu ban ea kiano vonuo, a naio ba jotano ka asinan.

<sup>37</sup> Ana ea komeli na, be tira tai napano jo naio mila bajago miroano na kirivova laka, naruei naio mijog ka napano Yesu ba jo jinano ea Varisis nei Saimon kunuano. Naruei tira nene bitilubar kiano kariano, mijog kirivova toru laka, naruei naio mijog ka monokanio riva rial Yesu, ana naio midu kanano bauei na bonotanunu nabo tai, naio midu binimei ea yimo nei.

<sup>38</sup> Mia Yesu mijoru mon ka merikono ka sinano, naruei tira nei binimej jumolu ju iorou ka naio ea jaano, napano jogumirano miou jibirbili bavatove ea Yesu jaano. Jogumirano nei jomã jekon Yesu jaano jibe na, naruei naio bar burutili vijinio mã na, naio jomã miolkono ka Yesu jaano, a naio mije kulbibinio tivelinio mon mave ea Yesu suvajaano, avona bisi ana na miyon bonotanunu nei eaio.

<sup>39</sup> Naruei Varisis neibano miog Yesu binimej ea kunuano, naio jomã bitii vite nei, naruei naio jomã tiniene bova kanio kija. Naio jomã jidomii jibe nei, berinavo “Verenio Yesu na naio be naverialiano riano tai, p̃eli mia rijikia batitig ruei ka tira na naio be tira na kariano mugaruei jibe na, mia naio rijikia re rijamo ka naio tokol jaano lu na. Mia naio mijamo ka ga naio ka rila tibe na, kiniou maka bunu nejikia vatitig naio naruei.”

<sup>40</sup> Mia Yesu mijikia kiano jidomiano, naruei berdoŝe banio, berinavo “Saimon, kiniou nejidom never kiri iliano tai ve telisu vanso beamu vo.”

Ana Saimon berdoŝe berinavo “Bo ga, Naverloglogiano. Jau komijikia koverenio.”

<sup>41</sup> Naruei Yesu berdoŝe jibe nei banio berinavo “Toro tomoruo tai, mia tomu juo amila jabue ea naio. Ea naljuo nei, tinene kiano jabue toru, mia tinene, naio kiano jabue burutomoruo laka.

<sup>42</sup> Ana ea bogo na ka avulu meran bereio jabue nalo nei, mia abe juo maka ajikia avulu meran bereio, naruei toro tomoruo nei tiniene mialo abe juo, naio biekokoalo abe juo ka kialo jabue

nonovio. ?Mo bior vite na, tom juo nei na vabe nene na naio monoka tinienriia m̃lelea toro tomorrowo nei?”

<sup>43</sup> Ana Saimon berdoṽe ban Yesu, naio berinavo “Kiniou maka nejikia, ṽeli na kanano jabue burutomoruo laka kovio, naio monoka sidomii naio rivu lie.”

Ana Yesu berenio berinavo “Nao koig, naio jibe na naruei.”

<sup>44</sup> Mo Yesu barṽilig naio ka tira nei, jiloglog naio ka Saimon, berinavo “Saimon, bogo na kiniou nebinimei joomo ea kunuamo, maka neial toro tai rudu uei tai rimei ka mia nemijikia nesekon bulagio niamiamo na m̃arabo den jaaku, napano javukia kanado bajago, jau monoka kalaiio. Mia jau keial tira nei, naio naruei jekon jaaku ka jogumirano, a miolkon juva ka vijinio.

<sup>45</sup> Kiniou nebinimei joomo ea kunuamo, mia jau maka kavan juṽamo vatitig rivija kiniou tibe ka nebe kanamo bilbilu nabo tai, mia jikar ea bogo na kiniou nebinimei joomo, naio midu kulbibinio tivelinio mon mave ea suvajaaku nam̃ariga.

<sup>46</sup> Jau maka kavar bonotanunu rimei ka koyon ea paripariku, mia naio mila ka jaaku ruei.

<sup>47</sup> Mia kiniou neber batitig banso, ka tira nei, kanano kariano nalo miroano laka, mia kiniou nebiekokoa nonovlo biniu ruei, ana mila na tinien jii kiniou toru laka. Mia kiniou nemial ka toro na kanano kariano maka ve toru, kiniou nebiekokoa naio, mia naio tinien jii kiniou maka rive toru.”

<sup>48</sup> Mia Yesu mil batitig ban tira nei bunu, naio berkanio berinavo “Kiamo kariano nonovio

naña kojomña kojidomii bova vururu biorio, kiniou nebiekokoia nonovlo ruei.”

<sup>49</sup> Mia bogo na Yesu ber iliano na, kulo dolu nalo napano ajumña ajinan vio takurano naliko ka bogo nei, nalo maka asaaro laka, nalo ajumña amijuvaluva tertelisu banlo, ajumña aberinavo “? Mia tete na naio jidom naio rive kei, napano jomña berenio naio mila bulag kariano na tomu nalo kanalo jibe na?”

<sup>50</sup> Mia Yesu mil ber ban tira nei vaarakurano bereio, naio berinavo “Kanamo viekouoiano milaso kobokar ioruriano ruei. Jau maka bunu kojog rivova, jau komijikia kavano ga, mia Atua kanano tumaro to vijaso.”

## 8

### *Tire nalo telabo ajakisor Yesu*

<sup>1</sup> Ana maka vesiou bereio, Yesu naio jomña mieliel bano, naio jo ba jel burevure komeli nalo na tertelisu a nalo na tortoru, mia ea vio nonovio naio jomña mioliolu, a jomña midu lilianiano vou nabo na Atua kiano navenatuboiano binimei ban tomu nalo. Mia jibe ka titiliu, kiano duelimo ba juo [12] nalo aju bija ka bogo na,

<sup>2</sup> mia tire nalo telabo kija bunu aju iorou ka nalo. Ea tire nalo nene, tealo kalo napano Yesu mieliel kalo bior niununo nalo na kirivova a kanio mieiano na jualo, jibe ka Mere na Maktala, napano nanua beamu niadu aluo ajua naio,

<sup>3</sup> bija Joana, napano naio be toro nei Kusa koano, nanua naio be toro na toru tai na imauano na Parinio tubo Erot kiano, a bija

Susano bunu. Mia nalo miroano lie vo bereio, napano nalo amijja Yesu nalo toru, mia nalo ajumãa abitikarlo ka ijaiano nalo namãa tomu nalo aju ajian banlo.

*Jamerijiano na kurukuti na uiti napano ajibirbilibi ea borotano kinkin veri*  
*Mataiu 13:1-9; Mak 4:1-9*

<sup>4</sup> Naruei ea kiri bogo tai, burumãara tiniobi na tomu nalo amoluo ea komeli telabo beve terakurano na kanalo, naruei nalo abinimei amiobijjilo jeliviv ea Yesu, naruei naio mil banlo, buku jamerijiano tai kalo.

<sup>5</sup> Naio berenio jibe nei, berinavo “Be toro tai napano ban ka rivisivisii kurukuti ea kiano tiniavio. Bogo napano jomãa bisivisii kurukuti nene abano, kurukuti tealo ajibirbilibi ea mãarabo, mia iorou, tomu nalo abinimei amiel ea abie lelanlo, a menu nalo amikiti nonovlo.

<sup>6</sup> A kurukuti tealo ajibirbilibi ea vio na be tabaþililo eaio, abitovtov soþeli, mia karina abinimei amekekeu ga, bior maka ve uei tai ea vio nene.

<sup>7</sup> Mo kurukuti tealo ajibirbilibi ea vio nanua beamu maka atekon batitig rivu teli va nalo eaio, mia iorou kanio ana þeli nana bova nei naio barboþeio miluo bereio, bisovoko toti nalo bano-o mia aňarãaro.

<sup>8</sup> Mia kurukuti dolu tealo bereio ajibirbilibi ea kiri borotano nabo tai, mia nalo amililiuo bano-o, ajakou abar mãarati nalo, bokar toromomou takurano [100].”

Mia bogo napano Yesu berenio iliano nei banlo bisi, ana naio miaga m̃erere banlo, naio berinavo



“Toro na be tiliniene, monokanio riagago vatitig ka iliano nei.”

*?Bior vaio ana Yesu jo mil jel ea jamerijiano?  
Mataiu 13:10-23; Mak 4:10-20*

<sup>9</sup> Ana iorou kanio, ana naiagagoano nalo abinimeis ea Yesu mia nalo abika nioti na jamerijiano nei denio.

<sup>10</sup> Naruei naio berdoþe banlo, berinavo “Atua naio mila jibe na ka mia kamiu kumijikia kuvileal ililuklukuano nalo na kiano nave-natuboiano.

*‘Mia ea kulo dolu nalo, ililuklukuano nalo na  
ajuluku ea jamerijiano kia navo,  
mia ajuña abitio-o mia maka avitulubarlio,  
a ajuña amiagago-o mia maka ajog lubarlo.’” Ais  
6:9*

*Yesu naio ber bisivisii nioti na jamerijiano na  
kurukuti uiti*

<sup>11</sup> Naruei Yesu ber bisivisii masosoua jamerijiano nei banlo. Naio berenio berinavo “Mo, nioti na jamerijiano nei naio jibe nei. Vite na be moti, naio be kurukuti, mia nina naio jibe kanio Atua kiano iliano.

<sup>12</sup> Mia kurukuti nalo napano ajibirbili ea mñarabo, nina naio jibe kanio napano tomu nalo amijog iliano nei, a kurukuti novo nei ajibirbili ban ea kialo jidomiano nalo. Mia Parinio Simaro nei naio binimeis bar bulag iliano nei bereio den kialo iviso nalo, ka rila amonea re bunu, a ajikia re avokar ioruriano.

<sup>13</sup> “Dolu, nina kurukuti nalo napano ajua tabaþilio, mia nina jibe kanio tomu nalo namña amijog Lilianiano Vou na bo nei, mia nalo

amijeivio, ajaaro kanio, mia jibe kanio napano maka ve salo bati na bo. Nalo amonea ka bogo bulati ga, mia verenio ve bogokouo, ĩeli na juboluboiano rimei, mia nalo ajoru bereio ga.

<sup>14</sup> “Dolu bunu, nina kurukuti nalo napano mña ajua vio napano be teli na bova eaio, a nina jibe kanio napano tomu nalo na amijogio, mia bogo namña aju amiel abano jibe na, mia ajidom yebekavo toru ea kialo meuliano, mia ajidom mñlea puruveru, a nalo tiniel jii mñlea serevuiano nalo na yetemeriba nei. Bajago nalo na abinimei jibe ka teli na bova tai namña muekolo, ka mia rila ana na mia nalo ajikia re avar mñarati napano meruo bo ea kialo meuliano nalo leleio.

<sup>15</sup> “Mia nana maariano, nina kurukuti napano ajua borotano nabo, nina javukia napano tomu nalo namña amiagago ka Lilianiano Vou nabo nei, naruei nalo amije batitigio monea kialo iviso nalo, abokario jikili vatitig bo be riano. Kulo novo nalo na jibe na, nalo ala kialo jidomiano nalo ve terebievi, naruei nalo ainñau rimemedu rivanvano-o mia avar mñarati na Ioluano Vou nei ea kialo meuliano nalo.”

### *Jamerijiano na yulu*

#### *Mak 4:21-25*

<sup>16</sup> Ana Yesu ber bunu, berinavo “Kito tomu nalo, verenio kito ravar yulu rimei, mia ve re tai napano roduvanio sel tano ka basaro ĩeli na vite na jibe na. ĩeli ga, kito reive takilele mave ga ka rila tomu nalo na ver amei joomo aial ka napano vio merera bo.

<sup>17</sup> Mo, na Atua kanano navenatuboiano naio jibe ka yulu nei, napano vonganei jomña mal-maluvo ea kito ka rudulii vite nonovio. Vite nonovio napano ajuluku aju, a ililuklukuano nalo, mia nalo monoka amalmaluvo ea vio medave ka tomu nalo avitilubarío.

<sup>18</sup> Kamiu monoka kuviagago vatitig ka kanaku iliano nalo, a kuvilavon ka kuvísidomii vatitigio. Toro napano be kiano saba miroano rui, mia naio rivar rivan lie vo ve telabo laka, mia toro napano maka kiano saba, mia rila luvuio vite vaío na telisu nei napano naio tiniene ka ber kiano rui.”

*Yesu kenieno naliko kuruano nalo, abinimei ka avurular naio*

*Mataiu 12:46-50; Mak 3:31-35*

<sup>19</sup> Ana na Yesu kenieno naliko kuruano nalo amiyotuba ka naio ka bogo nei, mia nalo maka ajikia avokar naio joomo, bior burutiniobi toru laka, mila vio telisu.

<sup>20</sup> Mia tomu nalo aber lilian iliano binimei bokar Yesu, ana aberenio aberinavo “!Ai, konomo naliko kuruamo nalo, nalo yako ajikili aju tavio, ajidom aialso beamu vo!”

<sup>21</sup> Mia Yesu berdoŕe banlo, berinavo “Nana naio be kenieku, ŕeli na kuruaku, nina nalo ga nei napano amijog Atua kiano iliano lu, a nalo ajumña amila javukia ga napano iliano nei berenio.”

*Buruñara jegi napano Yesu berbureio*

*Mataiu 8:23-27; Mak 4:35-41*

<sup>22</sup> Mo ea legiano tai, Yesu buru naiagagoano nalo, abiako ea uako tai, naruei Yesu ber kalo, berinavo “Kito ña rava tivelinio ea ueiyabo nei.” Naruei ajuvan vio, ana abano,

<sup>23</sup> mia bogo na uako jo juvan bano, mia Yesu mirano jouo toru ana monmelio. Ana iorou kanio, ana buruñara jegi tai jumolu binimei ea ueiyabo nei, mia buruñara kenieno niatuva nalo na amidon tanealo bano-o mia uako nei binimei bujo ka jumu, mia nalo amialo ka bova kitkiti ga naruei.

<sup>24</sup> Ana nalo aba abio bon Yesu, aber kanio, aberinavo “!Tubo, Tubo, vaataro ka mia kito ramadudu naruei!”

Ana na Yesu jevijo jumolu, ana naio berbure jegi bija buruñara kenieno niatuva nalo nei, naruei vite nalo nei ajuba binilo, vio be tuñaro nonovio bo.

<sup>25</sup> Ana Yesu ber kalo berinavo “?Kenemiu viekouoiano nibe?”

Naruei nalo amerou mia amerou laka, amiilo toru, ana na nalo ajumña abivika denlo bereio, aberinavo “?Toro kenia na? Naio mil ga jibe na mia jegi naio tei amijogkar niono. !Tomnei!”

*Yesu jitig bulag niadu miroano den toro Kerasa tai*

*Mataiu 8:28-34; Mak 5:1-20*

<sup>26</sup> Naruei Yesu nalo abarkor abokar tivelinio nene, napano Kalele jirarago ban eaio, nina memedu ka vio nei Kerasa.

<sup>27</sup> Mia bogo napano Yesu jabulu, bauro ea vio nei, toro na vio nei tai binimei ka rivitavo vijaio, napano toro nene simñaro nalo ajuaio. Bogobe nua ruei, toro nene naio jo jibe ga na, maka riya

kulumãarauo tai, a maka ña monmon ea yimo, mia tinien jii ka ña mon ea pakeltavo ga, ea buluvae nalo naña abar kanalo tasimãaro nalo aba amonmoneaio.

<sup>28-29</sup> Simãaro nalo nei ajumãa ajutua kiki toro nei va telabo ruei, mila na tomu nalo amilavon ka atukuku kanio damãariga, a nalo ajumãa amiorkakar ka ñarmieni, ðeli amiorkakar jaano a jumãano ka teli, mia naio jomãa mila kokorovlo ga, a simãaro nalo nei amijil deven naio binimei joa vio momãa nei.

Mia Yesu mialio, mil ban niununo va nei, jitig naio berinavo tuvan toro nene.

Mia toro nei mial Yesu, naio bio banio, a naio mijorua jaano, ana niununo neibano joa naio mil burutomoruo, naio berenio berinavo “?Mia jau, Yesu, Atua Soþi kenerinio, kanamo vaio joa kiniou? !Kiniou nobika jikili denso, ka mia jau kesian re vironiano van kiniou!”

<sup>30</sup> Ana na Yesu bika denio berinavo “?Ana siamo, kei?”

Ana na niununo va nei naio berdoþe, berinavo “Siaku be ‘Tomu na mira miroano.’ ” Naio ber jibe na, bior simãaro nalo naña aba joomo ea naio nalo miroano laka.

<sup>31</sup> Mia niununo va nalo nene nalo ajumãa abivika jikili den Yesu bereio ka mia naio rijil nalo re, naio rila lo re ava ajoru avatove yetano ea burumãara bulukuti sebi.

<sup>32</sup> Mo ea suku tivelinio na vio nei, be burumãara taara na kiribue, nalo ajumãa amiuiuo ea borotano, ana simãaro nalo neibano amiaga ban Yesu, abika jikili denio aberinavo naio rila

lo ava joomo ga ea kiribue nalo nei. Ana na Yesu mijamo ka jibe na banlo,

<sup>33</sup> naruei nalo ajaluvo den toro nei, ana nalo aba joomo ea kiribue nalo neibano. Mia soḡeli ga, kiribue nalo nene ajikiti, ajibirbili ea yabalili tai, abavatove yetano ea buruñara ueiyabo nei, amadudu nonovio ea bulu niogovu.

<sup>34</sup> Ana bogo napano tomu na abitikar kiribue amial vite nei, mia nalo bunu aburo kilkil, aban bereio vonuo, aberial vite nei, mia nalo aberial janea vio reraio bunu,

<sup>35</sup> mila ana vio bujo ka tomu nalo abinimei, ka ajidom aial kija. Mia bogo na abinimei, amial ka na Yesu naio jo, a toro namña niununo va nalo neibano aburo denio ruei, naio joña jotano ea Yesu jaano. Naruei naio miya batitig kuluñarauo nabo ruei, mia naio jo melumu bo ruei jo, maka bunu rive deden leleio. Bogo napano amialio ka napano toro nei naio binimei bo ruei jibe nei, mia nalo amerou toru.

<sup>36</sup> Mia nalo napano aju jukamu, napano amial vite nonovio, nalo ajukunu kanio ban nalo na abinimei vonga, nalo aberbisivisiio banlo juñabe ka toro nei nua niadu nalo aban ea naio, mia Yesu mila naio binimei bo bereio ruei.

<sup>37</sup> Mia tomu nalo na tanobuku nalo na vio Kerasa, nalo amial ka bova ga, naruei nalo aju ajadu jikili ka Yesu ka ajidom ka mia naio taluvo denlo, bior vite na milalo amerou toru laka. Naruei Yesu nalo abajou bereio ka avan ea kialo uako, ka nalo avan bereio.

<sup>38</sup> Ana bogo na ajumña abajou, toro neibano naio binimei balea Yesu jikili, ka jidom riva

to naljuo bogo nonovio, mia Yesu maka rijamo kanio, mia naio berkanio, berinavo

<sup>39</sup> “Makanio, bior bo laka ka kava vonuo bereio, a jau kava kover van tomu nalo, kover kalo jumabe napano Atua mila bo mia bo laka banso jibe na.”

Ana toro nei ban bereio, a naio jomãa miel jeliviv ea vio nalo na ea tanobuku na kanano burumãara bulukomeli, a naio jomãa ber bulavulag inãuano novo nei napano Yesu mila ban naio.

*Jairas kenerinio vevinio, naljuo tira tai napano jokol Yesu m̃ano kulumãarauo*

*Mataiu 9:18-26; Mak 5:21-43*

<sup>40</sup> Naruei Yesu nalo abarkor bereio ueiyabo aba tivelinio, mia burumãara tiniobi na tomu nalo aju rorea naio, mia nalo ajaaro toru ka amial naio bereio.

<sup>41</sup> Mia toro na toru tai na yimo na volkouano na kanalo na vio nei, siano Jairas, naio binimei vaatara ka Yesu. Naruei minie yetano kanio, jegi banio, baleaio ka rimeia ea kunuano,

<sup>42</sup> ka rial kenerinio vevinio, napano mie toru. Tira sesa nei, naio be toro na toru nei kenerinio takurano m̃anono ga, a kiano yuka be titai jibe ka duelimo ba juo ga [12], mia kiano mieiano binimei biloulo ruei, mila ana amial ka vaatara ka mia naio rimãaro. Naruei Yesu jumolu, ban bija toro nei abano.

Mia bogo na naio jo ban jibe na, vio bujo ka burumãara tiniobi na aju ajakisosorio, nalo ajumãa amivinkakarulo ajeliviv ea Yesu.

<sup>43</sup> Mia nalo nene tai kalo, naio be tira tai, napano kiano mieiano na monoleri mila naio ka

legiano nonovio ga, bokar yuka duelimo ba juo [12] ruei, mia maka ve toro tai napano mijikia rila rivu kiano mieiano nei leleio.

<sup>44</sup> Naruei tira nei, naio milavan naio bure tomu nalo nei, naruei mijian lilie ka naio binimej vaataro ka Yesu taakano, ana na naio jian juṁano jibe na ana jokol ṁano ikiniono kulukoti. Naio jokol Yesu ṁano kulumṁarauo jibe na, mia monloglog bogo nei ga, kiano mieiano nei bisi ruei.

<sup>45</sup> Mia kolvare ga Yesu bika, berinavo “?Kenia na jokol kiniou vonganei ga?”

Mia nalo aber “Maka toro tai tokolso,” mia Pitere bunu berkanio berinavo “?Ana Tubo, juṁabe? Tom miroano miroano laka na amivinkakarło jelifiv easo, a ajuṁa abalbaliaso.”

<sup>46</sup> Ana Yesu berkanio, berinavo “Makanio, toro tai jokol batitig kiniou nei, bior nomijog lubar ka kanaku moroano togio jaluvo ea kiniou ban ea toro nene ruei.”

<sup>47</sup> Naruei tira nene, naio bitilubar ka naio maka bunu rijikia rilavan naio, naruei naio binimej ea Yesu, napano naio merou toru bano ṁa jo memebiju ka garuei. Naio binimej mijoru ea Yesu jaano, kamu ka tomu nalo napano aju na miralo, naio ber bulag nonovio vite ea naio banio, jibe na kar vaio napano naio binimej jokol Yesu, a juṁabe napano naio binimej bo ruei ea bogo nei.

<sup>48</sup> Ana na Yesu berkanio, berinavo “Nena, kanamo viekouoiano ea kiniou milaso kobo bereio ruei. Atua kiano tuṁaro to vijaso, jau kava vonuo ga bereio.”



<sup>49</sup> Naruei bogo napano Yesu joña mil ban tira nei kia ga vo, iliano binimeia ea toro na toru nei kunuano, berinavo “Kenerimo vevinio naña na, naio bakovio ruei. Bo ka mia jau kovuru re bunu naverloglogiano na toru na rimeia, ka kala lelan kule re naio.”

<sup>50</sup> Mia Yesu bunu mijog iliano nei, ana na naio ber ka Jairas, berinavo “Jau niukniuku rivieso re, jau kavarkar tiniemo sikilia ea Atua ga, bior mia kenerimo vevinio naio rimeul bereio na.”

<sup>51</sup> Naruei Yesu ban bija toro nei ea kiano vonuo, mia bogo napano abinimeia abokar vio nene, naio berbure nalo dolu berinavo mia nalo ava joomo re naliko naio, mia naio buru ga Pitere naljuo Jone, bija Yemesi, naliko niatira sesa nei karamano a kenieno, mia nalo na ga aba joomo.

<sup>52</sup> Mia bogo na nalo aba joomo jibe na, amial ka napano tomu nalo ajuña tiniel miia niatira sesa nene ruei, nalo ajuña ajigio, mia Yesu ber kalo, berinavo “Kamiau kuviteg re rivior niatira na tibe na. Naio maka rimaro na, mia naio jo monmelio ga na.”

<sup>53</sup> Mia nalo abital mēlea ga banio, bior nalo amijikia ruei ka napano niatira nei naio m̄arodobi ruei.

<sup>54</sup> Naruei Yesu ba bokar niatira nei juño, a naio mil banio, berinavo “Kanku niatira, jau kotumolu von.”

<sup>55</sup> Naruei monloglog bogo nei ga, nalo amial ka napano niatira nei kiano meuliano binimeia bere joaio bereio, naruei naio jumolu jikilia ju, naio joña miel, ana na Yesu ber kalo berinavo bo ka adu kiri sinaniano tai vanio.

<sup>56</sup> Mia karamĥano a kenieno, nalo amiilo toru napano mila kanalo jidomiano bakovio ruei, mia Yesu ber kalo berinavo mia averial re vite nei van kulo dolu nalo.

## 9

*Yesu miila bulagio kiano naiagagoano nalo abeve juo*

*Mataiu 10:5-15; Mak 6:7-13*

<sup>1</sup> Naruei Yesu bio biroviron kiano duelimo ba juo [12], ana na naio mil batitig banlo, jian moroano banlo, mijamo kalo ka amijikia atuvulu simĥaro, a ka amijikia aieliel ka mieiano nalo.

<sup>2</sup> Naio mila jibe na ka mia naio riila bulaglo ka mia ava aioliolu ka Atua kiano navenatuboiano, a ka aieliel ka namieiano nalo.

<sup>3</sup> A iliano nabo nalo tealo napano naio ber kalo beamu vo, avona bisi ana na nalo abanio aber jibenei, napano naio berinavo “Tivelinio ka kenemiu mĥarabo, mia kamiu kuvar re titai. Mia kamiu kuvar re kenemiu nasitogo namĥa kubanio, pĥeli na kenemiu basaro, pĥeli na sinaniano, pĥeli na kenemiu puruveru, a mia kuvar re kenemiu kulumĥarauo ve juo, mia kamiu kuvar kenemiu kulumĥarauo ve takurano ga namĥa kumiya kar vonganei ka kuvano.

<sup>4</sup> “Mo vonuo na vabe na mia avurukar kamiu kuvituĥa, kuva jouro eaio, mia monoka kamiu kuvisaaro ka mia kuvitu kamliko mĥaratavo na vonuo nene, mia kuvituvan vonuo nei bogo napano mia kuvitaluvo den mĥarkomeli nei bereio.

<sup>5</sup> A ea m̃arkomeli na vabe na ver maka asidom avurukar kamiu ea kunualo nalo, mia kamiu kuvituvan ga kialo vio nene, a bogo na kamiu kuvitaluvo denio, kamiu monoka kuvijubakon bulukievi na m̃arabo na vio neibano den jaamiu nalo, tibe ka kijokijo tai, p̃eli na iliano na kirisikili tai na kenemiu banlo, ka mia avar vironiano tai napano memedu ga ka kialo bajago na bova nene.”

<sup>6</sup> Ana na naiagagoano nalo abava tavio naruei, nalo aba ajel ea m̃arkomeli nalo, nalo ajuṃña amioliolu ka Lilianiano Vou nabo, a nalo ajuṃña amieliel ka tomu nalo.

*Parinio Tubo Erot Antipas jidom bitovitonia Yesu*

*Mataiu 14:1-2; Mak 6:14-16*

<sup>7</sup> Ana ea bogo na, Parinio Tubo Erot nene bunu naio mijog kija ka vaio napano m̃a Yesu nalo ajuṃña amilaio, naruei naio jo tiniene burukokorov biorio, bior tomu tealo ajuṃña aberii Yesu, ka naio be Jone Baruei, napano naio meul bereio den nam̃ariano,

<sup>8</sup> mia nalo dolu ajuṃña aber vonvon aberinavo Yesu be tormoruo Elaija re nua, napano naio miyotuba bereio, a nalo tealo ajuṃña aberinavo Yesu be naverialiano nalo re nua nua tai, napano naio jumolu bereio den nam̃ariano.

<sup>9</sup> Mia Parinio Tubo Erot naio berinavo “Maka ve Jone Baruei na, bior kiniou nomiovlar pari-parinio ruei, mia toro nam̃a ajuṃña aberveriio na,

naio be kenia bereio?” Mo jidomiano nei mila ana naio jidom toru ka rial kija Yesu.

*Naiagagoano nalo aba amioliolu, karina na abinimei bereio*

*Mataiu 14:13-21; Mak 6:30-44; Jone 6:1-15*

<sup>10</sup> Ana naiagagoano nalo napano Yesu miila bulaglo ka ava aioliolu, nalo aborvoru bereio, naruei nalo aberial ka Yesu vite nalo nonovio napano mā amimāukanio. Ana Yesu burulo ajaluvo den tomu nalo, ajubilig telisu ea māromeli tai, siano Betsaeta.

<sup>11</sup> Mia karina, tomu nalo amijog ka aju aban ea vio nei, mia nalo bunu ajakisorilo, aban ea vio nene bunu. Mia Yesu naio jaaro ga, naio jukunu kija naliko, a kario naio berlogloglo ea tivelinio na navenatuboiano na Atua kiano, a naio mila batitig nalo namā aju ajidom toro tai ka rieliel kalo.

*Yesu bagan tomu menu jimo [5,000]*

<sup>12</sup> Mia Yesu jo naliko banbano-o, karina nalo amial ka napano mērenio jo batove nonovio, naruei kanano duelimo ba juo [12] abinimei keanio, aberinavo “Ai, Tubo, bo kanio jau kajamo ka tiniobi nei avan bereio ea kanalo vonuo nalo, pēli na ea māromeli tealō na, ka amijikia avulu salo sinaniano tealō, a ka amijikia aleal vio tai ka mia amon eaiō, bior vio nei kito rojua nei naio bova ga, maka rivu ka vio ribobogko kito eaiō.”

<sup>13</sup> Mia Yesu ber kalo, berinavo “Ee, makanio. Bo kanio kamiū ga kuvar sinaniano vanlo.”

Mia nalo aberdoṗe aberinavo “!Ajerei! Abe kumemi nubarkar ga joko sesa jimo, bija niado

na tertelisu juo. ?Peli na ver makanio, jau kojidom ka mia kumemi naruei, nuva nuvulu sinaniano rivare ka burutiniobi nalo na?”

<sup>14</sup> Mia nalo aber jibe na bior tomu nalo napano aju na nalo miroano laka, napano kulovu nalo ga abokar titai kovio jibe ka menu jimo [5,000].

Ana na Yesu ber kalo berinavo “Kamiu kuva kuver ka tomu nalo na kuver atutano beamu vo, atutano ea taara nalo, napano mia tomu veve duelimo va jimo [50] atua taara tai.”

<sup>15</sup> Naruei nalo abano amila javukia napano naio berenio, naruei tomu nalo ajutano ea taara nalo.

<sup>16</sup> Naruei Yesu bar joko jimo bija niado na tertelisu juo nei, naio jirarago bavin tiniabene, naio milivu kanio, karina burekokorovio, ana bar jian ban naiagagoano nalo ka aviovio ka tanea taara nalo nei.

<sup>17</sup> Naruei nalo ajinan banbano-o, mabolo jouo batitigio bo, a iororoti sinaniano napano ajen digio ju, nalo amisonsonlo aban ea basaro solokobaro nalo bokar duelimo ba juo [12].

*Pitere berial ka Yesu be Naverikariano memedu*

*Mataiu 16:13-28; Mak 8:27-31*

<sup>18</sup> Mia bogo tai, ana Yesu jo bolkouo naio takurano, a kanano naiagagoano nalo aju vaatara ka ga naio, naruei naio bika denlo, berinavo “?Kamiu kumitumña kumijog tomu nalo ajumña aberverii kiniou aber kiniou nebe kei?”

<sup>19</sup> Ana na nalo aber kanio, aberinavo “Tealo aber jau kobe Jone Baruei, a tealo aber jau

kobe Naverialiano Elaija, a tealo aber jau kobe naverialiano dolu nalo re nua nua tai napano meul bereio den nañariano.”

<sup>20</sup> Mo naio bika denlo, berinavo “?Mo ana juñabe ka kamiu, kamiu kumituña kuber kin-iou nebe kei?” Ana na Pitere naio berdoñe, berinavo “Jau kobe Naverikariano na Atua kanano.”

*Yesu berial kiano ñariano*

<sup>21</sup> Naruei Yesu mil jikili, ber kalo memedu, berinavo mia nalo avan re averial vite nei ka tomu nalo,

<sup>22</sup> mia naio ber batitigio bo banlo ka mia tuñabe ka naio. Naio berenio berinavo “Kiniou nebe Kulorinio Kenerinio, mia navuriñaraboiano nalo na kulo Israel nalo kialo, vija tomu na tortoru na kulo lu nalo, bija naverloglogiano na tuboiano nalo, mia avukular kiniou, monoka mia ala vite ve telabo ka ala lelan kiniou. Mia monoka auebin kiniou nañaro, mia ka bogoti ve tolu nene, mia Atua rivitirilar kiniou nemeul bereio.”

*Yesu Kiano naiagagoano naio monoka sidom iakurano ga ea kanano sidomiano nalo*

<sup>23</sup> Naruei ea bogo na, Yesu mil banlo, naio berenio berinavo “Toro napano jidom rimei takisor kiniou, naio monoka sidom iakurano ga ea kanano sidomiano nalo, ana mia naio monoka rudu kanano ñakolkolo ea legiano nonovio, jibe napano mia nodu kanaku, naruei naio takisor kiniou nañariga.

<sup>24</sup> Neber jibe na bior toro na ver sidom ridururu kiano meuliano, mia naio rilaluvu kiano meuliano. Mia toro na ver rijamo ka kiano meuliano rivior kiniou, mia naio rijev kiano meuliano bereio.

<sup>25</sup> Avona ver toro tai bokar vite novo nalo na yetemeriba nei riviniu, mia rilaluvu m̃arabo a rilaluvu kiano meuliano, naio maka rijev vite novo tai leleio.

<sup>26</sup> “Toro nañã mimou ka kulo dolu nalo miralo bior kiniou p̃eli bior kanaku iliano, mia kiniou Kulorinio Kenerinio, mia kiniou bunu noimou ea Atua mirano rivior toro nene, ea bogo napano mia nemei bereio eaio, napano mia nemei vija burum̃ara mermerano napano kanaku, a napano be karam̃aku kanano, a napano be nailiano lu nalo kanalo.

<sup>27</sup> Riano kiniou neber ka kamiu, be tomu tai ajumolu aju ea vio nei, napano mia maka ajikia añaro, rivanvano-o rivokar bogo napano mia aial navenatuboiano na Atua kanano riyotuba.”

*Yesu niabene binimei be dolu*  
*Mataiu 17:1-8; Mak 9:2-8*

<sup>28</sup> Iorou ka bogo na napano Yesu berenio iliano nalo na, titai jibe ka sude takurano barlaka bereio ruei, naruei naio buru Pitere, Jone, a Yemesi, nalo veri abavin ea burusuku tai, napano jidom rivolkouo.

<sup>29</sup> Naruei nalo abinimei abokar vio nene, a bogo nañã Yesu jom̃a bolkouo, naiagagoano tolu nalo nei amialio napano mirano binimei be dolu,

a amialio ka napano m̃ano kulum̃arauo merera laka, a amiuvu bo mia amiuvu nonovio garuei.

<sup>30-31</sup> Ana iorou, tormoruo juo nei Elaija naio Mosis, naljuo amiyotuba bija burum̃ara mi-amioiano na mermerano na tiniabene, ana na abe juo ajum̃a ajukunu naliko Yesu, napano ajum̃a aberii ka mia tum̃abe ana na mia naio monoka riva Yerusalemo, a monoka m̃aro den yetemeriba nei, tavukia napano Atua berkario ruei.

<sup>32</sup> Mia beamu, Pitere nalo nei amijog miralo jouo toru, amiyukudovo banbano-o mia amon-melio garuei, mia bogo napano ajevijo bereio, amiilo ka vite nalo nei, napano amial Yesu kiano burum̃ara miamoiano na mermerano, a amial tomu juo nei ajumolu aju bijaio.

<sup>33</sup> Naruei nalo amial ka napano naljuo neibano aju ajuvan vio ka avan bereio, naruei Pitere naio jidom ril, mia maka rijikia vaio ka mia riverenio, ana naio ber ilikodovoiano tai ban Yesu, berenio berinavo “Tubo, bo ka napano kito rojua vio nei. Bo kanio kito roim̃auka tobobo ve tolu ea vio nei, tai ve kiamo, tai ve Mosis kiano, a tai ve Elaija kanano.”

<sup>34</sup> Mia bogo napano naio jom̃a ber iliano nei, melijo tai binimej midukolo, mia bogo napano amialio ka nalo aju joomo ea melijo nene, nalo amerou binvinlo.

<sup>35</sup> Naruei amijog iliano tai miyotuba ea melijo neibano, naio berenio berinavo “Nina be kener-iku na, napano kiniou nebitirilar naio ruei. Naina naruei monoka kumonmonea naio rivu.”



<sup>36</sup> Mia bogo na iliano nei bisi, melijo bakovio, amial ka napano Yesu naio ga takurano ju naliko bereio. Iorou ka nina, naiagagoano nalo aju ajurbanin kanio ga aju, maka ava averii vite neibano amialio ka tomu dolu nalo.

*Yesu mijil lar siñaro den ñeaku tai*

*Mataiu 17:14-21; Mak 9:14-29*

<sup>37</sup> Mia ea legiano dolu nene, Yesu naliko nalo tolu nei ajuvan burusuku nei, abatove bereio, mia burumñara tiniobi na tomu nalo aju rorea ka ajidom aial naio.

<sup>38</sup> Mia bogo napano amiyotuba kalo, toro tai kalo bio jouo ban Yesu, naio berenio berinavo “Naverloglogiano, neber aiou banso, kovitii von keneriku ñeaku nei, bior naio be keneriku takurano ñanono ga.

<sup>39</sup> Niununo va tai joña binimei ea naio jibe na, mila naio miaga burutomoruo laka, a miaburusalsal bano-o ña titilevlevi bavin eaio. Tenei joña mila naio napano kirivova laka, mila lelan naio laka, a naio joña monmon ga milao, naio maka lele tuvan naio tormñaro bogo tai.

<sup>40</sup> Kiniou noburu naio ban ea kiamo naia-gagoano nalo, neber aiou kalo ka ajilar niununo va nei, naruei nalo amila von, amimñaukanio bano-o, mia abijukudeio ga.”

<sup>41</sup> Naruei Yesu berdoñe, mil banlo, berinavo “?Kamii na, juñabe jibe na? Kamii maka kuvarkar tiniemiu sikili ea Atua leleio. ?Mia kiniou monoka noto vija kamii kelvovu nalo riva rivokar nagi? Kiniou tinieku ñaro ea kamii ruei. Mo, bo ga, kovuru kenerimo nene rimeii vonio.”

42 Naruei nalo aba aburu kiritete nene binime, mia bogo napano aju abinime, kia ga vo, niununo va nei mila mēle niadua kiritete nei bereio-o mia, mila niabene memebiju a ba burukar jikili. Mia Yesu mil jikili, berbure niununo va nene, ana naio mieliel ka mēaku nene, naruei naio buru bereio ba ban karamāno.

43 Mia nalo napano amial vite nalo nei, nalo amiilo toru laka ka Atua kanano moroano na loa laka na kirinovo nei, napano mila bo laka jibe nei ban tete mēaku nei.

*Yesu berial bereio kiano māriano*

Ana memedu ka bogo na napano mā kulo dolu nalo ajumā aberverii vite novo napano Yesu milaio, mia Yesu ber iliano tai ka kanano naiagagoano nalo.

44 Naio ber kalo, berinavo “Kamīu kuvije tiliniemiu rivu ka kanaku iliano nei, kamīu kuvidu vatitigio toa kenemiu jidomiano nalo, ka mia tiniemiu ribobogia re bereio bogo tai. Nao, kiniou neber batitigio ban kamīu, Atua miila kiniou jibe Kulorinio Kenerinio, mia vaataro naruei ka mia adu kiniou navan ea tomū nalo jumālo napano mia ala bin kiniou namāro.”

45 Mia naiagagoano nalo maka ajog lubar vo venia napano Yesu jomā berii kalo, jibe ka nioti nene joluku kia ga vo, mila maka ajikia ka avitilubarīo, a amerou bunu ka avika batitig den Yesu tivelinio ka iliano nene.

*?Toro kei naio loa laka ka kulo dolu nalo?  
Mataiu 18:1-5; Mak 9:33-40*

<sup>46</sup> Mia iorou, ana baravo tai moluo iviso bure naiagagoano nalo, ka mia kei naio to mave ka nalo dolu.

<sup>47</sup> Mia Yesu mijikia kialo jidomiano nalo, naruei naio bio kiritete tai napano jo miel binimei kanio, naruei naio midu kiritete nene ji ju tivelinio ka naio,

<sup>48</sup> ana naio ber kalo, berinavo “Toro napano kiano jidomiano batove ka kiniou, mo naio saaro ka rijeve kiritete nei, nina javukia ga napano naio jaaro ka rijeve kiniou. A toro namā jaaro ka kiniou, jibe ka napano naio jaaro ka nana miila kiniou nebinimei. Nina bior nana ka kamiu napano kiano jidomiano rivatove laka, naio naruei napano mia naio loa laka ka kam nonovio.”

*“Toro na maka riverbure kito, naio joŋa miija kito”*

<sup>49</sup> Ana Jone ber ka Yesu, berinavo “Tubo, kumemi numial toro tai, napano naio joŋa mijil bulag siŋaro nalo, naio jo mijil bulaglo ea siamo. Mia toro nene, kumemi maka nuvijikiaio, naio maka ve kito tai, naruei kumemi nuberbureio.”

<sup>50</sup> Mia Yesu berkanio, berinavo “Makanio, kamiu kuverbure re naio, bior toro napano maka mā riverbure kito, naio joŋa miija kito kiana.”

*Yesu jidomial ka vaataro ka monoka naio rivavin ea vio Yerusalemo*

<sup>51</sup> Mia Yesu bitilubar ka vonganei, vaataro ka mia Atua rivuru naio rivavin bereio tini-abene, naruei naio midu vatitig kiano jidomiano

ruei ka kiano m̃arabo monoka rivavin mave Yerusalemo.

<sup>52</sup> Ana na nalo aju amiel abano, ana Yesu miila kiano atevi nalo ajukamu, aban ea m̃arkomeli tai na kulo Sameria kialo, ka ayomon vite nonovio rimemedu ka mia naio mijikia rimei iorou.

<sup>53</sup> Mia nalo na vio na, maka asidom Yesu nalo amei jouro ea kialo vio, bior nalo maka atuña tiniel tii ka aija kulo Ju nalo, napano ajuña ajel ea kialo vio na abavin Yerusalemo.

<sup>54</sup> Tilikiti napano naiagagoano juo nei Yemesi naio Jone naljuo amial ka napano nalo ajuña aberburelo jibe na, abika den Yesu, aberinavo “Tubo, kojidom nubolkouo, nuvio sebi tai taluvo ea vio mave rivatove sisen tanea nalo na?”

<sup>55</sup> Mia Yesu naio bilig naio banlo, berbure kialo jidomiano na jikili nei.

<sup>56</sup> Ana naio jukamu kalo, maka bunu ava jouro ea vio nei, mia amiel ga aban ea komeli dolu tai.

*Toro napano naio jakisor Yesu, maka rijikia siraragdi bereio*

*Mataiu 8:19-22*

<sup>57</sup> Tilikiti napano aju amiel ea m̃arabo abano, toro tai binimei vaataro ka Yesu, naio berkar banio, berinavo “Mia kiniou natakisorso, ea vio na vabe na jau kavan eaio.”

<sup>58</sup> Ana Yesu berdoḡe banio, berinavo “Kuli deden nalo abe m̃alo bulukuḡili na amon eaio, a menu nalo abe m̃alo niuku nalo. Mia kiniou Kulinio Kenerinio napano nebinimei tiniabene, maka ve kiaku vio tai, ka mia nava nomon eaio. Ver jau kajaaro bunu ka meuliano na jibe na, jau komijikia komei.”

<sup>59</sup> Ana ea bogo nei, toro dolu tai, Yesu berkanio bunu ber rimei takisorio, ana naio berdoŝe banio, berinavo “Tubo, bo ga, mia jau kajamo ka kiniou navan nevitikar kanaku tormoruo beamu vo, mia ver naio rimaro bogo tai, mia kiniou nemei bereio natakisorso.”

<sup>60</sup> Ana Yesu ber ka naio, berinavo “Jau kotuvan tomu nalo napano maka ajev meuliano vo ka mia ava ativin kanalo tomu na aŝarmŝaro. Mia jau, komei ga, rava roioliolu ka Atua kanano navenatuboiano.”

<sup>61</sup> A dolu tai bunu mila soŝeiano jibe nei, naio bika den Yesu, berinavo “Tubo, mia kiniou tulaka ga natakisorso, mia vite tai ga, kiniou nojidom ka jau kajamo ka kiniou nava never bogiano bo van nalo na ea kanaku vonuo beamu vo.”

<sup>62</sup> Ana Yesu ber iliano tai banio jibe nei, berinavo “Toro naŝa joŝa jidom melea kanano vonuo a kiano saba nalo nonovio nei, naio jibe toro naŝa jelanvu ka uako, a julaka joŝa jiraragdi. Toro na jibe na maka rivare ka rimei ve toro na Atua kiano navenatuboiano.”

## 10

*Yesu miila bulag tomu miroano ka aveve juo ava aioliolu*

*Mataiu 9:37-38, 10:7-16, 11:20-24*

<sup>1</sup> Ana ea bogo na, kiado Tubo bitiri bulag kiano naiolioluano tealo bereio. Nalo duelimo va aluo ba juo [72] abiniu, a naio joŝa jidomii ka mia rila lo ava atukamu ka naio, ava aveve juo ea mŝarkomeli a ea vio nalo napano mia naio rivarlaka ealo iorou.

<sup>2</sup> Naio berlogloglo jibe nei, naio berinavo “Be sinaniano miroano laka ju mermeruo ea tiniavio, mia tomu nalo maka ve telabo aju abarvar bijiilo binimei vonuo. Kamiu monoka kuvika sikili van boru na tiniavio nene, ka mia naio riila bulag tomu ta bunu avan ka avarvar sano sinaniano nene nalo rimei.

<sup>3</sup> Ver tibe na, mo kamiu monoka kuvidu kenemiu m̃arabo kuvano. Mia bo kanio kamiu kuvitilubar ka nemiila kamiu kuba tavio, jibe ka napano kamiu kumitavukia nunu solbouo nalo, napano kumituñã kuba tavio ka mia kuviniua burum̃ara kuli deden nalo.

<sup>4</sup> Bogo na ver kamiu kuvano, mia kuvar re siveu na kenemiu puruveru, mia kuvar re kenemiu basaro nalo, a kuvar re kulubue na jaamiu tai bereio. Mia kuviel yauo ga tibe na kuvano, kuvitukunu p̃iliṗili re ea m̃arabo van tomu nalo.

<sup>5</sup> “A bogo napano kuvano-o kuviyotuba ea yimo na vabe, vite na be moti ka mia kuverenio, kuver tibe nei, kuverinavo “Tum̃aro toa vonuo nei.’

<sup>6</sup> Ana verenio toro na toa vonuo nei naio tinien tii ka tum̃aro, mia tum̃aro neibano kuberenio mijikia to vija naio, mia verenio ve re toro tai tibe na, mia tum̃aro nei rimei ea kamiu bereio.

<sup>7</sup> A kamiu kuvitatan ea re yimo nalo, mia kamiu kuvitua ga yimo ve takurano nei ga, mia kamiu kuvisaaro ga ka kumisen sinaniano vaio p̃eli na kumunu vaio na avar rimei asian van kamiu. Kamiu kuvimou re ka kuvijev vite novo vaio napano ajidom ala van kamiu, bior memedu

ga ka toro na iñauano monoka rivar kiano ijaiano ve telisu.

<sup>8</sup> “Tibe na, m̃arkomeli na vabe na kuva kuviyotuba eaio, ver asaaro ka avitkar kamiu, mia monoka kamiu kuvisaaro ka sinaniano vaio napano mia asian van kamiu,

<sup>9</sup> a mia kamiu monoka kuvieliel ka tomu na mieiano nalo na vio nene, a kamiu kuvijikia kuver kalo, kuver ‘Vonganei, Atua kanano navenatuboiano binimei vaataro ka kamiu, vonganei Atua jo binimei ka ve kenemiu Tubo naruei.’

<sup>10</sup> “A bogo tealó mia kamiu kumalmaluvo ea m̃arkomeli tai, mia nalo asaaro re ka mia avuru kamiu kuva kuvitu kamliko. Verenio tibe na, mia kamiu kuvitakii ga m̃arabo labo kuvan na jel jouro medave ea komeli nene, a kuverial ka tomu nene nalo tibe na, kuverinavo

<sup>11</sup> ‘Yevi na m̃arabo na kenemiu vio nei, kumemi numijuba kon bulagio den jaamemi, jibe ka kijokijo tai ka kamiu kuvisidomiio. Kamiu monoka tiniemiu ribobogia re, ka vaataro ga ka Atua kanano navenatuboiano riviedu kean kamiu ruei, mia kamiu kumilkue kanio, naruei kumilaluvuio ruei.’

<sup>12</sup> “Kiniou neber riano ka kamiu, ka legiano na tibureiano, mia nalo na jibe na avar viro-niano nana jikili loa tovulu nana mia nalo na bulukomeli na Sotomo re nua mia nalo avario.”

*Yesu berii nalo nañã maka amonea naio*

*Mataiu 11:20-24*

<sup>13</sup> Naruei Yesu mil jikili ban tomu nalo ea vio tealó, berenio berinavo “!Kulo Korosin, bija kulo

---

**10:10** Iñauo 13:51    **10:11** Mat 10:7-14; Mak 6:8-11; Luk 9:3-5

**10:12** Mat 11:24, Mat 10:15

Betsaeta, kamiu kumila lelan kamiu toru liki-e mia! Ver kulo Taia vija kulo Saiton nalo aial kijokijo neibano kamiu kumialio ruei nei, mia nalo aviliglo nua ruei. Nalo maka ave kulo Ju, mia nalo aya māadabake ga a avuku bulukievi ea pariparilo ruei, nalo atutano atu tibe na ka tomu nalo avitulubar ka nalo amijog bova toru riano bior kialo kariano nalo.

<sup>14</sup> Kiniou neber ka kamiu, ea bogo na tibu-reiano, mia kenemiu vironiano tovulu napano ve nalo nei kanalo.

<sup>15</sup> “!A kamiu kulo Kapeneam, napano kubarvar ka kamiu mēle, napano mā kumisidom kumijalar kamiu ka kumitu mave levlevi, kamiu kuvitikar kamiu! Mia Atua rivuku bulag kamiu kuvatove laka ea bulukuti sebi.”

<sup>16</sup> A Yesu ber bunu ka nalo, berinavo “Toro napano verenio ka mia naio rudukar kamiu, naio jo midukar kiniou, a ver toro napano maka sidom kamiu, naio jo maka sidom kiniou, a ver toro na maka sidom kiniou jibe na, naio jo maka sidom toro na toru napano naio miila kiniou nebinimei.”

Naruei bija iliano na, Yesu miila kiano naiolioluano nalo abatavio ka ala iṃauano.

### *Naiolioluano nalo abinimei bereio*

<sup>17</sup> Naruei naiolioluano nalo nei aba amila iṃauano novo nalo telabo, karina iorou kanio ana abinimei bereio ea Yesu, napano tinielo bujo laka ka saariano ka vite nalo napano mā amilaio. Abinimei bereio aber ka Yesu, berinavo “!Tubo,



kumemi numiñauka vite nalo ea siamo bano-o bokar napano siñaro nalo bunu ajutano ka kumemi!”

<sup>18</sup> Ana na Yesu berdoḡelo berinavo “Ee, kiado iñauano jibe na naruei. A kiniou bunu, nemial Siñaro jumolu den tiniabene, amiila deven naio mijoru batove jibe ka viobijiio tai.

<sup>19</sup> Vonganei, kiniou nomijamo ka ban kamiu ruei, ka kamiu kumijikia kuvivikar maro a buruolu, a moroano na kiado uolu kiano naio totano ka jaamiu bunu, ana mia ve re titai rijikia re rila bulag kamiu.

<sup>20</sup> Mia kamiu kuvarvar ka kamiu re ka vaio napano kiniou nemijamo ka ban kamiu, napano niununo va nalo ajutano ka kamiu, mia be vite takurano ga napano kamiu kumijikia kuvujo ka saariano kanio, nina napano siemi nalo, ajirikakarlo aju joomo ea niosi na meuliano ruei.”

*Yesu ber siva ban karamñano  
Mataiu 11:25-27, 13:16-17*

<sup>21</sup> Mia ka bogo nei, Yesu bolkouo, berinavo “! Teta o, Tubo na vio mave a Tubo na yetemeriba! Neber siva banso, bior vite nalo napano ea tivelinio na kiniou, jau kobisiḡeio banlo napano kialo jidomiano jibe ka kiritete nalo ga, mia nalo napano ajidomii ka abe ñasou laka, bija nalo napano ajidomii aber amijikia vite, mia jau komilavan vite nalo nei kalo. Riano, Teta, ninei javukia ga nana jau kojidomiio.”

<sup>22</sup> A Yesu ber bunu berinavo “Karamñaku mijamo ka vite nonovio jua jumñaku ruei. Teta naio

ga takurano napano mijikia batitig kiniou ka nobe kei, a kiniou napano nobe kenerinio, kiniou ga takurano napano nomijikia batitig naio, ka naio be kei. Kiniou bija nalo napano nebijauia bulaglo abe kanaku, ka mia nesiloglog Teta kalo ka mia avarkar tinielo eaio, kumemi naruei numijikia batitig naio ka naio be karimememi.”

<sup>23</sup> Naurei Yesu barpilig ka kiano naiaga-goano memedu nalo, naio mijuvaluva banlo bare ka nalo ga ajogio, naio berinavo “Atua mila bo ban kamiu, napano kumijikia kuvial vite nalo na.

<sup>24</sup> Naverialiano telabo a parinio tubo telabo re nua napano ajidom m̃lea ka aial vite nalo na, mia maka aial kija bogo tai, a abijuku kouo ka ajog vite nalo na bunu, mia maka ajog kija leleio.”

*Jamerijiano na toro na vio Sameria tinien miia toro Ju tai*

*Mataiu 22:34-40; Mak 12:28-31*

<sup>25</sup> Mia bogo tai bereio, toro tai napano be m̃sou bo ka tuboiano, naio jidom rijukujuku Yesu ea vikadeniano tai na kirisikili, naruei naio jumolu ju, bika den Yesu, berinavo “?Naverloglogiano, verenio kiniou nesidom nalavon ka navokar meuliano napano maka ve jukuti nene, mia kiniou monoka nala tum̃abe?”

<sup>26</sup> Naruei Yesu berdoŕe banio, berinavo “?Mia kiado Niosi Lu naio ber venia ka tivelinio na? ? Jau kobulukuku komialio ber jum̃abe?”

<sup>27</sup> Ana na toro neibano berdoŕeio berinavo “Niosi Lu ber jibe nei, berinavo: Atua Soŕi

napano naio be kiamo Atua, jau monoka tiniemo tii naio, kodu naio to tukamu ea kiamo iviso momou, a ea kiamo meuliano momou, a ea kiamo sikiliano momou, a ea kiamo jidomiano momou, a jau monoka tiniemo tii nalo napano aju vaataro kaso, jau kovijuku rivu kalo, tavukia napano ña tiniem jiiso.”

<sup>28</sup> Ana Yesu berkanio, berinavo “Nao, jau kober kirimemedu tanea na. Mia ver jau kala tibe na, mia jau kovokar meuliano na kojomña kobikanio na.”

<sup>29</sup> Mia tete nei nao mijikia ka naio maka tomña rila rimemedu tibe na, mia naio jidom rila sopeiano, naio bika den Yesu, berinavo “?Ana be kei nalo napano ña ajuju vaataro ka kiniou, napano kiniou monoka nala rivu kalo?”

<sup>30</sup> Naruei Yesu berdope kiano vikadeniano nei ea jamerijiano tai, napano naio ber jibe nei berinavo: Toro tai, bogo tai naio juvan vio Yerusalemo naio jo miel batove yako Jeriko. Naruei naio jomña miel ba bokar vio kouo tai, naruei naio miilo ka taara tai na tomu nalo na vinauano, napano abiako eaio, amue tanea, naio, abar bulag nonovio kiano saba nalo, ana aburo kilkil, napano ajuvan toro nei ñariulu mijoru joa kiano ñarabo togio.

<sup>31</sup> Ana kanado toro lu tai, naio bunu jo miel naio iorou kanio ea ñarabo nene, ana bogo na naio binimei vaataro kean toro neibano, naio ju pilig kanio jel ea ikimñarabo tivelinio ka ga bano, naio miel barlaka denio ban ga.

<sup>32</sup> Ana iorou kanio, ana toro dolu tai miel binimei. Naio be Livai nalo tai na, napano ajumña

amila iñauano nalo nonovio ea Atua Kunuano Lu, mia bogo na binimei bokar toro nei, naio bunu maka sidom rijai naio, naio miel ga barlaka ban ea ikiñarabo tivelinio ban ga.

<sup>33</sup> Mia iorou ka bereio, toro dolu tai, napano naio jo miel ea kiano burutili ñarabo na, naio binimei. Naio be tete re Sameria tai, naruei jibe napano romijikia, nalo nene abe bilbilu va toru naliko kito kulo Ju nalo. Mia bogo na naio binimei bokar vio na, mial toro na ñariulu mijoru mon ea ñarabo, mia tinien miia naio toru.

<sup>34</sup> “Mia naio binimei vaataro keanio, ana jekon batitigio kiano niajebijo nalo, a mia titikivaka ealo, a bitakar batitiglo bo. Naruei naio burular toro nene jumolu, midu jotano mon mave ea kiano togki taakano, ana miel ka bija naio bano-abinimei abokar vio tai napano be yimo na jilimebiano tai joaio. Ana naio buru toro neibano ba joomo ea vio nene, miija batitig naio bo mia bo laka.

<sup>35</sup> “Mia kavijo, ana naio bar kanano puruveru tai, bar ban boru na yimo na jilimebiano nei, berenio berinavo ‘Kiniou monoka navan ea kanaku ñarabo, mia toro nei toa juñamo beamu vo. Kovitkar batitig ka vite nonovio, a verenio puruveru na rivare re, mia kiniou nevitii bereio ka bogo na nemei nei bereio ea kanaku ieliano.’”

<sup>36</sup> Naruei Yesu bika den toro neibano bika vikadeniano nei denio, berinavo “?Jau komial tukunu nei juñabe? ?Ka nalo tolu neibano amiel ea ñarabo napano toro nei jo mon eaio, na vabe kalo mila banio jibe ka napano naio be toro tai napano jo vaataro ka naio?”

<sup>37</sup> Ana na toro nei berinavo “Peli nana tinien miiiao.”

Mia Yesu ber ka bereio, berinavo “Ee naio nao, a jau bunu, jau kava kataki kiano bajago novo na.”

### *Marita naio Mere*

<sup>38</sup> Mia ka bogo na, Yesu naliko kiano naiagagoano nalo ajumã amiel abavin mave Yerusalemo, naruei nalo amalmaluvo ea mmarkomeli na telisu na Betani, ana ea vio na tira na Marita naio buru Yesu ban ea kialo vonuo.

<sup>39</sup> Mia bogo na Yesu ba jo bijalo, ana Marita nene kuluene tai, siano Mere, naio jotano kamu ka Yesu jaano, naio jomã miagago ka kiano verloglogiano nalo.

<sup>40</sup> Mia ka bogo na, Marita maka tovon ka riagago, naio jomã bukudeli toru ka rila vite nonovio riviniu tu vatitig rorea Yesu, a naio jo jidomii bijovijon ka imãuano nalo nei. Mia iorou kanio, ana naio binimei mial Mere naio jomã jotano, naio jomã miagago ka Yesu, naruei naio ber ka Yesu, berinavo “Tubo, kulueku na naio jotano kurano ga jumãbe na, napano kiniou ga takurano nojomã nomila vite nonovio nalo. Peli jau maka koto kovitilubar koviobo, mia bo kanio jau kover ka rimei riija kiniou.”

<sup>41</sup> Mia kiado Tubo berdoŝe naio berinavo “Marita, jau kobe tira tai namã kojo kojidom bijovijon vite mēle, a jau kojomã komijog bova mēle ka vite telabo na jibe na.

<sup>42</sup> Mia be vite takurano ga jo ka mia jau kosidomii ve temi kanio, a vite nene Mere nei

naio jo mileal ruei ea kiano meuliano, mia maka nejikia nodu lario den naio bereio.”

## 11

### *Volkouano naña Tubo berloglog ka kito*

#### *Mataiu 6:9-13*

<sup>1</sup> Bogoti tai, Yesu ba bolkouo ea vio tai, avona bisi, ana naio binimei bereio, ana na kiano naiagagoano nalo tai bika denio, berinavo “Tubo, bo laka ka ver jau kalavon ka koverloglog kumemi ka kumemi bunu nuvijikia nubolkouo, tavukia na Jone berloglog kiano naiagagoano nalo beamu ka abolkouo tavukia naio.”

<sup>2</sup> Ana Yesu mijamo kanio, naio berinavo “Mo, ver kamiu kuvisidom kubolkouo, kamiu kumijikia kuver tibe nei, kuverinavo:

‘Karamememi, memedu ga ka kumemi nuvitu nuvatove ka siamo lu.

Kumemi nubolkouo ka kiamo nave-natuboiano rimei.

<sup>3</sup> Kumemi nubika denso ka kavar simemi sinani-ano na banei a legiano nonovio.

<sup>4</sup> A koviekokoa kumemi rivior kenememi kari-ano nalo, bior naña kumemi numituña nubiekokoa nalo naña abijuku bova ban kumemi.

A jau kotuvan re vite nalo alavon kumemi ñele.’”

### *Jamerijiano na vikaniano na vite*

<sup>5-6</sup> Mia Yesu naio jidom ka nalo monoka amerou re ka avika vite den Atua, naruei naio ber jamerijiano tai banlo, berinavo “Verenio ka bogiano vio vare, keiilo ka kanamo bilbilu tai napano miel binimei boru ea kanamo vonuo. Mia

samo sinaniano maka bunu tai rito, mia monoka jau ketikiti kavan ea tai na kunuano jo vaataro keanso, monoka kovika sikili denio, kover 'Koig, bilbilu tai miyotuba ka kiniou vonganai ga, mia kiniou nebe deio riano. Maka bunu ve titai leleio ka mia nomijikia nodu rivan naio ka mia senio. ?Jau samo sinaniano tai beva ju kovio napano komijikia kajamo kanio van kiniou beamu vo?'

<sup>7</sup> "Mia jumñabe, rojidomii rober ðeli mia toro na mijikia riverdoþe, verinavo 'Ee koig, jau kala mñlea re kiniou tibe na. Jau keialio, kumemi numituboniko mñaratavo ruei, mia kumemliki kiritete nalo, kumemi numitua mememi jogu nalo ruei, naruei maka bunu nejikia notumolu bereio.' Mia toro na maka rijikia river tibe na."

<sup>8</sup> Mia Yesu naio jusol tukunuano, ana naio ber kalo, berinavo "Ðeli bogo tealoo toro tai rijikia sidomii iakurano ka riijaso bior jau kojo vaataro ga ka naio. Mia ver jau koinñau re ka kovivika sikili denio vano-o, mia monoka sian vite venia napano mña kojo kobivika banio."

*Yesu berii navikadeniano na vite den Atua  
Mataiu 7:7-11*

<sup>9-10</sup> Mia tibe ka kiano jamerijiano Yesu ber bunu kalo berinavo "Toro na ver joñña bika vite, julaka mia naio mijikia rijeio, mia vere-nio toro na joñña jirag vite julaka, mia naio mijikia rilealio, mia ver toro na joñña miniania mñaratavo julaka, mia mñaratavo nene mijikia rivetavo kanio. Tibe na, mia kamiu kumijikia kuvar vite nalo namña kumituñña kubika denio, a mia kamiu kuvileal venia na kamiu kumituñña

kumisiragio denio, a m̄aratavo nam̄a kumituṃa kuminianiaio mia naio rivetavo ka kamiu.

<sup>11</sup> Ver kenerimo tai siserio, naio rivika niado sesa na jo, mia maka kejkia kodu maro tai vanio,

<sup>12</sup> p̄eli na ver rivika boboti tu na jo, mia maka kejkia kodu buruolu rivan naio ka senio.

<sup>13</sup> Be riano ka kamiu kube tomu na kirivova ga nalo, mia maka kamiu tai mijikia rila tibe na, kamiu kumitu kumisaaro julaka ga kaṃa kumisian tonovo nalo ban kenerimiu nalo. Jibe ga na, bogo napano kamiu kumituṃa kubika den karamemiu na tiniabene, naio jaaro ga ka sian Niununo Lu van kamiu kenerinio nalo.”

*Aberenio Yesu miṃau ea Siṃaro kiano moroano*

*Mataiu 12:22-30; Mak 3:20-27*

<sup>14</sup> Ana iorou kanio, ana aburu m̄arabo ka toro tai na siṃaro ban ea naio binimei ban Yesu, siṃaro nene mila toro nei maka ril, mia Yesu mijidiglar siṃaro nene denio, naruei naio mil bo bereio, mila ana nalo napano amial vite nei amiilo toru laka.

<sup>15</sup> Mia nalo tealu amijoku, naruei nalo aberii niegeniege Yesu, nalo aberinavo “Tete na naio jom̄a mijil bulag siṃaro nalo ea ga moroano na siṃaro nalo kanalo tubo, napano siano Belsabel, naio mijamo ka ban naio.”

<sup>16</sup> A nalo tai bereio, ajidomii bova bunu ka Yesu, naruei nalo ajum̄a amilavon naio, nalo ajidom ala luṃiluṃi naio ka naio rila kijokijo tai ea moroano na vio mave ka amijikia aialio.



17 Mia Yesu mijoglubarbar kialo jidomiano nalo, ana na naio berinavo “Ver tubo tai, kanano tomu nalo avuruburelo, napano mia togio atuþelo ka togio dolu, mia tubo nene kanano iñauano nalo monoka atibirbil. A ver vonuo tai, atuña avuruburelo napano togio sidom rijil togio dolu, mia nalo na maka ajikia atu rivu bogo tai.

18 ?Jibe ga na bunu, ver siñaro nalo na Setano kanano atuña avuruburevurelo ruei, ana mia navenatuboiano na Setano kanano tumolu tu tumabe? !Ana kamiu kumituña kuberinavo jibe na naruei, ka kuber kiniou nojoña nemijil bulag siñaro dolu nalo ea moroano na buruñara siñaro na Belsabel kanano, mia maka rijikia tibe na leleio!

19 ?Mia ver tibe ka naña kamiu kuberenio, juñabe naruei ana kam tealó bunu ajumña amijil bulag siñaro? ?Kei naio mijamo ka moroano na banlo, þeli Setano bunu ga bo? Bo ka ver kenemiu naiagagoano nalo naña ajumña amijil bulag siñaro nalo ajog kenemiu iliano nalo.

20 Mia makanio, kamiu kuber nina maka rimemedu na. Mia kiniou nojoña nemijil bulag siñaro nalo ea moroano na Atua juñano ga, mia vite na berialio ka Atua kanano navenatuboiano naio ju iviso ka kamiu ruei.

21 “!Kamiu kuvialio! Jibe kanio napano ver torkouo tai, naio rivar kiano saba na mira nalo, a tukuku vatitig ka buruñara kunuano. Naruei, vite nalo na toru nei kiano aju bo ga jouro ea kanano burusio. Naina naruei Setano kiano iñauano jibe na naruei.

22 Mia ver torkouo dolu tai rimei napano naio

řirinio jikili loa naio, mia naio rila mira kanio-o tuvulu Setano, ana mia naio mijikia rivar bulag vite nalo na mira na be kanano, napano beamu barkar tinieno eaio, a naio mijikia rivar vite nonovio napano ju jouro ea burusio na torkouo kanano, tan kalo van kanano tomu nalo.

<sup>23</sup> “Toro napano maka takisor kiniou, naio jo berbure kiniou, a toro na maka riũaau vija kiniou ka kumemi nuvuru kanaku tomu nalo amei vio takurano, naio joũa mijil dedade ealo abeve terakurano.”

*Niununo va naio mijikia binimei bereio*

*Mataiu 12:43-45*

<sup>24</sup> Ana Yesu ber bunu, berinavo “Bogo tai, bogo naũa amijil lar niadu den toro tai, niadu nene mijikia riva yeturu ka sirago kunuano dolu tai. Mia ver rileal re tai, mia naio riverinavo ‘Ee, mia nalavon ka navan bere ea kunuaku moruo na beamu vo.’

<sup>25</sup> Mia bogo napano naio binimei, mia rileal ka yimo nene meravo bo jo, abar batitig vite nene nalo biniu ju memedu bo ruei.

<sup>26</sup> Ana mia naio rivan rivuru niadu ve aluo dolu napano nalo abova loa naio lie vo, amei vija naio, ka na mia nalo ava joomo bereio ka atua toro nene. Ana toro nene, beamu kiano meuliano bova, mia iorou kiano meuliano bova bova laka.”

*Marabo na avokar saariano na be riano*

<sup>27</sup> Ana ka bogo na, tira tai jo naliko nalo napano ajuũa amial vite nalo nei, napanoũa amijog Yesu kanano iliano, naruei tira nei jaaro

m̃ele kanio. Mia naio miaga m̃ererere laka naio berinavo “!Aiou liki! Koniomo napano bariso, midu yu banso, Atua kiano ilivuiano ve toru laka toa naio, napano bar tete tai jibe ka jau.”

<sup>28</sup> Mia Yesu berdoḗe ban naio, berinavo “Nao, nina be riano na, mia kiniou neber ka jau ka mia Atua kiano ilivuiano rimei ve toru lie bereio vo van toro kei napano naio monmonea Atua kiano iliano nalo, naio mila venia napano naio jom̃a berenio.”

*Tomu na ajidom aial kijokijo  
Mataiu 12:38-42; Mak 8:11-12*

<sup>29</sup> Ana ka bogo na, tiniobi nalo nam̃a amiagago ka Yesu nalo aju abinimei telabo lie vo, mia Yesu naio mijikia ka nalo miroano kalo nalo abinimei ka ajidom aial kiano kijokijo nalo ga, ana naio mil banlo, berinavo “Kiniou nemial jibe ka tomu nalo na taara na kenemiu banei abova laka. Nalo aju ajidom aial kijokijo toru laka, mia makanio, mia Atua maka rijikia sian kijokijo tai leleio vanlo. Mia naverialiano Jona, kiano kijokijo re nua ga, nina ga mia amijikia aialio.

<sup>30</sup> Atua miila Jona, jibe ka kijokijo tai ban nalo na vio Nineva re nua ruei, ana naio miila bunu kiniou Kulorinio Kenerinio nebinimei jibe kijokijo tai ban kamiu na vonganei.

<sup>31-32</sup> “Mia kulo Nineva re nua napano amijog Jona kiano iliano nalo, abiliglo ka bogo nene, a mia nalo na atumolu ea legiano na tibureiano, mia aver bulag rimemedu kenemiu torokoriano nalo, bior be toro tai napano naio loa laka ka Jona naio jo bija kamiu, mia maka kuvilig kamiu.

“Nanua bogo tai bunu tira na toru tai na naio be parinio tubo tai napano naio jumolu ea kiano buruvenuo, napano jo koalabo laka, naio batove binimei ka rijog tormoruo parinio tubo Solomon kiano ilimasosouano. Naruei tira na toru nei bunu mia naio tumolu tu ea legiano na tibureiano, naio river bulag rimemedu kenemiu torokoriano nalo, bior be toro tai napano naio be masou loa Solomon naio jo bija kamiu, mia kamiu maka kuvisidom naio leleio.”

*Kijokijo juo ea tivelinio na yulu*

*Mataiu 5:15, 6:22-23; Mak 4:21; Luka 8:16*

<sup>33</sup> Mia Yesu ber bunu, berinavo “Bogo na ver rejelan yulu, kito maka retelan ka mia rava roduvanio toa bulutanbo tai ea borotano, ðeli na mia kito reivekoio ka basaro tai bereio, mia kito rejelano ka mia reiveio takilele mave, ka mia ver toro na rimei mia mijikia rial ka yulu mereralii vio nonovio biniu.”

<sup>34</sup> A Yesu ber bunu, berinavo “Toro mirano naio jibe ka vio takurano napano yulu mijikia mereraliio binimei joomo ea mokotenano. Tibe na, ver miramo rimeravo rivu, rivitii batitig vite nalo, mia tibe ka napano tiniemo bujo magmago ka yulu. Mia verenio miramo rivova, tinie jii vite nonovio namãa jomãa mialio, mia jibe kanio napano tiniemo bujo magmago ka melijokouo.

<sup>35</sup> Tibe na, mia kamiu monoka kuvitkar rivu, ka yulu napano joa tiniemiu rimei re bunu tibe ka melijokouo bereio.

<sup>36</sup> Mia ver tiniemiu rivujo ka yulu tulaka namãariga, napano maka ve melijokouo tai ve

telisu toaio, mia kenemiu meuliano rimerera vatitig rivu, rudulii vatitig vio nonovio rivu.”

*Yesu mil jikili ban navuriñaraboiano na nalo-tuano nalo*

*Mataiu 23:1-36; Mak 12:38-40; Luka 20:45-47*

<sup>37</sup> Mia Yesu mil ban tiniobi nalo bano-o, naruei Varisis tai napano jomña miagago kanio ber ka Yesu berinavo mia rivuru naio rivan ea kunuano, ka rila sano sinaniano tai. Ana na Yesu ban bija naio, mia bogo na sinaniano amiomon ju, Yesu ba jotano ea vio na sinaniano.

<sup>38</sup> Naruei ka bogo nene, Varisis nalo abokar jikili kialo tuboiano tai ka toro monoka takii ñarabo tealo ka ña sekon jumñano karina mijikia sinano. Mia Varisis nei naio jidom ber Yesu naio be toro lu tai, naio monoka rila tibe ka napano kialo bajago na jikili nei berenio, mia bogo napano naio mial ka Yesu maka sidom bijon ka naio rilao, naio miilo toru laka kanio.

<sup>39</sup> Ana Tubo mil ban toro nei, naio berinavo “Kiniou nemijikia kenemiu bajago kamiu Varisis nalo ruei. Kamiu tiniemiu jii ñelea ka ña kumisekon vatitig rivu dañariga kenemiu baja nalo a kenemiu baju nalo, ana kumituña kube ñarou kanio, kumituña kuberiaña kamiu kumeravo, a kube lu. Mia buruñara niamiamo na bijurukar kamiu kia navo, bior kenemiu iviso nalo abujo magmago ka ña kumijukubin toro, a kumila kiki toro, a bajago nalo na kirivova jibe na.

<sup>40</sup> !Ai, abe mia ña kuviavovu ñelea re tibe na! ?Kamiu maka kuvitilubar ka Atua namña jii vatavio na vite nonovio, naio ji bunu vajoomo na vite nonovio, mia bo laka ka ver kamiu

kuvilakon nono tivelinio na kamiu rimeravo rivu ve riano, vatavio a vajoomo bunu.

<sup>41</sup> Tonovo nalo namã kamiu kumituãa kumisonlo toru bogo nonovio ban ea kenemiu baju nalo a bija kenemiu baja nalo, ver kamiu kuvituãa kuvilavon ka mã kuvio ka kija ga rivan taliãasa nalo ga, mia rivu. Ver tibe na, ðeli mia kamiu kuvial ka kenemiu vite nonovio nalo amei rimeravo vatitig ruei, ana mia mã kumila bijon re bunu kenemiu bajago dolu nalo.”

<sup>42</sup> Naruei Yesu berii bajago nalo na jubol-uboiano na navurimãaraboiano na nalotvano nalo ba lie vo, naio berinavo “!Kamiu kulo Varisis, aua! Kamiu kumila bulag kamiu toru laka, mia rivova laka van kamiu. Kiniou nemijikia ka kamiu kumituãa kubitikar batitig bo damãariga, ka ver kubar semiu mãarsinaniano duelimo, mia monoka ve takurano rivan ea Atua kunuano, tavukia na tuboiano naio jomã berenio, a kumituãa kumila jibe na ka saba nonovio na be kenemiu, ba bokar bunu mãasebitu sesa nalo a vite nalo bunu na jibe ka mãarsili nalo. Mia vite nalo na tomormoruo namã tuboiano berenio, kamiu maka kuvisidomialio leleio, jibe ka namã ber monoka kamiu kumemedu rivu, a kamiu monoka tiniemiu tii Atua a kulo dolu nalo bunu. Ver kamiu kuvisidom kuvokar sikili vite nalo na tertelisu nei, naio bo ga, mia vite nalo na tomormoruo nei naruei naio bo ka kamiu kuvituãa kuvila ruei, mia maka lele kuvilaio.

<sup>43</sup> “!Kamiu kulo Varisis o! Kamiu kumila lelan kamiu toru laka, mia rivova laka van kamiu. Joomo ea yimo nalo na volkouano, kamiu kumisidom ka bogo nonovio kuvitutano ea vio na be tomu na tortoru nalo jelelo ga, a

verenio kuviel ea tomu nalo miralo, kumisidom ka avatove ka kamiu, a avio vatitig kamiu, a averinavo 'Aiou, naverloglogiano novo, kavijo bo!'

<sup>44</sup> Mia ve kirivova laka rivan kamiu bior kamiu kube tekurano ga, kumitavukia ĩmartanbo moruo nalo na tinielo bobogia ea ruei, amiel ĩlinio mave ea ga, maka bunu ve tinielo ka vite jono tai napano menunū mon tano nei."

<sup>45</sup> Ana ea bogo na, toro tai napano naio be masou bo ka tuboiano, naio bunu jomā miagago, ana mijog jibe ka Yesu kiano iliano bokar naio bunu bija nalo napano amimāu jibe ka naio, ana na naio berinavo "Naverloglogiano, kiniou nomijog jibe ka kojidom keil niegeniege kumemi bunu!"

<sup>46</sup> Ana Yesu berdoĥe, naio berinavo "Nao-o, mia rivova van kamiu tomu nalo natuboiano bunu! Kamiu kumitumā kubitiri bulag bereio tuboiano sesa nalo tivelinio ka nalotvano bogo nonovio, nalo ajibe ka vite na teremi napano kumivon kakarlo ea tomu nalo taakalo ka monoka avarlo, mia kamiu kumitu jibe na ga, maka kuvikulkulu ka ĩarjukujumemiu tai leleio ka rilavon ka riijailo.

<sup>47</sup> Mia rivova van kamiu, bior kamiu kumitumā kumiyovovua batitig ĩmartanbo na naverialiano nalo na Atua kiano, mia kamiu kubevirare ga ka korobimiu tormoruo nalo re nua, napano nalo naruei amuebinvin naverialiano nene nalo amārmāro.

<sup>48</sup> Kamiu bija nalo nei kubare ga, bior nanua, tormoruo nalo nei amue naverialiano nalo, mia banei kamiu kumisaaro ka kialo imāuano nene,

kumitusolio bereio napano mña kumituña kumiyovovua martanbo nene nalo.

<sup>49</sup> “Kamiu kumitibe ka ga napano ilimasosouano na Atua kiano ber nua, naio berinavo ‘Mia kiniou neiila kiaku naverialiano nalo a atevi nalo aviedu ealo, mia ala lelanlo, ðeli mia auebinvinlo amãrmãro.’

<sup>50</sup> Iliano nei sano nioti nene ber mia kamiu naruei kuvokar vironiano namã korobimiu nalo re nua amuebinvin naverialiano nonovio nalo, jikar ka bogo na tikariano na yetemeriba nei.

<sup>51</sup> Nina jikar ea Epel, binimej bokar Sakaraia, napano korobimiu nalo amue tamãaria naio iviso ka boda bija Vio Lu joomo ea Atua Kunuano Lu. Riano, kiniou neber ka kamiu nei, ka vironiano na burukija na Atua kiano naverialiano nalo jua kamiu na vonganei.

<sup>52</sup> “Nao, mia ve kirivova lie vo van kamiu tomu namã amijikia batitig tuboiano, bior kamiu naruei kumidu van navetavoiano na m̃aratayo na jikiaiano, ana kamiu maka bunu kuvituña kuva joomo eaio, a kamiu kumituña kumituko m̃arabo ka tomu dolu nalo namã ajumã amila vio ka ava jouro.”

<sup>53</sup> Ana Yesu ber iliano nalo nei bisi ana naio batavio den yimo neibano, naruei naverloglogiano na tuboiano naliko Varisis nalo tinielo bitunu tanea ka naio, napano tiniel mimi laka. Ana na nalo abie sosor Yesu damãariga, nalo ajumã abika iliano nalo a vikadeniano nalo na jikirkili banio, ka alavon ka ayukuru naio a ka rila naio river iliano tai na maka rimemedu.

<sup>54</sup> Amiliviko Yesu jibe naio be temeul deden tai, bior ajidom ka aleal kiano iliano nalo tai ka mia



amijikia atibure naio riviorio.

## 12

*Ililuklukuano nalo mia amalmaluvo amei medave*

*Mataiu 10:26-27*

<sup>1</sup> Ana na tiniobi nalo ajumã abinimei ea Yesu keano vo, ajovulu menu na tomu nalo miroano. Mia bogo namã abinimei vio takurano jibe na, vio telisu garuei, napano mã ajumã amivinkakarło ga. Ana na bogo na Yesu maka ril vanlo vo, mia naio mil ban kiano naiagagoano nalo jukamu, berinavo “Kamiu monoka kuvitkar vatitigio ka Varisis nalo kialo bajago va nalo, bior nalo ajumã amil ka kuluniolo ga, ajumã amil moruo mia amila sibi ga. Kialo bajago va nalo nei amijikia amaluvo rivokar a rila bulag toro dolu nalo, jibe isi na joko telisu ga mia kirisopeli ba miñau bokar joko nonovio.

<sup>2</sup> Vite nonovio na bova namã tomu na jibe na ajumã amilavano, peli namã aber luklukua ga, mia amalmaluvo ea vio medave navo, ka mia aviniu ajikiaio.

<sup>3</sup> Iliano vaio namã toro jomã berenio ea meljokouo, mia monoka ajogio bereio ea legiano, a vite nalo namã toro jomã mijuvaluva kanio ea kunuano ga, mia aiaga m̃erere bereio ea tomu nalo miralo, ka mia aviniu amijikia ajogio.”

*Yesu kiano naiagagoano monoka rimerou re ka tomu nalo*

*Mataiu 10:28-31*

<sup>4</sup> Ana na Yesu ber ka bunu kiano naiagagoano nalo, naio berinavo “Banalo, kiniou neber ka kamiu ka kamiu kumerou re ka nalo naña amijikia aue tañaria mokotenemi nalo ga, karina mia maka bunu ajikia ala titai bereio ka niunumi nalo.

<sup>5</sup> Mia nejidom neil vatitig rivan kamiu ka mia kumerou ka toro kei? Mia kamiu monoka kumerou riano ka Atua ga, napano mia naio mijikia rila niabemi rimaro beamu, karina mia mijikia rivu niunumi bunu rivan ea vio naña ajog rivova eaio. Lerinio, toro na naruei kamiu monoka kumerou ka naio.

<sup>6</sup> Mia ver kumerou kano, mia kamiu maka bunu kuvijikia kumerou ka todolu bereio, bior Atua joña bitikar kamiu, naio jo jidomial kamiu. Kuvisidomii von menu sesa napano kirijako. Nalo miroano laka janea vio ga, ajibe ka soro ga, aþiliþili kalo veru telisu ga ka kirijako jimo, mia Atua joña tinien maio kalo abeve terakurano damariga, naio maka tinien ribobogialo.

<sup>7</sup> A vijumi nalo na ea pariparimiu bunu, miroano laka, mia naio buluku nonovlo beve terakurano ga. Mia Atua naio jo mial kamiu kubo laka jovulu kirijako nalo nei, naruei mia naio rivitikar vatitig kamiu rivu ka vite nonovio na kenemi meuliano.”

*Toro na berial ka naio be Yesu kiano  
Mataiu 10:32-33, 12:32, 10:19-20*

<sup>8</sup> Ana na Yesu berenio, berinavo “Kei naña berial kamu ka tomu nalo miralo ber naio be kanaku toro tai, mia kiniou Kulorinio Kenerinio, kiniou bunu neverial siano van nailiano nalo na mave ka toro nene be kanaku.

<sup>9</sup> Mia toro kei namã berial kamu ka tomu nalo miralo ber naio maka ve kiaku, mia kiniou Kulorinio Kenerinio kiniou bunu neverial van nailiano nalo na mave never toro na naio maka ve kanaku.

<sup>10</sup> “Kariano nalo bija ilivovaiano nalo, bija iliano nalo namã mila lelan kiniou Kulorinio Kenerinio, Atua mijikia riviekokoa toro riviorio, mia toro na ver mila lelan tolu na Niununo Lu, berii Niununo Lu kiano imãuano, berinavo Simãaro ga mirãaukanio, toro na jibe na, Atua maka rijikia riviekokoa bogo tai leleio.

<sup>11</sup> “A verenio bogo tai, tomu nalo tiniel ser kamiu, mia avan ea ilivatitigiano ka kamiu. Mia amijikia avuru kamiu kuan kuvitumolu kuvitu kamu ea tomu na tortoru na yimo na volkouano nalo miralo, a ea komeli bunu, mia kamiu kuvisidomial mēle re ka mia kuverdoḡelo tuḡabe, ḡeli na mia kuver iliano na vabe vanlo.

<sup>12</sup> Rimonloglog aura nei ga, mia Niununo Lu ga rijai kamiu, ka riverloglog kamiu ka iliano na vabe na mia kamiu kumijikia kuverenio.”

*Jamerijiano na toro be sanibaiano napano maka sidonii vatitig kiano meuliano*

<sup>13</sup> Naruei tiniobi nei napano aju nei nalo tai, naio bio ban Yesu, berinavo “Naverloglogiano, kuruaku naio jomã mijukubin kiniou-o mia, naio maka tomã tan ka batitig karamememi jajuḡano rivija kiniou. Bo kanio mia jau kover kanio ka naio rila rive verare ga vija kiniou.”

<sup>14</sup> Ana na Yesu berdoĥe, berinavo “Ai, abe vite na maka ve kanaku ka nalaiio. Kiniou maka nove toro nana mia netibure kamiu.”

<sup>15</sup> Jibe na naruei ana na Yesu maka rila tibe ka na kema nei naio berkanio, mia naio jian iliano tai tivelinio ka sidom ĩlelea vite nalo. Naio berinavo “Kamiu monoka kuvitikar rivu, maka rivu ka kuvituĩa kuvijoku ĩlele ka kulo dolu nalo, kumisidom ĩlele ka kuvar vite nalo na be kialo. Kiado meuliano maka toa vite ve telabo nalo napano na roju rabario, mia kiado meuliano jikili jua vite dolu.”

<sup>16</sup> Mia Yesu jusol kiano iliano ea vio na lie vo, naio ber jamerijiano tai banlo, naio berinavo “Toro sanibaiano tai kiano borotano toru laka, a bo laka, naruei kiano tiniavio nalo abar marimeuano toru ealo.

<sup>17</sup> Mia tete nei naio mial sinaniano nalo nei, naio maka bunu rijikia mia rila tuĩabe naruei, ka mia rivar vatitig sano sinaniano nalo nei tua vio na vabe, bior kiano yimo na varvatitigiano na sinaniano bija kiano vio dolu nalo abujovujo nonovio ruei.

<sup>18</sup> Ana na kema neibano, berinavo ‘!Mia noue bulag kanaku yimo na varvatitigiano na sinaniano moruo nalo nei, ana mo nomijikia noirĩau kanio na be terivou dolu nalo bereio, na mia nalo ave tortoru lie vo, na mia rivare ka sinaniano a vite dolu nalo na miroano nei kanaku.

<sup>19</sup> Mia bogo na ver noirĩau kanio riviniu, mia kiniou naial kiniou tibe ka kiniou riano, kiniou nobo kija naruei! Riano ga, mia kiniou nojog rivu! Mia kiaku saba na miroano nei, mia nesenilo rivano-o mia avitikar vatitig kiniou rivano-o rivokar yuka ve miroano. Ka bogo na,

mia noiñau lele re bunu mia nesen vaio na nojidom, a mia nomunu uei tibe na ga, mia notoa meuliano nabo nañariga na.'

<sup>20</sup> "Toro nei naio jomña jidom jibe na bano-o, mia naio maka rijikia ka Atua berii ruei ka mia ril vanio naruei, naio berinavo 'E kodovo, komiavovu ga na, bogiano nei ga, kiniou nojidom nodular bereio kanamo meuliano denso. A vite nalo na miroano naña komiñau bijon kalo na, naña jau komiobijilo be kanamo na, mia ave kei kiano bereio liki na?'"

<sup>21</sup> Ana na Yesu ber kalo, berinavo "Mia tibe na naruei rivan tomu nalo naña ajumña abarbijii kialo saba telabo, napano abe tomu na sanibaiano tivelinio na yetemeriba nei, mia maka leleio ave sanibaiano tivelinio na saba nalo na ea Atua."

*Yesu berlubarbar banlo jumñabe ka toro naña jo jidomii ñelea kiano meuliano*

*Mataiu 6:25-34*

<sup>22</sup> Ana na Yesu ber ka bunu kiano naiagagoano nalo, naio berinavo "Kar tena, kiniou naber ka kamiu, ka maka rivu ka kenemiu jidomiano rivujo ñele ka iñauano na kuvitkar kamiu ga, ka na mia ña kuvivika, kuverinavo '?Mia vio na vabe na mia kito romijikia releal sinaniano?' Peli na '?Mia rovokar kulumñarauo na royaio tumñabe?'"

<sup>23</sup> Jidomiano nalo na maka rimemedu, bior kenemiu meuliano naio bo loa ka sinaniano, a niabemiu naio bo loa ka kulumñarauo.

<sup>24</sup> Kuvisidomii von menu maina nalo naña ajumña amierier janea vio nalo na. Nalo na maka ña aimñauka kialo tiniavio, a maka avavenei ka

avarbijii sinaniano rimei vonuo, a maka avar batitig salo sinaniano nalo tua vio nene tai. Mia Atua joŃa baganlo, a ea kiano vitiano, naio mial kamiu kubo lie loa ka menu nalo, ana mia naio rivitikar kamiu rivu laka tovulu nalo.

<sup>25</sup> ? Kamiu kuberiaŃa toro napano joŃa jidomii kiano meuliano toru laka naio mijikia rila kiano meuliano na bulati na rimei vetebievi kija bere ve telisu?

<sup>26</sup> Makanio, maka tibe na, mia bior kamiu maka kuvijikia kuvila titai na telisu jibe na, bo kanio kamiu kuvisidom bijovijon re vite dolu nalo na ea kenemiu meuliano nalo.

<sup>27</sup> “Kuvisidomii von buruniegnegi novo nalo naŃa ajuŃa amililuo janea vio na. Nalo na maka Ńa atu aiŃau a maka Ńa atulu Ńalo kuluniabele nalo. Mia kiniou naber ka kamiu, Parinio tubo Solomon re nua, napano naio be nasanibaiano laka, a naio be kiano saba nonovio, kumuŃarauo nalo naŃa miyαιο maka rivar niogniogu na bo tibe ka Ńaniegnegi nalo nei.

<sup>28</sup> Maniegnegi nalo naŃa abe tena bogoti takurano ga, mia beni ana aisebilo ea sebi, mia Atua jo miyovovualo batitigio abo laka. JuŃabe, kuberiaŃa Atua maka rijikia rivar kumuŃarauo van kamiu? Kaleliki, kamiu na maka kuviekar naio sikili leleio a!

<sup>29</sup> “Bior vite nalo na, mia maka rivu ka kenemiu iviso rivujo ka jidomiano nalo na, kuverinavo ‘?TuŃabe ana na mia rosinan, a romunu, a releal kumuŃarauo?’ Mia maka rivu ka kuvituŃa kuvisidomii bijovijon Ńelea laka tibe na.

<sup>30</sup> Ierinio, tomu nalo reraio na buruvenuto nonovio na yetemeriba neibano ajumña ajidomii mñlea vite nalo jibe na bogo nonovio ga, mia kamiu, karamemiu naio mijikia ruei ka monoka kuvar vite nalo na jibe na.

<sup>31</sup> Tena be moti ka mia kuvisidomii ve toru ea kenemiu iviso nalo, naio be Atua kiano navenatuboiano. Mia verenio kuvila tibe na, ana na mia naio rivar bunu vite dolu nalo nei rivan kamiu.

<sup>32</sup> Ierinio kiaku nunu sesa nalo, karamemiu naio jidom toru ka rijamo ka kamiu kumei kuve tubo ka kiano tomu nalo, ana na mia kamiu kuvisidomial re titai leleio, mia vite nonovio rimei rivu ka kamiu.”

*Toro na be sanibaiano tivelinio na Atua  
Mataiu 6:19-21*

<sup>33</sup> Ana na Yesu ber bunu ber “Bo kanio kamiu kuřiliřili bulag ka kenemiu saba nalo na, kuvar veru nene van taliñasa nalo ka kuvijailo. Ver kuvituñña kuvila tibe na, jibe kanio kumitu kubar kenemiu burumñara basaro tai joa vio mave, napano mia maka rijikia rimei dagdago bogo tai, a kuvituñña kuvison bijii kenemiu saba nalo na miroano rivan eaio, ka mia kuvarkar tiniemiu eaio, ka mia toro na vinauano rijikia re ka rivar bulagio den kamiu bereio, řeli na mia sivinia ser dudulio re.

<sup>34</sup> Mia bo kanio kamiu ve kenemiu saba novo nalo na atua vio mave tibe na, bior mia kenemiu jidomiano nalo atu tulaka ea vio na ga napano kenemiu saba na bo nalo ajaio.”

*Naiagagoano nalo monoka atu vatitigio ka mia  
Tubo rimei bereio*

*Mataiu 24:42-51; Mak 13:33-36*

<sup>35-36</sup> Ana na Yesu ber bunu kalo, berinavo “Kamiu monoka kuvitu derevijo tulaka ka mia kenemiu Tubo riyotuba ka kamiu. Kamiu monoka kuvitibe ka tomu naña amimãu toro na toru tai kanano, napano naio juvanlo ka ban ea soriano tai. Naruei nalo amiyovovualo, ajelan bunu yulu nalo, ajumormolu aju, mia bogo vaio napano mia kialo toro na toru naio rivoru, naio rimei rinia m̄aratavo, mia nalo aju rorea rui, amijikia avetavo kanio vaarakurano ga.

<sup>37</sup> Mia burum̄ara ilivuiano van tomu nalo naña amimãu jibe na, ka bogo napano kialo toro na toru boru keanlo, mia nalo aju rorea rui, nalo ajevijo aju. Mia kialo toro na toru naio saaro ve toru kalo, ana na mia naio riva riija naio, karina mia rimei mia amiilo ka naio riviolo ka amei atutano ea kiano vio na sinaniano, naio biovio ka sinaniano novo tai banlo.

<sup>38</sup> Mia bekurano ka ver vio bobogio rui, ãeli na ba bokar bogiano vio vare, ãeli na vaataro ka tu riolu, mia ver toro na toru naio rimei, rial ka kiano tomu nalo ajevijo aju rorea naio jibe na, mia naio rila vatitiglo rivu-o mia.

<sup>39</sup> “Mia bereio be verare ga ka ver toro tai napano mijikia memedu ka bogo na toro na vinauano mia rimei ea kunuano, mia toro nei maka rijikia tuvan kunuano to ga tibe na ka naio riva vio dolu, naio monoka to derevijo rorea naio to.



<sup>40</sup> Tibe na, kamiu bunu monoka kuvitu rorea vatitig rivu ka mia kiniou Kulorinio Kenerinio nomaluvo, bior mia nomaluvo ka kamiu bereio ea bogo tai napano maka toro tai rijikiaio, ðeli na toña sidonii ka mia river nemei bereio eaio.”

*Jamerijiano na toro na iñauano na kiano toro na toru naio binimei bereio*

*Mataiu 24:45-51*

<sup>41</sup> Ana mo Pitere bika den Yesu, berinavo “? Tubo, jamerijiano na jau kober vonganei na, jau kober ban kumemi kanamo naiagagoano ga, ðeli na kober ban tomu nalo nei ga abiniu?”

<sup>42</sup> Mia Yesu maka sian verdoþeiano nene rimemedu vanio, mia naio berdoþe ban ea jamerijiano tai. Jamerijiano nene naio jibe nei, ber “Ver toro na iñauano tai, napano naio be masou bo laka, a naio biekouo ea kiano iñauano, mia naio riñau tumabe naruei? Ver kiano toro na toru juvan vio ka riva koalabo, mia naio tuvan kiano naimñauano nalo atua naio jumano. Mia kema nei naio rivitkar kiano tomu na iñauano dolu nalo, mia naio rivokar vatitig iñauano nalo nene.

<sup>43</sup> Mia bogo na toro na toru naio rimeï bereio, mia naio rileal ka kiano toro na iñauano nei, naio jo bokar batitig iñauano nalo nene kiano vo. Mia ka bogo na, mia toro na iñauano nei naio rijog rivu ve toru laka,

<sup>44</sup> bior mia toro na toru nei naio tuvan vite nonovio na kanano tua jumano. Ierinio, mia Atua rila tibe na ga bunu.

<sup>45</sup> “Mia ver toro na iñauano nei naio riñau rivova, mia bogo na ver kiano toro na toru nei tuvan vio ka riva to koalabo, mia naio jidom

riverinavo 'E, toro na toru nei naio ba jo yako kirisiou laka ruei, ãeli mia rimei re bunu naruei.' Ana na mia naio tumolu rila kiki tomu na imãuano dolu nalo, a rivijuku rivova ka tire nalo na imãuano, a mia naio toña sen veru na toro na toru nei kiano, a riva rimunu uei ea legiano nonovio.

<sup>46</sup> Ana mia toro na toru nei naio rimei bereio ea legiano tai na mia toro na imãuano nei naio riilo kano garuei, ea bogoti tai na mia naio risidom re ka mia boru nei rimei eaio. Ana na mia toro na toru nei ãian burumãara vironiano van toro nei napano mia rila naio riva toa vio na tomu na pariparilo kirisikili ajaio.

<sup>47</sup> "Mia toro na imãuano napano mijikia batitig venia napano kiano boru jidomio ka naio monoka rilao, karina maka rilao, mia monoka avitii vatitig naio.

<sup>48</sup> Mia toro na imãuano napano mila na bova memedu ga ka mia avitii vatitig naio riviorio, verver naio maka rijikiaio, mia avitiv naio ve toru re.

"Toro na Atua mije ban naio ve toru, Atua jidom ka rial toro nene rimãau ve toru rivijaio. Mia ver toro napano tomu nalo amije vite nalo miroano monea jumãano, mia amijikia avika vite ve miroano lie vo den naio bereio."

*Yesu be burupati na toro namã mil die toro*

*Mataiu 10:34-36*

<sup>49</sup> Ana na Yesu berenio berinavo "Kiniou nebinimei ka noyon sebi rimemedu ea vio yetemeriba nei, mia bo ka ga ver sebi nene rivilvili ruei, ana makan vo.

<sup>50</sup> Burumñara imñauano kouo tai monokoro jo kamu ka miraku kia navo, ka mia monoka nevija dulo eaio, mia vonganai notomña noñidig kar kiniou ruei riviorio. Bo ka tenene rimei soñeli, ka nomijikia nala nonovio.

<sup>51</sup> ? Kamiu kumisidom kuberiamña kiniou nebinimei ka nala burumñara tumñaro toa yetemeriba nei? Makanio, maka nemei ka nodu tumñaro toaio, mia nebinimei ka nala bajago na vuruvureiano rimei ve toru lie vo.

<sup>52</sup> Mia tikar vonganai, ðeli ea vonuo tai, tomu nalo jumo ajuaio, ana mia nalo tolu nene avuruburelo ka naljuo nene, ðeli na juo nene avuruburelo ka nalo tolu nene.

<sup>53</sup> Mia tomu nalo avuruburevurelo, ka na mia tete mñeaku nalo atudie karamñalo nalo, mia teta nalo atudie kialo tete mñeaku nalo, mia nena nalo atudie kenerilo niatira vevinio nalo, a niatira vevinio nalo atudie kialo nena nalo, a mia niasimemi nalo atudie niatira na joro vonga ka kenerilo mñeaku nalo, ana mia niatira nalo atudie kenielo niasimemi nalo.”

*Monoka avitulubar kijokijo na bogo na Yesu kiano*

*Mataiu 16:2-3*

<sup>54</sup> Ana mo Yesu mil ban tiniobi nalo bereio, naio berinavo “Bogo na kito rotumña roial burumñara melijo na bobogio joa vio namña jegi moluo eaio, romijikia ka mia yuo rimei, mia maka vesiou ga ana na yuo bovo.

<sup>55</sup> Mia bogo namña romijog ka kanado jegi na saot jomña miuvuvu, nina naruei romijikia ka mia

vio rivitunu m̃ele, ana na mia monoka tibe na ga na.

<sup>56</sup> ?Nina naruei, kamiu kumituṃña kubitilubar ruei kijokijo na vio yauo a yetemeriba, ka mia bogo tuṃabe ṣeli mia tuṃabe, ana mia juṃabe kamiu maka kuvijikia kuvitilubar kijokijo nalo na ea kanaku buruṃara bogo na vonganei nei napano ṃa nojo bija kamiu? Peli kamiu maka kuvisidom kuvitilubar ga kovio? Tomnei, kamiu kubarvar laka ka kamiu, kuber vite nalo mia maka kuvilaii.”

<sup>57</sup> “Bo ka ver kamiu kuvilavon ka kuvijikia kuvitilubar kija ka ṃarabo na vabe naruei na naio memedu ka kamiu kuvitakiio.

<sup>58</sup> Verver bogo tai jau kala baravo kam juo toro tai ka titai, mia naio sidom rivurso kavan kotumolu kotu kamu ea toro na tibureiano mirano riviorio, mia bo ka jau kala vio sikili ka keil vatitig rivija naio, beamu ka bogo na kamiu maka kuvoru komeli vo. Ver makanio, ṣeli mia naio ruduso kotoa toro na toru naṃa jjiibure toro juṃano, ana na toro na toru nei ṣeli mia naio ruduso kotoa tomu naṃa abokakar tomu nalo juṃalo, ana mia nalo aduso kotoa yimo na tetavokoiano.

<sup>59</sup> Ierinio, kiniou neberii kaso, ka ver tibe na, mia jau maka kejikia kataluvo bereio den yimo na tetavokoiano nene, rivanvano-o mia jau kovulu bulag nono kiamo mauo riviniu beamu vo, ana mia jau komijikia kataluvo bereio.”

“Mia iliano nei naio be riano ban kenemiu meuliano na yetemeriba nei, a be riano bunu ea tivelinio na kamiu bija Atua.”

# 13

## *Ver koviligso re, mia jau kaŝaro*

<sup>1</sup> Mia tomu nalo na aju ea bogo na, ajukunu ka kulo Kalele tealo ban Yesu, napano toro na toru na Romo nei Pailat mila bajago na kirivova tai kalo. Nalo aberenio “Nalo na ajua Atua Kunuano Lu, mia monloglog bogo na aju amilotu ka Atua, amila sida banio, mia Pailat nalo abinimej amiel binvinlo aŝarmŝaro, mia amila kitkito kialo burukija bija burukija na kialo sida neibano ajuŝa amilaio.”

Naruei bogo na aber vite nei ka Yesu, ajidomii ruei ka vite na bova nei na maluvo kalo, ŝeli be Atua kiano vironiano tai banlo, bior kialo vovaiano tai napano ŝeli nalo amilaio.

<sup>2</sup> Ana na Yesu berdoŝe banlo, berinavo “Kamiu kuvial kulo Kalele nalo na aŝarmŝaro kirivova jibe na juŝabe na? Peli kuberiamŝa nalo abe tomu na bova laka, jovulu kulo Kalele dolu nalo, naruei naio be kialo vironiano ga?

<sup>3</sup> Kiniou nojidom nover ka kamiu never makanio, naio maka tibe na. Mia monoka kuvitikar vatitig rivu, bior ver kuvilig re kamiu, mia kumijikia kuŝaro bunu ea bajago na jibe na.

<sup>4</sup> “Mia kamiu kuvisidomii von yimo na sir-aragkuiano napano joa komeli na Sailomo. Naio bavin loa laka, mia bogo nanua naio mijoru, na jibirbil ea tomu nalo mia nalo duelimo ba arolu [18] aŝarmŝaro. ?Mia juŝabe ka nalo na? ?Peli kumituŝa kuber nalo na bunu abova loa ka kulo dolu nalo na vio Jerusalemo, mia nina naio jibe ka kialo vironiano tai, a?

<sup>5</sup> Mia makanio, naio bunu maka tibe na. Mia kiniou neber bereio ka kamiu, neber monoka kuvitikar kamiu rivu, bior ver kuvilig re kamiu, mia kumijikia kumãarmãaro bunu ea bajago na tai jibe na.”

*Kijokijo na burubilivo na maka takou*

<sup>6</sup> Ana na Yesu ber jamerijiano tai bereio, napano naio ber jibe nei, berinavo “Toro tai, kiano burubilivo tai jua kiano tiniavio. Mia bogo tai ana toro nei naio binimeis ea burubilivo nene, jidom ka rial von naio jakou ðeli na maka takou. Naruei naio binimeis mial ka buruiesi nene maka takou leleio.

<sup>7</sup> Mia naio mil ban toro namãa bitikar kiano tiniavio, berinavo ‘Vonganei bokar yuka tolu ruei, napano nobinimeis najirarago ka burubilivo nei mãarati, mia maka lele tai. Niabeku mave ka ruei, naio jukoko vio na bo nei kurano ga, mia jau ketelario ga rivano.’

<sup>8</sup> “Ana na toro na imãauano neibano naio tinien miia burubilivo nei toru, ana ber ka kiano toro na toru nei, berinavo ‘Ver tumãabe, mia kito ralavon ka rotuvan tu ka yuka ve takurano bereio von. Ka mia kiniou nalavon ka noimãau ka vatitigio von beamu vo, mia nekil ðili selvivia burupati, ka mia novisivisi tera buluku ea ka mia rila riluo rivu.

<sup>9</sup> Naruei ver riluo rivu, rivar kija mãarati ka yuka yako, mia mijikia tu bo tibe na bo kanio, ver makanio, mia jau komijikia ketelario rivano.’”

Jamerijiano nene ber be bogo telisu kiano jo ka tomu nalo amijikia aviliglo, verver makanio mia Atua rijev vironiano vanlo.

*Yesu mieliel ka tiramoruo tai ka Legiano Lu*

<sup>10</sup> Ana ea Legiano Lu tai, mia Yesu naio joña berloglog tomu nalo joomo ea kialo yimo na volkouano.

<sup>11</sup> Ana ea vio na be tiramoruo tai naio jo, napano niununo na bova tai na mieiano joa naio. Ana niununo napano miadikar naio ka yuka duelimo ba arolu [18] ruei, napano mila na tiramoruo nei taakano juþe laka, naio maka rijikia rivitiri naio memedu leleio.

<sup>12</sup> Mia bogo na Yesu jirarag loglogio, bio naio binimei, ana mil banio, ber jibe nei berinavo "Tiramoruo, kiniou neber jibe nei, neber jau, mieiano naña bivikakarso na, mia ritaluvo denso vonganei ga."

<sup>13</sup> Ana bija iliano nei Yesu midu juñano joaio, mia vaarakurano ga taakano binimei memedu bo bereio, naruei tiramoruo nei mijog bo toru laka, miaia Atua Soþi-o mia.

<sup>14</sup> Mia navurimñaraboiano na yimo na volkouano nei, naio tinien jer Yesu ka napano naio mieliel ka tiramoruo nei ea Legiano Lu. Naruei naio mil ban tomu nalo, berinavo "Jibe ka na kito romijikia ruei, romijikia ka roinñauka bogoti ve ari, mia bogoti takurano, maka roinñau. Ver kamiu kuvisidom ka aieliel ka kamiu, mia bo kanio kumei ka bogoti ve ari ga, mia Legiano Lu na jibe nei naio maka rive bogo nene rimemedu."

<sup>15</sup> Ana na Tubo berdoþeio berinavo "?Juñabe? Peli kamiu kumituña kumijian kenemiu bue ñarauo nalo ka Legiano Lu, þeli maka kumijianlo? Peli na kamiu kumituña kubagan

kenemiu temeul nalo a kumituña kumiyon uei banlo ka Legiano Lu, ñeli na maka kuvila tibe na? ?Mia bior vaio ana maka kuvisaaro ka namila batitig tonovo tai ea tiramoruo nei? !Kamiu kubarvar laka, kuber vite nalo mia maka kuvila!

<sup>16</sup> Tiramoruo nei, naio be kuviviniedo tai napano kito robiniu romiyotuba ea yati na tormoruo Epraamo, mia Najuboliboiano miorikar naio ka mieiano nei mijil yuka duelimo ba arolu [18] ruei. Ana kiniou namial jibe ka Legiano Lu naio memedu ga ka kito rovurular naio den vio na bova nei napano joaio.”

<sup>17</sup> Mia bogo na Yesu ber iliano nei, mila kiano uolu nalo nei amijog amimou toru laka ea tomu nalo miralo. Mia kulo dolu nalo, nalo ajaaro toru laka ka imãauano na bo nalo na miroano napano Yesu milaio banlo.

### *Jamerijiano na kurukubako*

*Mataiu 13:31-32; Mak 4:30-32*

<sup>18</sup> Mia Yesu mil bereio, naio berinavo “? Kiniou never iliano venia rivan kamiu ka mia rila na kamiu kuvijikia ka Atua kanano navenatuboiano naio juñabe? ?Mia kiniou never navenatuboiano nene naio javukia vite venia?

<sup>19</sup> Mia nalavon ka nala rimeravo rivan kamiu ka jamerijiano nei, napano naio ber jibe nei, berinavo, Navenatuboiano nene, naio jibe ka kurukubako napano mijoru ba birakar joa buruiesi tai. Marati nei kiritavaso leleio, mia bogo na miluo, binimei be buruiesi tai na burutomoruo laka, naruei menu nalo abinimei amila mñalo niuku nalo jua jaati nene nalo.”



*Jamerijiano na isi**Mataiu 13:33*

<sup>20</sup> Ana Yesu ber jamerijiano dolu tai bereio banlo, naio berinavo “?Peli mia kiniou neverinavo Atua kiano navenatuboiano naio javukia vite venia bereio?

<sup>21</sup> Navenatuboiano nei, naio javukia tira tai namã jo milalaglag isi na teliki ga bija burumãara baju na yevi tai, naruei isi na teliki nei naio mila joko nonovio miyuku toru.”

*Be m̃arabo juo ga**Mataiu 7:13-14,21-23*

<sup>22</sup> Ana Yesu naio jo midu kiano m̃arabo bereio, naio jo jidom ka rivavin bere Yerusalemo. Mia bogo na jo ban jibe na, jo miel jel ea komeli nalo, jomã berloglog tomu nalo.

<sup>23</sup> Naruei ea komeli tai, be toro tai bika denio, naio berinavo “?Tubo, nalo na mia avokar meuliano, nalo telabo, p̃eli na maka ve telabo laka?”

<sup>24</sup> Naruei Yesu berdop̃elo, berinavo “Kamiu monoka kuvilavio sikili ka mia kuva joomo ea bulutavo dolu na, napano na teliki ga. Kiniou neber riano ka kamiu, ka mia tomu ve telabo asidom ava joomo, mia maka ajikia alaio.

<sup>25</sup> Nina bior iorou, ana mia toro na toru na yimo mia naio rial ka bare ruei, mia naio tumolu, tetavoko vatitigio bereio. Ka bogo na, mia kamiu ve telabo kumei kuvidu buron kamiu ea m̃aratavo nei, mia kuviniu kuvio kuverinavo ‘Tubo, kumemi nuber bo ka jau kovetavo ka kumemi.’ Mia toro na toru nei naio riverdop̃e

ga tibe nei, naio riverinavo 'Ai, abe kiniou maka najikia kamiu leleio! Kamiu kube kulo be nalo?'

<sup>26</sup> Ana na mia kamiu kuvilavon ka kuver kanio ka bogo na, kuverinavo 'Ana jumãbe, jau maka bunu kosidomial ka kito naruei rojũa rajinan vio takurano damãriga beamu mugaruei ña na? !Kumemi nene nei naruei naña jau kobinimei ña koberloglog kumemi janea vio medave nalo ea kenememi komeli nalo!'

<sup>27</sup> Mia naio river kalo, riverinavo 'Kiniou neber ka kamiu vaarakurano nua ruei, ka maka lele nejikia kamiu, kamiu kube kulo be. Mia namijikia ga ka napano kamiu kube tomu naña amimãuka bajago na kirivova ga. !Kamiu, kuvitaluvo den kiniou vonganei!'

<sup>28</sup> "Ka bogo na, mia kuvijog rivova ve toru, mia ve burumãara tegiano, kuviser mãarjuvomiu. Nina bior ka mia kamiu kuvial ka napano Atua kiano tomu novo nalo, jibe ka Epraãmo, Aisak, Yakovo, a naverialiano dolu nalo bunu, nalo aju bo jouro ea kiano navenatuboiano ruei, mia kamiu, avuku kamiu kuvitu bo ga tavio tibe na.

<sup>29</sup> Ea bogo na, mia kulo dolu vetelabo ayotuba ea sudu veri na yetemeriba nei, amei ka atutano ka asinan ea burumãara jokoluolu na jouro ea Atua kiano navenatuboiano, mia kamiu maka kuvijikia kuva jouro eaio.

<sup>30</sup> Mia tibe na naruei, ka nalo naña aju iorou, mia atu tukamu, a nalo naña aju jukamu, mia atu iorou."

*Parinio Tubo Erot naio jidom rue bin Yesu*

*Mataiu 23:37-39*

<sup>31</sup> Ka bogo na, ana Yesu jo bavin Yerusalemo kia vo, mia Varisis nalo tai abinimei eaio, aberial kanio, aberinavo “Peli jau maka kejkia, ana Parinio Tubo Erot na, naio berkar ruei ka mia ruebinso. Bo ka jau kataluvo den tanobuku na naio joŃa be tubo eaio, jau kovuro kava Yutea beamu vo.”

<sup>32</sup> Ana na Yesu berdoŃelo berinavo “Kiniou maka nosidomial souo kurkuru na ka naio be toro tai na mijikia rila titai ka kiniou. Kuva kuverial ea mirano kuver kiniou noto nala kiaku iŃauano beamu vo. Kuver kanio kuver kiniou nojoŃa nemijil bulag siŃaro nalo, a nojoŃa nemieliel ka tomu nalo, a mia notoŃa noimŃau tibe na banei, beni, veua bereio, rivano-o mia neial ka namila nonovio ruei.

<sup>33</sup> Mia kiniou namijikia na ver ka kamiu, ka mia kamiu kuvisidomii mŃlea re kiniou, bior ka legiano nalo nei, kiniou nojo najaluvo den tanobuku nei navan tibe na naruei. Monoka najaka nava novoru Yerusalemo vo, bior namial jibe ka vio na naruei naŃa tomu nalo ajumŃa amuebinvin naverialiano nalo eaio, jikar nua ruei.”

*Yesu naio tinien miia vio Yerusalemo*

<sup>34</sup> Ana na ka bogo na, Yesu tinien miia Yerusalemo Ńa jegidu kanio, naio berinavo “! Yerusalemo, Yerusalemo-o! Bior vaio ana kojoŃa komuebinvin naverialiano nalo, a kojoŃa kojuba binvin tomu nalo naŃa Atua joŃa milalo abinimei easo? Vatelabo kiniou nejidom nodu jumŃaku selvivko kiamo tomu nalo tibe ka

sabarou bio kirikiti nalo abinimei amiyuku jel tano ka sibiano, mia kanamo tomu nalo maka asaaro kanio.

<sup>35</sup> Mia komialio na, Atua naio jo bilig taakano kaso ruei nei, ana naio miila kiniou nebinimei be moti nei naruei, ana naber kaso, neber mia kanamo tomu nalo ajikia re aial kiniou bereio, rivano-o rivokar bogo na avitilubar kiniou, averii kiniou averinavo

‘!Atua soṗi loa laka, jau keilivu ka naio napano naio jo binimei ea siamo!’”

## 14

### *Yesu mieliel ka toro na mieiano tai*

<sup>1</sup> Ana ka Legiano Lu tai, navurim̄araboiano na Varisis tia bio Yesu ba jinano ea kunuano. Mia tomu dolu nalo tealo nam̄a maka tiniel tii Yesu, nalo aju bunu ka bogo nei, ajum̄a abitivitii julaka ver naio rila vite tai na maka rimemedu, mia amijikia ala tibekovio ka naio.

<sup>2</sup> Mia toro na mieiano tai jo naliko joomo ka bogo nei, napano toro nene niabene nalo jurojurobi tortoru laka. Mia Yesu mial toro nene,

<sup>3</sup> naruei mil ban naverloglogiano na tuboiano nalo, bija Varisis nalo napano aju, naio bika denlo, berinavo “?Jum̄abe ka tivelinio na kiado tuboiano? ?Naio berenio kito romijikia reieliel ka toro ea Legiano Lu, ṗeli na ber maka rejikia reieliel kanio?”

<sup>4</sup> Mo bogo na Yesu bika vikadeniano nei, amial jibe maka bunu ajikia asian verdoṗeiano rivanio, mia maka bunu ail. Ana na Yesu buru toro nei binimei vaataro keanio, ana mieliel vatitig ka

naio bo bereio, berinavo mijikia rivan bereio vonuo.

<sup>5</sup> Ana naio mil ban nalo na aju, naio berinavo “Kamiu kuvilavon ka kuvisidomii vonio. Ver kamiu tai, ka Legiano Lu, kenerinio tai, ĩeli na kanano temeul tai, naio riva rijoru rivatove ea bulukuei tai, ana mia jau kala tumabe? ?Mia jau monoka kala soĥeli ga kava kovurular bereio, ĩeli na mia koverinavo ‘Uerei bova naruei, vonganei be Legiano Lu ruei, tuboiano berenio mia kiniou noimau re ea Legiano Lu, mia ĩeli keneriku ĩeli na kanaku temeul na tobo beamu vo ea ĩili na, mia beni ga ana mia nava novuru lario?’ Peli mia maka bunu keĥikia koto rorea titai bereio, mia jau kala soĥeli ga na.”

<sup>6</sup> Mia nalo maka bunu ajikia ka mia aver verdoĥeiano venia ka tivelinio na rivan naio bereio, aju buru ga jibe na.

*Maka rivu ka toro riyuku lelar naio bereio*

<sup>7</sup> Mia bogo na aju ka atutano ea sinaniano, Yesu bitilubar ka nalo tealo napano boru na jokoluolu biolo abinimei, tiniel ĥii toru ka ajidom aleal vio na bo, nalo aba ajutano mave ea tomu na tortoru jelelo. Ana Yesu mial kialo bajago na m̃arouano nei, ana ber kalo, berinavo

<sup>8</sup> “Ver bogo tai avioso ka kavan ea sinaniano na soriano tai, ĩeli na jokoluolu tai na jibe na, maka rivu ka koyokovo soĥeli ka kava kototano ea tomu na tortoru jelelo garuei. Peli jau maka keĥikia ka vio na, amila batitigio bo jororea toro na toru tai,

<sup>9</sup> ana mia boru na jokoluolu nei mia rimei river ka jau, riverinavo ‘Aiou kuruaku liki, mia ĩeli jau kavatove beamu vo, bior jau kojom̃a kojotano ea kanaku toro na toru jeleigio na.’ Naruei mia jau kavar burum̃ara imouiano tai na rila kojog ve kirivova laka, mia monoka jau kavatove ga bereio, kalavon ka keleal kiri vio sesa tai ka na mia komijikia ketivan miramo eaio.

<sup>10</sup> Mia bajago na bo naio jibe nei: Ver avioso ka kavan ea sinaniano tai, bogo na kovoru eaio, jau kava kototano rivija tomu ninio ga. Mia ver boru na jokoluolu nene naio rimei, mia naio rialso, mia naio riverinavo ‘Oi, burum̃ara toro, kiniou nemije batitig jelemo na jo mave ruei, mia kito ve juo ravan ana neti vatitigso.’ Ana ka bogo na, mia komijikia kojog rivu ve toru laka, ka boru na jokoluolu rivotiri larso tibe na ea kulo dolu nalo miralo nam̃a kumisinin vio takurano.

<sup>11</sup> Tibe na naruei, ka mia toro nam̃a miyuku lelar naio, mia adu naio totano, mia toro nam̃a midu naio jotano mia ayukular naio to mave.”

*Bo ka kovio talim̃asa bunu rimei ea kiamo jokoluolu*

<sup>12</sup> Ana ka bogo na, Yesu ber iliano tai bunu ban toro napano bio naio binimei jinano ea kiano vonuo, naio berkanio, berinavo “Vonganei, kito romial ka napano tomu nalo, bogo na amila sinaniano tai, tiniel jii ga ka avio kialo bilbilu na bo, ĩeli kurualo nalo, ĩeli na kialo m̃aratavo dolu nalo, vija bunu tomu na tortoru nalo na abe sanibaiano nam̃a aju vaataro ga kalo. Ajum̃a

amilala jibe na naruei, bior amijikia ka iorou, ver nalo nei bunu ala sinaniano tai bogo tai, mia monoka ala meran rivanlo bereio.

<sup>13</sup> “Mia bajago na bo ka rila bogo na jokoluolu naio maka tibe na. Bo laka ka kovio kulo dolu nalo, jibe ka nalo naña abe talimãasa, ãeli na nalo na niabelo maka rivu, ãeli na jaba nalo, ãeli na merebono nalo, ãeli na tomu nalo na ajiberbena, amei asinan rivijaso.

<sup>14</sup> Tomu nalo na jibe na maka ajikia ala meran rivanso bogo tai, mia bogo na Atua mial ka jau tiniem jaaro ka koburulo abinimei ajinan kamlika ea kanamo vonuo, mia naio saaro laka kaniso. Karina naio rilivu kaso, a mia jau kavar vonga kiamo ijaiano na bo biorio, ea bogo na naio rila kanano tomu na memedu ameul bereio den nañariano.”

### *Jamerijiano na soãeiano*

#### *Mataiu 22:1-10*

<sup>15</sup> Ana na toro tai napano joa sinaniano nei, naio mijog ka napano Yesu berii ka mia Atua rivitiri bulag kiano tomu na memedu ea legiano na maaro, naruei naio berinavo “!Ierinio, mia rivu lie rivan kito ka bogo na, ka napano mia kito raiasol burumãara jokoluolu na jouro ea Atua kanano navenatuboiano nene!”

<sup>16</sup> Toro na, ãeli naio joña ber naio bo kovio ruei, mia tomu na jibe na maka asidom ava jouro, naruei Yesu ber jamerijiano tai ea tivelinio na, napano jibe nei “Toro na toru tai, naio jidom ka rila sinaniano tai, mia naio bio tomu nalo telabo ka amei.

17 Ana bogo na naio miomon vite nonovio bisi ju, ana miila kiano toro tai ka riva rivuru nalo namã abiolo ruei ka amei.

18 Mia bogo na kiano toro nene bano-o miy-otuba kalo, nalo abiniu abare ga, ajuñã amila ilisoņeiano ga. Tai ber jibe nei, berinavo 'Ierinio, mia kiniou nobulu von ga kiaku niatano tai, naruei nojo napano ka neial von ka borotano nene juñabe. Mia kover ka toro na toru kover aua toru vanio, mia maka nejikia neviedu vonganei.'

19 Mia dolu, naio ber jibe nei, berinavo 'Ierinio, mia kiniou nobulu von ga kanaku buluku nalo tai, ka avuru kanaku rukuruku nalo, naruei nojidom ka nava neial ka be ãirilo jikili juñabe. Mia kover ka toro na toru kover aua toru laka, mia maka nejikia neviedu vonganei.'

20 Mia dolu bunu, naio berinavo 'Ierinio, mia kiniou namila jokoluolu na kanaku soriano maka vesiou vo, naruei namial jibe ka ãeli mia maka nejikia neviedu, bior saba telabo laka.'

21 "Ana na toro nei binimei berial iliano nalo nei ka kiano toro na toru, mia bogo na naio mijogio mila naio mila siniabu kalo. Naruei miila kiano toro nei bereio, naio berinavo 'Mo, jau kala soņeli kavan ea mñarabo nalo na tertelisu vaatara na, kava keleal talimãasa nalo, vija nalo napano abe mervitovi, vija merebono nalo, ana kuvurulo amei ea kiado jokoluolu.'

22 Naruei naio ba milαιο, mia iorou kanio ana naio binimei bereio ea kiano toro na toru nei, ana naio berinavo 'Tubo, vite napano jau koberenio, kiniou nemilaiio ruei, mia tomu



telabo abinimei ruei mia be vio toru jo kiano vo.'

<sup>23</sup> Ana miila naio bereio, berinavo 'Tibe na, jau kavan bereio, kava lie kija ea vio nalo na komeli, mia katadua sikili toro kei na ver jau keialio, ka monoka amei, ka aison kanaku burusio, ka rila jokoluolu nei rive kirinovo tanea.

<sup>24</sup> Nalo dolu naña amila ilisoņeiano na kirivova na, kiniou nobiolo batitig ka amei ea jokoluolu nei ruei, mia vonganei, mia maka nalo tai kalo napano mia rijikia sen kiri sinaniano nei tai leleio ea jokoluolu nei. !Kiniou neber vatitigio kiana!''

*Yesu monoka to tukamu ea kiano naiagagoano nalo kialo meuliano*

*Mataiu 10:37-38*

<sup>25</sup> Naruei Yesu naio jo midu kiano m̃arabo ka rivavin Yerusalemo bereio vo, mia tiniobi niukniuku vio bujo kalo ajum̃a ajakisorio. Amiel bano-o, mia naio barņilig kalo, ber kalo, berinavo

<sup>26</sup> "Toro na jidom rimei rue jaaku, mia naio monoka rudu kiniou noto tukamu ea kiano meuliano, kiniou loa laka lie vo ka karam̃ano, kenieno, koano, kenerinio, kuruano, Ńeli na kuviviniene. Toro napano ver maka riilkue ka kiano meuliano, naio maka rivare ka rimei rive kanaku naiagagoano tai.

<sup>27</sup> Mia toro naña jidom ka rimei rive kaku naiagagoano, naio monoka rila tibe nei. Naio monoka rudu kiano m̃akolkolo, rue jaaku nam̃ariga, tibe ka mijamo ka naio ka rijog jaleleano rivior kiniou.

<sup>28</sup> Bo ka kuvisidomii vatitig rivu vite nei beamu vo, beamu ka na mia kuvil soḡeli, kuver mia kuvitakisor kiniou.

“Naio jibe ka na toro tai, ver naio sidom ka riṁauka buruṁara yimo tai, naio monoka totano, rivitii beamu vo, mia rivuluku vatitig beamu kiano veru na vuliano na iṁauano nei, mia monoka rivitii veve rivu ka naio bare ka mia rila nonovio buruṁara iṁauano nei, ḡeli na maka rivare.

<sup>29</sup> Ver ḡeli na, mia naio tikar riṁauka batitig bulapati, rivavavin kija ga, ana mia naio riilo ka napano juṁano bulati garuei, ana na mia iṁauano nei tei riuedom tobo. Naruei bogo na kulo dolu nalo amei aial yimo neibano jo bija bayimo nene be togio ga jo, a maka ve vodobi nene, mia avital niegeniege ṁelea toro nene-o mia averinavo

<sup>30</sup> ‘O, kema na, kiano jidomiano kirinovo laka. Naio jidom riṁauka kunuano, mia maka rila batitig tiiano na iṁauano, mila na maka rijikia rila nonovio riviniu.’

<sup>31</sup> “Jibe ga na, toro na jidom riverkar ka mia rimei rila iṁauano vija kiniou, naio monoka rila tavukia parinio tubo tai, napano toro na toru dolu jumolu ka naio, buru kiano buruṁara taara na mira abinimei ka ala mira kanio. Tomu na mira na parinio tubo nei kanano nalo maka ve telabo tavukia toro na toru nei kanano, mia parinio tubo nei monoka rivitii vatitigio ga beamu vo, monoka sidomii vatitigio rivu ka naio mijikia tovulu buruṁara taara neibano naio jo binimei ka naio kiana, ḡeli na maka rijikia tovulio.

<sup>32</sup> Ver naio rial ka maka rijikia rilaio, naio monoka riila toro rieliko m̃arabo ka toro na toru nei, ka bogo napano naio jo koalabo kia ga vo. Naio monoka rivika denio, ka mia rivulu venia na ver toro na toru nei riverenio, ka mia ave juo atua tum̃aro bereio. Tibe na ana naio monoka rivatove ka toro na toru nei, rijamo ka naio nonovio rivanio.

<sup>33</sup> Mo kamiu nam̃a kumisidom ka kumei kuvitakisor kiniou, kamiu monoka kuvitilubar ka kamiu bunu monoka kuvila tibe na ka kiniou. Toro na maka rijamo ka kiano meuliano kar kiniou, vija rera garuei kiano saba nalo, naio maka rijikia rimei rive kiaku naiagagoano tai.”

*Jamerijiano na vaatei*

*Mataiu 5:13; Mak 9:50*

<sup>34</sup> Ana Yesu ber jamerijiano dolu banlo, naio berinavo “Vaatei naio be tonovo tai, mia ver bogo tai ana vaatei nene naio rijeja re bunu rivu, naio maka bunu rijikia rila kiano im̃auano, p̃eli na maka bunu ve titai rijikia rila rijeja rivu bereio.

<sup>35</sup> Mo vaatei naio jibe na, naio maka rijikia rila im̃auano na bo easo ea kanamo vonuo, p̃eli na ea kanamo tiniavio bunu. Vite na bo kanio, bo ka avuku rivan ea vio na soro ga. Nina naruei be tovorovo na kanaku naiagagoano napano milaluvu kanano moroano ka rila kanaku im̃auano.

“Ana toro na be tiliniene bo, bo ka naio rijoglubar kanaku iliano nei.”

## 15

*Yesu mila bilbilu naliko tomu na bova nalo*

<sup>1</sup> Ana ea bogo nalo na jibe na, amial ka napano tomu tealo napano tomu dolu nalo maka tiniel tiilo, jibe ka tomu na takis nalo, bija kulo dolu nalo napano Varisis aber abova, nalo bunu abinimei vaatara ka Yesu ka aiagago ka naio.

<sup>2</sup> Naruei bogo na Varisis naliko naverloglogiano na tuboiano nalo aju amial ka Yesu jomãa tinien jii ka tukunu vijalo, amial kirivova, ana aju aberinavo “Riano ga, tete na naio jidom ga tomu na kariano na jibe na, a bogo nonovio naio jidom ka riva sinano vio takurano naliko bunu. ? Peli naio mial ka kialo bajago ga naio bo, a kiado naio bova, a?”

<sup>3</sup> Mia kialo jidomiano jibe na mila ana Yesu jukunu banlo ka jamerijiano nalo namãa aberii jumãabe ka napano naio binimei ea yetemeriba nei kar toro napano milaluvu m̃arabo.

### *Jamerijiano na nunu napano ba kovio*

#### *Mataiu 18:12-14*

<sup>4</sup> Yesu kiano jamerijiano na be moti ka tivelinio na naio jibe nei, napano naio ber kalo, berinavo “Toro tai, naio be toro namãa bagan nunu nalo, mia kiano nunu nalo abokar toromomou takurano [100]. Kiano nunu nalo telabo mugaruei jibe na, mia ver bogo tai, nalo tai riva kovio, mia naio sidomveia ga, ðeli mia naio sidom bijovijon kano? Mia monoka naio tuvan kiano nunu dolu nalo na atu bo beamu vo, mia naio rivakar napano ba kovio, mia naio sirag rialelio.

<sup>5</sup> Mia bogo napano naio milealio, mia saaro ve toru laka, mia naio rudular nunu tavaliki nene

rimon mave ea burusovonano, ana naio rudu rimei bereio.

<sup>6</sup> Ana na iorou, ka bogo napano naio batove binimei ea kiano vonuo bereio, mia rivio nalo na ea kiano m̄aratavo, p̄eli na kiano bilbilu dolu nalo bunu, ka amei. Ana mia naio tukunu vanlo, riverinavo ‘Ei, vite tai napano kito ramijikia rasaaro ve toru m̄ele riviorio. Kanku nunu tai napano ba kovio napano ba kovio laka garuei, mia karina naban kanio, najiragio-o, namilealio. !Bogo napano namilealio, najaaro mia maka garuei!’ ”

<sup>7</sup> Ana Yesu mila meravo ban Varisis nalo, berinavo “Mia tibe na ga bunu ea vio mave. Tomu telabo napano ajua vio yetemeriba nalo ajavukia kamiu, be tinielo ka aber nalo amemedu ruei, ana p̄eli mia saariano na mave rivior kamiu tomu kinkin na jibe na kovio? Mia ver toro na kariano tai ga, naio rivilig kiano meuliano, mia ve burum̄ara saariano ea vio mave, riva lie vo ka mia ve burutomoruo laka. Vite na naruei mila ana tinieku jaaro ka notukunu vija tomu nalo nam̄a kamiu maka tiniemiu tiilo.”

*Jamerijiano na kurukuveru tai napano ba kovio*

<sup>8</sup> Ana Yesu ber jamerijiano ta bunu ea tivelinio na, naio berinavo “Be tira tai, kiano kurukuveru duelimo, napano naio miduvan batitigio bo jo joomo ea kunuano. Ana ver bogo tai, rimei ber riadu kalo mia rial ve takurano naio mijoru ruei, ba kovio tai, mia naio rila tum̄abe naruei? Monoka naio rigoru yulu, rija bulag kiano saba nalo, a riakon vatitig vio ea kunuano, rivano-o mia rilealio.

<sup>9</sup> Ana bogo napano rileo, mia naio rivio nalo na ea kiano m̃aratavo, p̃eli na kiano bilbilu dolu nalo, ka amei. Ana naio tukunu kanio vanlo, riverinavo 'Ai, abe vite tanie napano romijikia rojog rivu ve toru kanio. Kanaku buruṃara kurukuveru tai nemilaluvuio mijoru banbo kovio tai, mia karina, nejiragio bano-o ana nemileo bereio. !Bogo napano nemileo, kiniou nomijog bo-o mia!'"

<sup>10</sup> Ana na Yesu mila meravo ka Varisis nalo, naio berinavo "Naruei mia tibe na ga bunu ea vio mave. Ka bogo napano ver toro na kariano ga tai naio rivilig kiano meuliano, mia Atua kiano nailiano nalo aialio mia saariano ve toru laka ea vio mave."

### *Jamerijiano na m̃eaku napano ba kovio*

<sup>11</sup> Mia Yesu kiano jamerijiano na maariano na tivelinio nei, naio jibe nei, napano berenio berinavo "Kulovu tai, be kenerinio suṃano juo, naṃa aju amiṃau bijaio ea kialo borotano.

<sup>12</sup> Ana ka bogo tai, maratoru na naljuo nei naio jumolu, berial ka karam̃alo abe juo, berinavo 'Teta, kiniou nejidom navar saba togio na jajum̃amo ve kanaku ga.'

"Mia vite na maka rimemedu leleio ka naio rivika tibe na, bior karam̃alo naio meul jo kia vo. Mia karam̃ano maka ril, naio jan ka nonovio kiano saba nalo, mijamo ka togio ban m̃eaku nei, a togio be motoru kanano.

<sup>13</sup> Avona bisi, ana na m̃eaku nei naio jom̃a p̃ilṽili ka saba nalo napano karam̃ano bar banio, mia iorou, maka vesiou, amialio ka naio mison nonovio kiano saba nalo, bar kiano puruveru

beven ka bano. Mia ba joa buruvenuto dolu tai koalabo laka, ana ea vio na, naio ba mijamo ka momon naio ban bajago na bova, jinan ka puruveru nei bano-o mia mila lelan nonovio biniu.

<sup>14</sup> “Vonganei naio bitilubar ka juṁano bulati naruei, ana ea bogo na, buruṁara vituiano tai binimei bokar buruvenuto neibano naio joaio, naio midu ṁeaku nei naio joa vio tai na kirisikili laka kanio.

<sup>15</sup> Ana na naio ba jirag iṁauano tai ka mia riṁaukanio ka mia ṁeli mijikia rilarur kiano meuliano, naruei ba miṁau ea toro na toru tai na vio nene, ba bagan kiano kiribue nalo. Meaku nei naio maka rimemedu ka rila iṁauano nei, bior naio bel ka kiribue jibe ka kito kulo Ju dolu nalo, mia nina be iṁauano takurano ga napano naio mijikia rilealio.

<sup>16</sup> “Naruei naio miṁau jibe na bano-o, mia maka avar sinaniano vanio, a maka ṁarabo tai ka rileal sano sinaniano eaio, mila jijer naio naṁariga. Naio jijer jibe na bano-o mila naio jidom sian juṁano rivan ea basaro na sinaniano torogio na menunū bija botuotu na kon naṁa kiano toro na toru naio joṁa bagan ka kiano kiribue nalo ajenio.

<sup>17</sup> Mia bogo napano jidom ka rila tibe na, naio bitilubar naio bereio, naio mial ka kiano bijuku ṁeteano ga mila lelan naio bereio. Mo naio tinien maio bereio ka karamṁano bija kiano vonuo, naio berinavo ‘Riano ga, kiniou nomi-avovu toru laka. Kiaku bijuku ṁeteano ga mila kiniou naṁaro ka vituiano ea vio nei, mia

kosidomii von nalo naŕna atibe ka tomu na iŕnauno ga na teta kanano. Naio jomŕa jian sinaniano novo nalo telabo banlo ka legiano nonovio ga, maka ajikia asen nonovio.

<sup>18</sup> Ver tibe na, bo laka ka kiniou nalavon ka navan bereio ga, noimŕau kija ga tavukialo. Mia kiniou nava naial teta, never kanio, neverinavo “Aiou teta, kiniou namila burumŕara kariano va tai ban Atua, a banso bunu.

<sup>19</sup> Vonganei, maka bunu rimemedu ka jau keial kiniou tibe ka nebe kenerimo tai, mia nobika denso ka tiniem riia kiniou ka noimŕau kija ga tavukia nalo naŕna amimŕau kanamo.” ’

<sup>20</sup> Mia naio mila vatitig kiano jidomiano jibe na bisi, naruei naio jumolu, binimej ju lilie ju lilie, binimej boru ea karamŕano.

“Mia naio maka rijikia, mia karamŕano naio jo tinien maio ka naio julaka ga, naio jomŕa jirarag lili ŕarabo ka ŕeli mia naio rimej. Mia bogo na naio ju koalabo ka kunuano kia ga vo, mia karamŕano bitilubar naio, tinien miia naio-o mia, ana jikiti ka riva rivitavo vijaio. Mia bogo napano naio binimej bokar kenerinio nene, miabukario ka jumŕano be juo, maka sidom tuviano bereio.

<sup>21</sup> Ana mŕeaku mil ban karamŕano naruej, berinavo ‘Aiou teta, kiniou nomila burumŕara kariano va tai ban Atua, a banso bunu. Vonganei, maka rimemedu ka jau keial kiniou notibe ka kenerimo.’

<sup>22</sup> “Mia karamŕano berbureio, bio kiano tomu na iŕnauno nalo, berinavo ‘Ai, kamiu kuvila soŕeli kuva, kuvar kulumŕarauo na bo laka, vija



kiano kulubue na jaano, a kiano ãejelinio, vite nalo na jibe na, kuvar kumei kuviya eaio.

<sup>23</sup> A kiribue ñarauo naña roju rabagan vurua ñadigdig kirinovo na, kamiu kuva kuvueio, ka kito rala sado sinaniano tai ka ramijikia rasaaro kitoliko keneriku maratoru nei.

<sup>24</sup> Bior keneriku nei, naio ñaro ruei, mia meul bereio; naio ba kovio, mia kito romileal naio bereio.' Ana ka bogo na, nalo abukudel ka jokoluolu na ñeaku neibano.

<sup>25</sup> "Ana ka bogo nene, kiritete motoru naio bavenei ea tiniavio, ba jo miñau ruei, avona kario ana naio binimeï bere vonuo. Mia bogo na naio binimeï vaataro ka vonuo, naio mijog ka ajuña amioiou, a mijog joa na voluano jo jaburu bunu.

<sup>26</sup> Ana naio mial nalo na iñauano nei tai, bika denio, berinavo '¿Ei, venia na jibe na naña aju amila vonuo jibe na?'

<sup>27</sup> "Ana toro neibano berinavo '!Ai, abe kuru-amo ña na! Naio binimeï bere ruei, meul bo kia ga vo. Tenene na, karamamo naio jidom rila sano sinaniano tai. Amue kiribue ñarauo naña na ruei!'

<sup>28</sup> Mia bogo napano motoru mijogio naio tinien mimi, maka riva joomo naliko. Naruei karamano binimeï mil banio, ka rivuru naio riva joomo, mia naio miilkue ga ka rivano.

<sup>29</sup> Naio ber ka ga karamano, berinavo '¿Teta, yuka vio ruei naña kiniou nojoña nominau kanamo ea vio nei? Kiniou nomidu niomo batitig bo ea vite nonovio, mia jau maka lele kala titai tibe na van kiniou. Kiniou maka lele neial ka

napano jau koue kirikiti nani tai van kiniou bogo tai ka nala sinaniano tai vija kanaku bilbilu nalo.

<sup>30</sup> Mia bogo napano ga jau komial kenerimo novo na naio binimei vonuo bereio, ana kojumolu komue kiribue m̄arauo novo nam̄a rojuṃa rabaganio jo mijabo m̄adigdig bo na. ?Mia tete na naio mila venia bo rui banson a? Naio bar bulag kanamo burum̄ara puruveru togio rui, naio ba jen puruveru nene ka ga m̄a mior ka tire nalo ga, bano-o miakon batitig garuei. ?Peli bajago na naruei na jau tiniem jii, tenene na jau komila sano sinaniano kanio a?'

<sup>31</sup> "Mia karam̄ano tinien miia motoru nei bunu, ana naio berkanio, berinavo 'Ei, keneriku, kiniou maka m̄a noto nosidomii tibe na liki. Jau komila kiniou najaaro toru rui, napano m̄a kojo bija kiniou dam̄ariga, a kanaku saba nonovio na ju, kiniou namijamo ka nonovio rui banson.

<sup>32</sup> Be riano ka keneriku maratoru na naio milaluvu m̄arabo na kiano meuliano, mia bogo na naio bilig naio binimei bereio, kiniou tiniek miia naio, ana namial jibe bo ga ka kito rasaaro ka naio, rala sinaniano tai kitoliko. Kuruamo na naio m̄aro rui, mia meul bereio; naio ba kovio, mia kito romileal naio bereio.' "

Naruei Yesu ber ka Varisis nalo, naio berinavo "Mo, jamerijiano nei naio bisi naruei ea vio na. Mia jibe ka napano naio berenio, bo ka toro napano milaluvu m̄arabo, naio monoka rivilig naio bereio, tavukia maratoru nei. Mia kamiu monoka kuvitakar vatitigio bunu ka mia kuvitavukia re motoru nei, napano kiano jidomiano kirisikili laka, naio mijoku ka kuruano napano bilig naio ka kiano bajag moruo rui."

# 16

## *Jamerijiano na bajago na aiñau vija puruveru*

<sup>1</sup> Iorou kanio, ana Yesu mil ban kiano naia-gagoano nalo, naio berii jamerijiano tai banlo, ana naio berii toro na iñauano tai. Toro nene, naio mial ka mia kiano boru rivukular naio, naruei naio jumolu miñauka vite tai ka mia iorou ana kiano meuliano rivu ga. Jamerijiano nene naio jibe nei, berinavo “Toro na toru tai, naio bitirilar kiano toro tai ka rivitikar kiano puruveru nalo. Mia bogu tai, iliano binimej bokar naio ber kiano toro nene naio jomã jen kiano puruveru nalo, jomã mila lelan kiano saba nalo.

<sup>2</sup> Naruei naio bio kiano toro nene binimej mial naio, mil ban berinavo ‘Ei, tomu nalo amidu kanamo veriiano ban kiniou ruei. Kiniou namial bo ka mia nodu larso den iñauano na bereio, mia jau kobisi ga. Mia beamu ka na jau kavano, nojidom ka jau kavar vatitig saba nalo beamu vo, ka mia kiniou namijikia noviti jabue namã tomu nalo amila jua kiniou.’

<sup>3</sup> “Mia toro na iñauano nei naio mijog bova, berinavo ‘Riano, vonganei bova nono naruei. Toro na toru midular iñauano novo nei den kiniou, maka nejikia ka mia kiniou nesen venia naruei. Kiniou nojotano ea iñauano nei kirisiou ruei, mia maka bunu ve kiaku moroano ka nava noiñauka tiniavio bereio, a kiniou maka nosidom natan ea yimo nalo kamã noiniogiog sinaniano den tomu nalo bunu.

<sup>4</sup> Mo bo ga, kiaku m̃arabo naio tibe nei. Mia note vatove kija bereio tomu nalo kialo jabue nalo, mia asaaro ka kiniou-o mia monoka

avitikar vatitig kiniou ka bogo na ver toro na toru rivukular kiniou den imãauano nei.'

<sup>5</sup> "Naruei naio ba bio nalo napano kialo jabue jua toro na toru nei, nalo abinimei abeve terakurano eaio, ana naio berinavo '?Mo, jau komila jabue ea venia, a bokar vio?'

<sup>6</sup> Ana naio berdoŕe, ber 'Titikivaka basidobidobi duelimo toromomou takurano [100].' Ana toro neibano berkanio, berinavo 'Mo, mia kito juo rete rivatove ga. Ninei be kanamo jabue nene, jau kototano ana koyolkon bulag soŕelia nana beamu, mia kovivitauiã kar ve duelimo va limo [50] ga.'

<sup>7</sup> "Mia naio bano, ana dolu binimei, ana naio bika denio, berinavo '?Koig a jau, kanamo jabue venia?' Ana naio berdoŕe, ber 'Bake na uiti tormomou takurano [100] ga.' Ana naio berkanio, berinavo 'Mo, mia kito ve juo rete rivatove ga. Ninei be kanamo jabue nene, jau kototano, ana koyolkon bulag soŕelia nana beamu, ana kovivitauiã kar ve duelimo va arolu [80] ga.' Naruei naio mila jibe na-o mila nonovlo abiniu.

<sup>8</sup> "Ana iorou kanio, ana toro na toru nei naio bitilubar vite nei, ana naio ber ka kanano toro naãna jenjen kanano puruveru nalo beamu, naio berinavo 'Riano ga, jau kobina vatitigio ka kiniou, ana namial jibe kanamo masouano tenia, jau kobe pariparimo kija ga na.'"

Naruei Yesu berinavo "Kamiau kumial kulorinio nalo na yetemeriba nei, bogo naãna amimãau bija puruveru, mia abe masou ka bo, nalo amijikia bajago na ala bilbilu vija tomu nalo, ka mia tomu nalo nene ala rivu kalo

iorou bereio. Mia kiniou nemial ka napano keneriku nalo na miamoiano, va telabo nalo maka ave masou batitig rivu ka aim̃au vija puruveru napano Atua jian banlo.

<sup>9</sup> “Neberenio batitig ban kamiu, neberinavo, Puruveru naio be tena yetemeriba nei ga, mia verenio mijikia riijaiso ka kove bilbilu rivu vija Atua, bo ka koiṃau kanio. Ver jau koiṃau rivu vija puruveru ea ṃarabo na memedu nene, mia iorou kanio ana Atua naio risaaro ka mia rivurso kavan ea vio na maka puruveru toaio, naina naruei be kanamo vonuo na mave.

<sup>10</sup> “Toro na bar ka naio batitig bo ea iṃauano na kiritavaso ga, mia kito ramijikia ravarkar tiniedo ea naio ka mia naio rivar naio ka iṃauano na toru bunu. Mia toro na miṃau maka rimemedu ea vite na telisu, mia naio riṃau rivova lie vo ea vite na toru.

<sup>11</sup> Ver kamiu kuvar vatitig re kamiu ka iṃauano nalo na puruveru na yetemeriba nei, mia kei bereio rivar Atua kanano tonovo nalo tua jumemiu ka ve kenemiu?

<sup>12</sup> A ver kamiu maka kuvijikia kuvim̃au rimemedu rivija vite nalo nam̃a Atua mijamo ka ban kamiu ka bogo bulati ga ea yetemeriba nei, mia kei bereio rijamo ka mau novo nalo napano ajua vio mave ave kenemiu dam̃ariga?”

*Maka toro rijikia riṃau tubo ve juo kialo*

<sup>13</sup> Mia Yesu ber bunu, berinavo “Bereio, ver toro na iṃauano tai, naio riṃau dede ga ea tubo ve juo ve vaarakurano. Ver tibe na, mia naio tinien tii tinene, mia riilkue ka dolu nene, ṣeli

na mia rudu tinene, mia tuvan dolu nene. Kamiu maka kuvijikia ka kuvila ka napano kamiu kube tomu namã amiñau Atua kanano, a kube tomu na puruveru ka bogo nene bunu.”

*Varisis nalo maka tiniel tii Yesu kiano iliano nalo*

<sup>14</sup> Ana na ea bogo na, Varisis nalo bunu aju kiano vo, ajuñã amiagago ka iliano nalo nei. Mia nalo abe tomu namã tiniel jii mñlea puruveru toru bogo nonovio, naruei nalo abital lelan ga mñarabo novo nalo na imãuano bija puruveru napano Yesu berial ban kiano naiagagoano nalo.

<sup>15</sup> Ana Yesu mil banlo berinavo “Kamiu tiniemiujii ka kuvila ka napano mia tomu nalo aial kamiu tibe ka tomu na memedu nalo, mia Atua biti dulu venia napano joa kenemiu iviso. Vite miroano napano mña tomu nalo amiaia, aberinavo naio bo, mia ea Atua kiano vitiiano tenalo na abova ga.”

*Atua kiano navenatuboiano binimej naruei Mataiu 11:12-13, 5:18; Mak 10:11-12*

<sup>16</sup> Iliano dolu tai napano Yesu berenio, naio berinavo “Beamu, Niosi Moruo jo, napano niosi nalo na Mosis kanano bija niosi nalo na naveri-aliano nalo kanalo juaio, bano-o binimej bokar bogo na Jone Baruei. Jone miñau bano-o bisi ana vonganei Ioluano Vou na bo na Atua kanano navenatuboiano naio binimej, naruei ajuñã amioliolu ka janea vio reraio, mia tomu namã ajidom ka ava jouro eaio na aju amila vio jikili ka ajogkario.

17 Mia nina maka rila ka tuboiano na Atua kanano napano joa Niosi Moruo naio bova ruei. Peli vio mave a yetemeriba nei nalo ava kovio ga, mia kiri m̄ariliano na tuboiano nei maka rijikia riva kovio bogo tai ka tumolu tu re.”

*Maka rivu ka kito rotuvan koado nalo  
Mataiu 5:31-32, 19:9; Mak 10:11-12*

18 Iliano dolu tai napano Yesu berenio, naio berinavo “Ver toro tai riilalar koano, ana naio riva rivuru tira dolu, mia Atua mialio ka toro nei naio jo mila siakaiano bija tira dolu nei. Be verare ga bunu ka ver toro tai soro ka tira tai napano koano na beamu miilalar naio ruei: toro nene bunu mila siakaiano.”

*Jamerijiano na toro na sanibaiano bija Lasaros*

19 Yesu ber jamerijiano nei bunu, napano naio ber jibe nei, berinavo “Toro tai, juṁano bujo toru laka ka vite na bo nalo miroano, naio miyovovua naio bo laka bogo nonovio, a legiano nonovio amim̄auka sano burum̄ara sinaniano novo nalo.

20 Toro dolu tai naio bunu jo, napano m̄a bogo nonovio amidudu naio binimei amidu naio jo tavio ea burusio na burum̄ara yimo na toro nei kunuano napano be kiano saba telabo. Toro nei, naio be toro tai na maka ve kiano saba tai, naio be toro tai nam̄a jo miogiog sinaniano, niabene nalo vio bujo ka meniko, a siano be Lasaros.

21 Amidu naio joa vio na ka p̄eli mia naio mijikia riniog sinaniano nalo nei torogio nam̄a toro na toru nei jen digio ju, mia makanio. Naio

jo miog kuleio ga jibe na, naliko kuli nalo napano abinimei amiom kanano meniko nalo.

<sup>22</sup> “Milala jibe na bano-o na tete nei naio m̃aro, ana na nailiano nalo abinimei amidular naio, aba amidu jo tivelinio na Epraamo, ea vio mave. Ana maka vesiou ana na toro na toru bunu m̃aro, ana ajivinio.

<sup>23</sup> Mia abuku deven naio ban ea sebi, napano mijog naio bova-o mia bova laka, mia iorou ana naio jirarag bavin, mial koalabo laka, naio mial Epraamo naio jo, a mial ka napano Lasaros jotano naljuo naio, abe juo ajum̃a ajinan.

<sup>24</sup> Ana naio bio banlo, berinavo ‘Aue-e, karam̃aku Epraamo, kovijuku bo tiniem riia kiniou liki, jau keiila Lasaros rimei rudu juluvati m̃arjukjum̃ano titi ka kiri uei tai, ka titi ka minaku. Bior vonganei sebi jijen kiniou mia nomijogio bova toru nei.’

<sup>25</sup> “Mia Epraamo berdoṣeio, berinavo ‘Kener-iku, jau kosidomial bereio meuliano novo nanua beamu. Ka bogo na, jau kobokar kanamo vite nonovio napano jau kojidom m̃lea bo kaso, mia kiri tavaliki Lasaros nei, ea kiano meuliano re nua, vite nonovio maka tai rimelumu van naio. Vonganei, naio mije jogvuiano ea vio nei, ana jau komijog bova toru liki ea vio na.

<sup>26</sup> Mia be vite tai ga, naio maka rijikia riviedu ka riijaso, bior Atua mila burum̃ara vio kiri bululuo tai napano jo iviso bure ka kito juo, ka rila ka toro rijikia re taluvo ea vio nei ka riviedu rialso, a maka rijikia taluvo ea vio na jau kojoaio ka rimei ea vio nei.’

<sup>27</sup> “Mia toro nei bika bereio, berinavo ‘Teta,



aver tibe na, kiniou nabika jikili banso ka keiila Lasaros rivatove bereio ea karamãaku kunuano,

<sup>28</sup> bior kuruaku nalo jimo aju keano vo. Bo kanio Lasaros riva ridu tiniemaiano vanlo, ver ðeli mia nalo bunu amei ajoru ea jogvaiano nei na.'

<sup>29</sup> "Mia Epraamo berdoþe, berinavo '¿Mia bior vaio ana monoka Lasaros naio rivano? Nalo ajuãa abar Niosi Lu ruei, napano vivitauiano lu na Mosis kiano bija naverialiano nalo juaio ruei. Bo ka avuluku nina, ka mia aleal vite nonovio juaio.'

<sup>30</sup> "Mia toro nei naio jo jikili kia navo, naio berinavo 'Teta Epraamo, ðeli mia maka ajikia ala nina na? Mia ver toro tai rimei bereio ea namãariano, river vite nonovio kalo, mia monoka aviliglo kanio na.'

<sup>31</sup> "Ana Epraamo berdoþe, berinavo 'A verenio nalo na maka asidom ajog vaio napano mña Niosi Lu berenio, maka bunu ve titai bereio ka napano rijikia rilalo amoneaio. Ðeli toro tai rimei bereio ea namãariano, river vite nonovio nalo vanlo, ðeli na venia, mia asidom re ka amoneaio ga na.'"

## 17

*Bajago na ala jukujukuano rivan toro dolu  
Mataiu 18:6-7,21-22; Mak 9:42*

<sup>1</sup> Ana Yesu ber ka kiano naiagagoano nalo, naio berinavo "Mia jukujukuano nalo amijikia amei bogo nonovio ga, mia toro napano mila vite tai napano mña buru jukujukuano jo binimei vaataro, mia rivova laka vanio.

<sup>2</sup> Ver aiorikar puruveru tai toa burujono ana avuku naio riva ea buluniogovu, nina na be vironiano tai napano melala ga. Mia toro naña mila kanaku tete nalo nei tai juvan kiniou, mijoru ea kariano ana maka bunu tu sikili ea kiniou, mia toro nene naio rivar vironiano tai napano kirisikili laka riva lie vo tovulu ninei.

<sup>3</sup> Ver tibe na, monoka kuvitkar vatitig kene-miu meuliano nalo bogo nonovio, ka mia ña kala re jukujukuano rimaluvo ka kiamo bilbilu nalo.”

### *Bajago na koviekokoa kuruamo*

Ana Yesu berenio, berinavo “Ver jau keial ka napano kuruamo naio jo mijoru ea kariano, monoka keil van naio ka kovururirio, mo ver naio rivilig naio, monoka jau koviekokoa naio.

<sup>4</sup> A ver naio rila rivova vansom ve va aluo ka legiano ve takurano ga, a bogo nonovio, naio mila kirivova karina naio ber vonga berinavo ‘Aire koig, aua namila bulagso toru laka. Naber bo ka jau, koviekokoa kiniou,’ mia jau kala tuñabe? Monoka jau koviekokoa naio ve va aluo nei nonovio riviniu.”

### *Moroano na viekouoiano*

<sup>5</sup> Ana atevi nalo abika den Yesu, aberinavo “Tubo, kumemi numisidom ka jau kala kene-memi viekouoiano rimei sikili lie vo.”

<sup>6</sup> Naruei naio berdoŕe, berinavo “Ver kamiu kuvika kiniou ve telisu ga, tavukia kurukuti ñarabako, mia ver kenemiu viekouoiano nene naio sikili rivu, ana mia kumijikia kuver ka burupati burujou yako kuverinavo ‘Jau kataluvo den jelemo na vija kanamo pati nalo, jau kava

kotu koiluo ea tinia tei iviso,' ana mia naio rimonea kamiu."

*Toro na riñau toro na toru kiano monoka saaro ga ka riñau*

<sup>7</sup> Ana Yesu berinavo "Ver kamiu tai naio ve toro na toru tai, a kanano toro tai toña rila kiano iñauano. Peli naio riva riñau ea tiniavio, ðeli na rivitika kiano temeul nalo, ðeli na venia, ana verenio kijeve bogo na naio rimeve bereio ea iñauano, mia toro na toru nei naio river venia kanio? Maka rijikia river kanio riverinavo 'Mo, jau komeve kototano vija kiniou, kito ve juo rosinan,' bior naio be kiano toro na iñauano ga.

<sup>8</sup> Mia toro na toru monoka river kanio ga riverinavo 'Mo, mia kava kovoroŝebi beamu vo. Verenio sinaniano rimenoko, ana kava koyovovua so rivu, ana kavara saku rimeve ka nesenio, a nomunuio, bise, ana mo jau komijikia koviovio samo.'

<sup>9</sup> Mia bogo napano toro na iñauano nei mila nonovio vite nalo naña toro na toru ber ka naio, mia toro na toru maka rijikia river burumara siva tai vanio, bior nina be kiano iñauano ga.

<sup>10</sup> Mia kam bunu monoka tibe na. Verenio kamiu kuvila vatitig nonovio iñauano napano Atua ber ka kamiu, rivano-o riviniu, mia kuver ga tibe nei, kuverinavo 'Aa, nina maka ve titenia na. Kito rala ga venia napano memedu ka kito ralaio, tavukia Atua kiano tomu na iñauano nalo ga.'"

*Yesu mieliel ka tomu na burumieni nalo due-  
limo, mia takurano ga ber siva*

11 Ana ka bogo na, Yesu nalo aju amiel kia ga vo ka avavin Yerusalemo, ana kialo m̃arabo jel bure tanobuku juo nei Sameria bija Kalele.

12 Naruei nalo amiel bano-o, vaataro ka ay-otuba ea m̃arkomeli tai, abitavo bija taara tai na tomu na burumieni, nalo duelimo, napano ajujuṃṃa ea ikiṃarabo.

13 Mia bogo napano amial Yesu, abio jouo banio, aberinavo “Yesu, Tubo, nuber bo kaso tiniem riia kumemi.”

14 Ana bogo napano Yesu mijogio, naio ber kalo berinavo “Kamiu kuva kuvar laka ea kulo lu nalo beamu vo, ka avitii veve niabemiu nalo ka aver niabemiu nalo ameravo ruei.” Naruei nalo abano, ana bogo napano aju amiel abano, amiilo ka mokotenalo nalo aju abinimei meravo.

15 Naruei nalo tai, bogo napano mial ka naio binimei bo ruei jibe na, naio barṃilig binimei, miaia Atua laka,

16 binimei mijorua tano ea Yesu jaano, ber siva kanio. Toro na, naio maka ve Ju tai memedu, mia naio be yati na Ju togio na Samaria. Mia nalo dolu na, nalo abe Ju memedu, mia nalo maka amei bereio.

17 Ana na Yesu berinavo “Nalo napano niabelo meravo ruei, nalo duelimo, mia nalo kover dolu nene nalo be?”

18 Naina binimei bereio, naio be toro na vio dolu ga, mia ka venia ana naio ga takurano binimei bere ka rivamenea Atua, ana nalo dolu nalo maka amei bereio?”

19 Naruei Yesu ber kanio berinavo “Koig, jau kotumolu keiel kava vonuo. Kiamo viekouoiano milarurso ruei.”

*? Atua kiano navenatuboiano naio rimei tumabe?*

*Mataiu 24:23-28,37-41*

<sup>20</sup> Ana iorou, kulo Varisis nalo abinimei abika den Yesu, aberinavo “Navenatuboiano na Atua kiano namã jau kjoãmã koberii vurua na mia kumemi nuvialio nagi?”

Ana na Yesu berdoþe, berinavo “Atua kiano navenatuboiano naio maka rijikia rimei tibe ka titai napano toro mijikia rialio ka mirano.

<sup>21</sup> Naio maka ve titai napano mia averinavo ‘O naio naruei, jau komial naio jo binimei kia,’ þeli na averinavo ‘Naio nei jo binimei ruei.’ !Kamiu maka kuvitilubario, mia Atua kiano navenatuboiano naio ju iviso ka kamiu ruei!”

<sup>22</sup> Naruei Yesu mil ban kiano naiagagoano nalo, naio jukunu banlo ber mia tumabe ka legiano na maaro nalo napanoaju abinimei. Naio berenio “Iorou kaniã ana mia kamiu kuvilavio sikili ve toru ka kuvial bogo na mia kin-iou Kulorinio Kenerinio noyotuba ea yetemeriba nei, mia nina maka ve kenemiu ka kuvialio.

<sup>23</sup> Mia tomu nalo atumã averver averinavo ‘Naio nei!’ þeli na ‘Naio yako!’ mia kamiu kuan re rivijalo, bior maka kiniou navo.

<sup>24</sup> Mia bogo na kiniou Kulorinio Kenerinio nemei bere be riano rimonloglog legiano nene, mia aviniu avitilubario, mia kiniou nemei tavukia vio bijiiã tai napano rila niogovu rimerera ea vio tivelinio riva rivokar tivelinio dolu nene.

<sup>25</sup> Mia maka ve bogo na vite nene vo, bior beamu ka nina, mia kiniou Kulorinio Kenerinio, tom na vonganei mia monoka ala kiki kiniou ka saba vetelabo, mia monoka avukular kiniou.

<sup>26</sup> “Rivano-o rivokar bogo na mia kiniou Kulorinio Kenerinio nemei bereio, mia tomu nalo atu vatitigio re rivu, rivare ga ka nanua amila ea bogo na tormoruo Noa kiano bogo.

<sup>27</sup> Ka bogo nene, tomu nalo ajidel ka ña ajinan, a ajumã amunu vite nalo, ajumã amila soriano jibe na ga, binimei bokar bogo na Noa ba joomo ea kiano burumãara uako nanua naio miãaukanio. Naruei burumãara ueimia binimei burubulag nonovio kialo meuliano nalo.

<sup>28</sup> A ea bogo na Lot kiano jibe na ga bunu. Tomu nalo ajumã ajinan, ajumã amunu vite nalo, ajumã aban ea yimo na ñilñiliano a amila bijii puruveru, ajumã amimãauka tiniavio, ajumã amimãauka yimo, amila jibe na banbano-o, mia maka bunu tinielrimaio ka titai leleio.

<sup>29</sup> Mia monloglog legiano napano Lot jumolu den kialo vio, mia sebi bija vovosebi na sebi jinano ajibirbil abavatove ea vio yauo, jijen nonovlo abiniu abava kovio.

<sup>30</sup> Mia kiniou neber ka kamiu ka mia bogo napano mia kiniou Kulorinio Kenerinio nemei, mia tomu asidomial re titai, mia asidomiale ga, mia nalo ailo va ka burumãara vite nalo na jibe nei amalmaluvo ea kialo meuliano nalo.

<sup>31</sup> “Ea bogo na, ver toro tai toña rivonvon ea kunuano mave ea ino, mia naio rial tenei naio to rimei, mia ver naio rivatove, mia maka rivu ka rilavon ka rivar kiano saba joomo ea kunuano, mia naio monoka rivan ga tibe na. Mia toro namã miãau ea tiniavio, naio bunu maka rivu ka rimei bere vonuo, mia naio monoka rivan ga

tibe na.

<sup>32</sup> Kam tiniemiu ribobogia re Lot koano, napano jiraragodi, mia naio binimei be puruveru ju.

<sup>33</sup> Toro namãa jidom rilarrur kiano meuliano ga, mia naio rila luvuio, mia nana mña mijamo ka kiano meuliano ba kovio, mia rilarrur naio bereio.

<sup>34</sup> Kiniou neber ka kamiu ka ea bogo na, p̃eli ka bogiano napano mia toro tai naio koano amon ea mñalo jogu, mia amei avurular tinene ga, mia atuvan tinene tobo.

<sup>35</sup> Peli na tira ve juo atu vio takurano avijii salo baba, mia ve takurano ga rivano, mia tinene naio tobo.

<sup>36</sup> [Peli na tomu ve juo atu aimãau biju ea tiniavio, tinene tuvan vio rivan mia tinene naio sikili tumomou tu.”]

<sup>37</sup> Naruei kiano naiagagoano nalo abika denio aberinavo “?Ana Tubo, vite nalo nene mia ayotuba ea vio be?”

Ana naio berdoṣelo, berinavo “Ea bogo nene, mia tavukia napano ver tena mñaro tai jo kovio tai. Ea vio na naruei, menu nalo namãa ajenjen tena mñaro, mia nalo amei kanio, monoka nalo ve miroano ea vio nene. Ea vio na vabe napano kariano joa, vio na naruei ve natibureano eaio.”

## 18

*Jamerijiano na tira na jegi ban kiano tubo bano-o mia tubo tinien miiaio*

<sup>1</sup> Ana Yesu jii jamerijiano dolu banlo, ka tunukakarlo ka mña tinielo veve juo re bereio ea kanalo volkouano, mia atu sikili damariga eaio, abolkouo rivano-o mia avokar verdoŝeiano eaio.

<sup>2</sup> Kiano jamerijiano nei, naio ban jibe nei, berinavo “Be komeli tai, tubo nene naio be toro kouo tai, be toro tai namña maka rialerinio ea Atua leleio, maka rimerou kanio, a maka tovon tomu nalo bunu.

<sup>3</sup> Ana taanou tai bunu joa vio na, napano toro tai joña mila bulag kiano saba nalo bogo nonovio ga, ana taanou nei naio jo ba jo jegi ban kanano tubo, joña mila kiano veriiano ka toro neibano, berinavo ‘Aiou, jau monoka kala titai ka tete na, naio joña mila kiki mñlea kiniou mia.’

<sup>4</sup> Mia tubo nei maka tinien riia tira nei, naio miovo ka ril van tete neibano. Mia naio mila jibe na banbano-o, mia tira nei naio joña monmon ga ba jegi ban kanano yubo.

“Ana iorou kanio ana tubo nene berenio ‘Kin-iou nebe toro tai namña maka nosidomial ka nala vaio namña Atua ŝeli toro dolu ber ka kiniou ka bo ka nalaio.

<sup>5</sup> Mia tira nei naio joña binimej jegi vururu ban kiniou mia maka nosidom nala tena mña joña berenio. Mia naio joña binimej bika jibe na, mila kiki tanea kiniou toru laka, ŝeli mia nala ga venia namña naio joña bikanio. Ver ŝeli mia tinieku riñaro ka nojog kiano tegiano.’”

<sup>6</sup> Ana Yesu mil ban nalo namña ajuña amije tilinielo ka jamerijiano nei, ana naio berinavo “?Kamiu kuviagago vatitig ka toyovo nei kiano iliano namña berenio? Bior tira nei jegi va telabo



banio, mo mia naio monoka sidonii vite namãa tira na naio jomãa bikanio.

<sup>7</sup> ?Mia tumãabe ka Atua na mave? ?Bogo na naio mijog ka kiano tomu nalo namãa bijauia bulaglo, ajumãa ajegi ban legiano a bogiano, mia naio rijikia to vesiou tibe na rivano-o mia rila re titai vanlo?

<sup>8</sup> Makanio, mia neber ka kamiu ka ver naio rijog ka mãa kamiu kumitumãa kubolkouo jikili damãariga banio, mia naio tumolu soþeli ga tulaka ka rijai kamiu. ?Mia nejidom nevika kamiu bunu, ka ver bogo na mia kiniou Kulorinio Kenerinio nemei bereio ea yetemeriba nei, mia nemijikia neial ka tomu vetelabo atu sikili ea kiniou tibe na, þeli na mia ve re tai kovio ga?"

*Jamerijiano na toro namãa be m̃arou ka kiano bajago na memedu*

<sup>9</sup> Bogo na Yesu jo bija tomu nalo, naio bitilubar ka napano nalo tealõ ajumãa abe m̃arou toru laka, aju aberiamãa kialõ meuliano memedu bo ruei, mia ajumãa abitii saia tomu dolu nalo, amialõ jibe ka maka avu tibe ka nalo. Naruei naio berii tomu nalo jibe nei, jii jamerijiano tai, berinavo

<sup>10</sup> "Tom juo, aba joomo ea Atua kunuano monloglog bogo na volkouano. Nalo tinene, naio be Varisis, mia tinene, naio mila imãauano tai napano tomu nalo maka tiniel tii naio riviorio, naio be toro na takis.

<sup>11</sup> Mia bogo na Varisis naio jo jumolu ka rivolkouo, naio ber jibe nei, berinavo 'Atua o, kiniou neber burumãara sivaiano toru laka nei bansõ, napano kanaku meuliano naio bo lie jovulu nalo dolu nei kanalo. Nemiaso napano

kiniou maka natavukia tomu na vinauano nalo, ƣeli tomu na amijukubin toro, ƣeli tomu naŋa amila siakaiano, ƣeli tomu na takis jibe ka ninei jumolu ju nei.

<sup>12</sup> Makanio, mia kiniou nojomŋa nomila bo laka daŋariga, bior kiniou nomondulu ka nojomŋa nobolkouo banso ea legiano juo ka sude takurano, a ea vite nonovio naŋa kiniou nabokar ka juŋaku, verver novokar ve duelimo mia monoka nodu ve takurano vanso daŋariga. Vite nalo na naruei naŋa kiniou nojomŋa namilaio ana mila kiniou nobo laka ea miramo.'

<sup>13</sup> "Mia toro na takis naio jo mijog bova bior kiano kariano tealo naŋa milαιο, mia niabene buru vurebure jibe Atua bitii kiano meuliano maka rimemedu leleio. Naruei naio niabene ƣili ka riva vaataro keanio, naio jumolu ju koalabo ga, mia maka sidom sirarago rivavin mave, naio jurubanini naio jomŋa mijubaluba bairene, naio jegi naio berinavo '!Aiou Atua, jau kala luƣiluƣi kiniou, a tiniem riia kiniou, kiniou toro na kariano.'

<sup>14</sup> "Mo kamiu kumisidomii von: mia Atua naio saaro ka tomjuo nei na vabe kiano volkouano? Nao-o, toro napano bitilubar kiano kariano, naio mijog bova biorio, Atua mijelar kiano kariano. Mia dolu nene, naio ban bere vonuo napano kanano meuliano jo jibe ka ga bogo na naio binimei. Toro naŋa jo bavavin ea naio, mia Atua rudu naio to yetano, mia toro naŋa jo midu naio jo yetano, mia Atua rivitiri lario."

*Yesu milivu ka kiritete nalo  
Mataiu 19:13-15; Mak 10:13-16*

<sup>15</sup> Ana ka bogo na, nena nalo tai abar kenerilo solbouo nalo abinimei ea Yesu, ajidom naio tokol lo, rilivu kalo. Mia bogo na naiagagoano nalo amileal, aberburelo, aber avatavio bereio.

<sup>16</sup> Mia Yesu bio ban tire nalo, ber amei bo ka ga aialio, a naio ber ka naiagagoano nalo, berinavo “Kamiu kuverbure re kiritete nalo na, kuvijamo kalo amei aial kiniou, bior kiritete nalo na, tomu nalo napano ajavukia nalo, nalo ga naruei aju aba jouro ruei ea navenatuboiano na Atua kanano.

<sup>17</sup> Kiniou neber be riano ban kamiu, ka toro na ver sidom navenatuboiano na Atua kanano, naio monoka rila naio tibe ka kiritete nalo nei, ver ðeli, naio maka rijikia riva jouro eaio.”

*Kulo Ju nalo kanalo toro na toru tai jidom  
rivokar meuliano*

*Mataiu 19:16-30; Mak 10:17-31*

<sup>18</sup> Avona bisi, ana tubo tai binimei bika Yesu, berinavo “Naverloglogiano novo, neber bo kaso, jau koverial van kiniou ka monoka nala venia ka mia nemijikia novokar meuliano na maka rijikia ribisi.”

<sup>19</sup> Ana Yesu berdoþe, ber “!Ei! ?Jau komijikia venia, ana kobio kiniou kober kiniou nobo? Maka ve toro dolu tai na rivu ve riano, mia Atua ga takurano.

<sup>20</sup> Mia jau kobika kober jumãbe ka toro tai na jibe ka jau mijikia rimei rivu ea Atua mirano. Mo, ðeli jau komijikia batitig tuboiano nene nalo ruei namã aber ka: Jau kala re siakaiano, jau

koue tañaria re toro, jau kovina re, jau kala sibi re, jau kotovon karamamo naio koniomo ga.”

<sup>21</sup> Ana tete nei naio berdoþe ber “Nao, kiniou nomijikia nono tuboiano nalo naña jau kober kiana, mia nomijikia na ver ka jau ka kiniou nojomã nabokar batitiglo jikar ea bogo na kiniou nobe m̃eaku kia ga vo. Binimei bokar vonganei, maka nalabelea tai.”

<sup>22</sup> Mo bogo napano Yesu mijog ka napano naio ber jibe na, naio berenio “Kirinovo, mia tivelinio na jau, vite tai ju keano vo. Jau monoka kava koñiliñili nono ka kanamo saba nalo na miroano na, mia jau kavar puruveru nene, kavano katan ka van talimãasa nalo. Ver jau kala tibe na, mia ve kanamo vite novo nalo ve miroano ea vio mave. Mo, jau kava kalaio, avona bisi ana komei katakisor kiniou.”

<sup>23</sup> Mia bogo napano toro nei mijog iliano nei, naio mijog kiano iviso jegi toru laka, kiano jidomiano kiri temi m̃ele, bior naio be toro na juñano bujo ka saba toru laka.

*Toro na kiano saba toru, kirisikili ka naio riva jouro ea Atua kiano navenatuboiano*

<sup>24</sup> Naruei Yesu bitii toro na toru nei bano-o, kar na naio berinavo “Ver toro tai na kiano saba toru, ver naio sidom riva jouro ea Atua kiano navenatuboiano, vite na kirisikili kija na.

<sup>25</sup> Nao-o, kiniou neber ka kamiu, ver kamele tai riowodulu ea bulumirano nitil tai, nina be kirisikili laka, mia ver toro tai na be kiano saba toru mia naio sidom ka riva jouro ea Atua kiano navenatuboiano, nina naio kirisikili lie vo ka nina.”

26 Mia nalo napano amijog iliano na, nalo abamenea naio kanio, aberinavo “!Tomnei! Ver tibe na, mia kei naio mijikia rijev meuliano?”

27 Mia Yesu naio berdoĝe, berinavo “Nao-o, toro maka rijikia rila naio rijev meuliano, mia venia naĉa toro maka rijikia rilaio, mia Atua naio mijikia rilaio rivu ga.”

28 Ana Pitere naio bika, berinavo “?Ana mia tuĉabe ka kumemi? Kumemi numituvan kene-memi vonuo nalo ruei, ana kumemi nubinimei numitakisorso.”

29 Mia Yesu naio ber ka kiano naiagagoano nalo, naio berinavo “Kamiu kuvisidomii ĉlea re tivelinio na. Ka toro kei napano ver tuvan kiano vonuo, ĉeli koano, ĉeli kamaĉano a kenieno, ĉeli na kenerinio nalo, mia ver naio tuvan vite nalo nonovio na rivior iĉauano na Atua kiano navenatuboiano,

30 mia naio rijev meran bere kiano saba nalo na jibe nei ve miroano lie vo. Nina ea bogo na naruei, a iorou ka bunu ea bogo na ju binimei, mia naio rivokar meuliano na maka rijikia ribisi.”

*Yesu berial kiano ĉariano varolu nene  
Mataiu 20:17-19; Mak 10:32-34*

31 Mia bogo na ajuĉa amiel abano, ana Yesu bio kiano duelimo ba juo [12] abinimei kean naio, naruei naio ber kalo berinavo “Kamiu kuviagago vatitig rivu. Vonganei kito roju rabavin Jerusalemo kia nei, mia bogo na kito rovoru ea vio na, vite nonovio nanua nailiano nalo abivitauiaio nua ruei ea tivelinio na Kulorinio Kenerinio, mia kamiu kuvial amalmaluvo takiio.

32 “Mia kamiu kuvial ka napano adu naio toa kulo Romo nalo juñalo, ka mia aserei niadua rivanio, ala kiki naio, a avule titia naio,

33 a avitiv naio, rivano-o mia auebin naio riñaro. Mia ka bogoti ve tolu nene, ana mia naio tumolu rimeul bereio.”

34 Be kurano ka na Yesu berial vite nonovio meravo banlo jibe na, mia maka lele ajoglubar-bar vatitigio rivu. Naio jibe ka napano amilavan iliano nei kalo, mila ana maka avokar batitig nioti na iliano nene.

*Yesu miñauka batitig merebono tai mirano  
Mataiu 20:29-34; Mak 10:46-52*

35 Mia Yesu nalo aju amiel abano, abinimeï vaataro ka komeli na vio Jeriko, mia merebono tai joña jotano ea ikiñarabo, naio joña miogiog sinaniano den tomu nalo naña ajeljel ea ñarabo nei.

36 Naruei merebono nei naio mijog ka Yesu nalo aju abinimeï, naliko tiniobi nalo napano ajuña amiel bijaio, ana naio bika berinavo “Nalo na vio be na, ajuña amiel ka ava be?”

37 Naruei nalo aberdoþe aberinavo “!E, abe Yesu na vio Nasarete ga, naio miel binimeï jel kean kito ga!”

38 Ana toro nei bio jouo, jegi ban Yesu berinavo “!Yesu, jau Teviti kiano yati, kiniou nojidom ka jau tiniem riia kiniou!”

39 Mia nalo naña aju amiel jukamu ka Yesu, amijog ka ña naio bio jibe na, ana aberbureio, aber naio rimelumu ga. Mia tete nei naio maka sidom rijoglo, mia bio bereio, jouo lie, berenio “!

Yesu, jau Teviti kiano yati, neber bo kaso, tiniem rii kiniau!”

<sup>40</sup> Mia Yesu miel bano, mebi loglog vio nene, ana ber avuru toro nene rimei vaataro kanio. Ana aburio binimei, ana Yesu bika denio, berinavo

<sup>41</sup> “? Jau kojidom ka mia kiniau nala vaio kaso?”

Ana naio berdoŝe berinavo “Aiou, Tubo, kiniau nojidom ka miraku rivu, ka nejikia neial vite.”

<sup>42</sup> Ana Yesu berinavo “Mo, vonganei kiniau nesian kiamo siraragiano vansom tibe ka na jau kobikaniao. Kiamo viekouoiano milaso kovu bereio.”

<sup>43</sup> Mia monloglog bogo na, toro nene mirano binimei bo, ana naio joŝa miel naliko Yesu, naio joŝa miaia Atua toru laka. Mia tomu nalo bunu napano amial vite nei, amial bo laka, ajuŝa abamenea Atua siano biorio.

## 19

### *Yesu biviuo naljuo Sakias*

<sup>1</sup> Mia Yesu nalo abinimei jouro ea komeli na vio Jeriko, ajuŝa amiel aban ka aiovodulio ga.

<sup>2</sup> Mia ea vio na, be toro tai jo, siano Sakias. Naio be toro na toru ka nalo na takis ea tanobuku na toru na vio nei, mia bior naio joŝa mimau bova, joŝa mijukubin tomu nalo ka kialo puruveru na takis nene, mila juŝano bujo kanio, kiano saba nalo miroano.

<sup>3</sup> Mia naio bunu binimei ka bogo nei, jidom rial kija Yesu ka naio be toro na juŝabe, mia tomu kinkin telabo aju vaataro ka Yesu, aju kovio

amila vio telisu laka, mila naio maka rijikia rial vatitigio, bior naio be toro na bulati ga tai.

<sup>4</sup> Mia mial bova ga, ana jikiti jukamu ka Yesu nalo, ba bokar buruviove tai, jakiio bavin mave joa jaati tai, jororea ka mia Yesu nalo aiel amei, ka mia naio mijikia rial vatitigio.

<sup>5</sup> Mia bogo na Yesu binimei bokar buruviove nei, Sakias miilo ka napano Yesu jirarag bavin, mialio, mil banio berinavo “Sakias, jau katabulu soḡeli. Kiniou nomijoglubar ea kiniou ka banei monoka noto kija ea kiamo vonuo beamu vo.”

<sup>6</sup> Mia Sakias mijogio, jumolu jabulu soḡeli batove, naruei buru Yesu ba vonuo ea kunuano, bija buruḡara saariano tai.

<sup>7</sup> Naruei bogo na tomu nalo amial tenei, nalo telabo maka asaaro, amil muḡiio tertelisu, a berinavo “Toro na Sakias na, naio be toro tai naḡa miḡau kirivova, naio jomḡa mijukubin tomu nalo bogo nonovio ga, mia kar vaio ana Yesu jidom riva to naljuo ea kiano vonuo?”

<sup>8</sup> Mia bogo na aju joomo kario, ana Sakias mijog lubar ka monoka naio rivilig naio, riyelar kiano meuliano, naruei naio jumolu berial ea Tubo mirano, naio ber “Tubo, vonganei kiniou nomijamo ka kiaku saba torogio ban tomu na abe taliḡasa, maka ve kanalo titai. A venia naḡa namila sibilili toro kanio, nebina kalo, mia navar meran bereio vokar ve va veri tukario.”

<sup>9</sup> Mia Yesu mijog bo toru laka ka venia napano Sakias mijue bulagio banio, ana berinavo “Kiniou nemial jibe ka banei ioruriano na Atua kiano naio binimei bokar ḡaratavo nei memedu. Tete na naio milaluvu ḡarabo na kiano meuliano,



mia naio bunu naio be Epraamo kiano bajulukuti memedu, naio be toro Ju riano,

<sup>10</sup> mia kiniou Kulorinio Kenerinio nebinimei ea yetemeriba nei ka nesirago nalo naña amilaluvu m̃arabo jibe toro nei, a ka nalarurlo.”

*Jamerijiano na tomu nalo na abitikar kialo toro na toru kiano puruveru*

*Mataiu 25:14-30*

<sup>11</sup> Mo tomu nalo ajuña amije tilinielo ka Yesu kiano iliano nalo nei, naruei naio mil banlo ba ber jamerijiano tai kalo. Naio mial bo ka riverlogloglo ka jamerijiano nei, bior naio mijikia ka tomu nalo ajuña ajidom aber bogo na naio riva rivoru Yerusalemo, mia naio rila Atua kiano navenatuboiano riyotuba kalo ve vaarakurano ga ruei. Mia vonganei aju abinimei vaataro ka Yerusalemo ruei, ana Yesu jidom riverlogloglo ka mia naio monoka tuvanlo beamu vo, karina mia naio rimei bereio.

<sup>12</sup> Naio ber kalo jibe nei berinavo “Be toro na toru tai, aber ka naio ka rieli riva koalabo ea vio na parinio tubo na toru joaio, ka avitirilar naio ka rimei rive parinio tubo ea tanobuku na kiano, karina, mia mijikia rimei bereio rive tubo ea kiano vio.

<sup>13</sup> Mia beamu ka bogo na maka rivan vo, naio bio kiano tomu nalo, nalo duelimo, mia mije puruveru banlo abeve terakurano. Ana naio ber kalo berinavo monoka aim̃au rivija puruveru nei o-o mia bogo na naio rimei bereio.

<sup>14</sup> Mia tomu nalo na tanobuku nei amiolu titig toro na toru nei, mia bogo na naio ban

kario, ana aberiio aberinavo maka bunu asidom naio ka rimei rive parinio tubo kalo. Naruei amiila toru ba ban parinio tubo na toru, aber 'Kumemi maka nuvisidom nuvial kema na rimei ka rive parinio tubo ka kumemi, kumemi maka lele garuei nuvisidom jau kodu buruñara sio na vanio.'

<sup>15</sup> Mia parinio tubo na toru nei naio mila ga, ana toro na toru nei binimei bereio ka rive tubo ea kiano tanobuku. Naruei naio binimei bio kiano tomu nalo nei napano naio bar puruveru banlo beamu ruei, naio jidom ka rial ka amiñau eaio abokar puruveru vio bereio.

<sup>16</sup> Ana toro na jukamu binimei jikili jukamu ea toro nei mirano, berinavo 'Tubo, kanamo puruveru takurano ga naio nei, kiniou nomiñau bija bano naio milelar duelimo bereio judu kanio.'

<sup>17</sup> "Ana na toro na toru nei naio mial kanano toro nei miñau bo, ana naio berkanio berinavo '!Bo mia bo, komiñau bo laka. Mia bior jau kobitkar batitig iñauano telisu na nomidu joa juñamo na, vonganei nodu buruñara iñauano tai vanso, nebitiri larso ka kovitkar kanaku komeli duelimo na tortoru.'

<sup>18</sup> "Bisi, ana naliano ka binimej, naio berinavo 'Tubo, puruveru takurano nua komidu ban kin-iou, nomiñau eaio bano-o nemijev jumo bereio judu kanio.'

<sup>19</sup> "Ana na toro na toru berkanio, ber 'Kobo, jau bunu komiñau bo, mo mia kiniou nevitiri larso ka mia kovitkar kanaku komeli jumo na tortoru.'

<sup>20</sup> "Avona bisi ana na maariano nene naio binimej, berinavo 'Tubo, kanamo puruveru na

komidu ban kiniou, nomijuvulukoio batitig ka niakulm̃arauo tai, nomidu van batitigio jo, naio nei nomidu ber binimei ka nodu vanso.

<sup>21</sup> Kiniou nojo nomialso jibe ka kobe toro tai na komijikia kavar bulag vite na toro dolu mije batitigio jo ve kanamo, a komijikia kejinan ea tiniavio na maka komebijaio. Kiamo bajago kirisikili kija jibe na, mila na kiniou nomerou kaso, tenene na maka nala titai ka kanamo puruveru nene, nomidukar batitigio jo bo ga.'

<sup>22</sup> "Ana toro na toru nei tinien jerio, naio berinavo 'Kaleliki, jau kober niegeniege kiniou kirivova tenia navo, napano kober nobe toro kouo tai jibe na. Mia bo ga, mo kanamo iliano na mia serso bereio.

<sup>23</sup> 'Ver kiniou nobe toro na jibe na, bior vaio ana komidukar kurano ka kanaku puruveru jibe na? Bo laka ka ver jau kodu riva toa yimo na puruveru, ka ver nemei bereio, ana nemijikia navar bulagio rivija boboti napano naio miin bulagio.'

<sup>24</sup> "Ana na toro na toru nei naio ber ka nalo dolu na ajikili aju vaataro, berinavo 'Kuvidular puruveru na den juñano, kuvidu van nana mileal duelimo.'

<sup>25</sup> "Ana nalo aber ka toro na toru nei, aber '!Ana Tubo, naio bar miroano kiana, kiano duelimo ruei!'

<sup>26</sup> "Mia toro na toru ber kalo, berinavo 'Naoo, jibe na naruei. Nana be kiano saba telabo ruei, mia naio rivar ta bunu bereio, mia nana maka kiano titai mia naio rilaluvu venia napano be kanano telisu mugaruei.

27 Mia tivelinio ka kiaku uolu nalo nei, napano maka asidom neve tubo kalo, nejidom ka kuva kuvurulo amei ea vio nei, kuvuebinvinlo añarmñaro kamu ea miraku.’”

Naruei Yesu kiano jamerijiano naio biniu ea vio na.

*Yesu binimej boru ea vio nei Yerusalemo  
Mataiu 21:1-11; Mak 11:1-11; Jone 12:12-19*

28 Iorou ka napano Yesu ber iliano nei bisi ana naio jumolu, miel jukamu bano, burumñarabo kalo abavin Yerusalemo.

29 Mia nalo abinimej vaataro ka komeli juo na tertelisu nei Betevas bija Betani, ea tivelinio ka Burusuku na Buruolivi nalo. Ana Yesu mil ban kiano naiagagoano juo, berinavo

30 “Kuve juo kuviel kuan ea komeli na telisu yako jo beamu vo. Mia bogo na ver kuva jouro eaio, mia kuvial togki tai amiorkar ju. Togki nene be mñeaku ga, maka ala kor taakano vo, mia kuvijubarlar sano teli ana mo kuvuru kumei bere ea vio nei.

31 Mia ver avika den kam juo averinavo ‘?Ai, kumitu kumijubarlar sano teli ka venia?’ Ana mia kamiu kuverdoḡelo kuverinavo “Tubo jidom temeul nei ka rila kiano imñauano tai.’”

32 Yesu ber jibe na kalo, naruei miilalo abano, mia nalo amial jibe ka ga napano naio ber kalo.

33 Ana na nalo aba ajumña amijubar bulag temeul nei sano teli, mia bogo namña ajumña amilaiio, ana sano taanou nalo abika aberinavo “?Ai, kumijubarlar sano teli ka venia a?”

<sup>34</sup> Naruei nalo aberdoṣelo, aberinavo “Makanio, Tubo naio jidom temeul nei ka rila kiano iṃauano tai beamu vo.”

<sup>35</sup> Ana nalo amijamo kanio, ana na nalo aburu togki nene binimej ban Yesu, mia abisii bulag ṃalo kulukoti nalo mave ea taakano, ana na amidular Yesu bavin jotano mave eaio.

<sup>36</sup> Ana Yesu midu togki nene, jomṃa miel bano, mia bogo na naio jo bano, mia tomu nalo abisii ṃalo kulukoti nalo ea ṃarabo, kanio mia Yesu kiano togki mijikia riel mave ealo.

<sup>37</sup> Naruei nalo amiel ea Burusuku na Buruolivi nalo, bano-o abinimej aboru ea vio na ṃarabo mialolo batove ka rivatove Yerusalemo. Mia bogo na buruṃara tiniobi na naiagagoano nalo miroano amial ka Yesu jo miel binimej vaatara ka vio Yerusalemo, mia ajidomial bereio buruṃara iṃauano nalo bija kijokijo nalo namṃa naio milaiio, mia amial jibe ka napano kialo buruṃara parinio tubo vou tai naio jo binimej, mila na ajaaro toru kanio, aju abamenea Atua biorio.

<sup>38</sup> Ajuṃa abiovio, aberinavo “!Atua loa laka, keilivu ka parinio tubo nei binimej ea siamo! Buruṃara merivuiano ea vio mave, kamiu na ea vio na mave kuvitirilar Atua siano, kiano mermerano bo mia bo!”

<sup>39</sup> Mia ka bogo na, Varisis tealu aju iviso ka tiniobi nalo nei, mia maka lele asaaro ka na abitirilar Yesu jibe na, ana na aberii kanio, aberinavo “!Naverloglogiano, koverbure kanamo naiagagoano nalo na ka auetuba kavuru kaso re tibe na!”

<sup>40</sup> Mia Yesu berdoṣe banlo, berinavo “!Ee, vede

ga. Ver nalo aviovio tibe na re, ðeli mia puruveru rera ga nei monoka nalo aviovio.”

*Yesu jegidu ka komeli lu nei Yerusalemo*

<sup>41</sup> Mia Yesu binimei vaataro ka rivokar burum̃ara komeli nei Yerusalemo, mia naio jirarag ba jouro eaio, tinien miiaio, ana jikar ka jogumirano jibirbil biorio.

<sup>42</sup> Mila jibe na ana naio mil ban memedu, berinavo “Kiniou nomijog bova toru kaso. Ver jau kovitilubar ga venia miyotuba ea kiamo vio banei nei! Atua jo mila kiamo m̃arabo novo tai ka kojev tum̃aro eaio, mia jau maka kovitilubario.

<sup>43</sup> Mia monoka nover ka jau ka mia bogo tai rimei easo napano mia kanamo uolu nalo ve miroano laka amei kašo. Mia aseliyiv easo atukoso, a mia ayuku bijii borotano rimei vio takurano, ve kialo m̃arabo ka mia amijikia avavin ea kanamo burum̃ara tagvoru nalo.

<sup>44</sup> Mia amei jouro, aue vatitigso. Mia auebinvin kenerimo nalo, a mia ala bulag nonovio kunuamo nalo, avar bulag kiamo burukis nonovio avatove mia riviniu. Vironiano na jibe na mia rimei easo bior ka napano jau maka kosidom kovitilubar ka banei be kanamo bogo memedu ka napano Atua maluvo ka rilarruso.”

<sup>45</sup> Naruei Yesu miel ba jouro ea komeli, mijaka ban ea Atua Soþi kunuano lu, ana mial nalo naña aju amim̃au bior veru ea vio na. Naruei naio mijil dedade ealo, berinavo

<sup>46</sup> “Atua ber ea kiano Iliano Lu, naio berinavo ‘Kunuaku Lu naio be yimo na volkouano,’ mia

kamiu kubiliglar yimo nene ruei, binimej jibe ka buluvae tai na tom na vinauano nalo kunualo.”

<sup>47</sup> Ana ka bogo na Yesu joŋa bava joomo ea Yimo Lu legiano nonovio, naio joŋa berloglog tomu nalo, mia tomu na tortoru ka kulo lu nalo naliko naverloglogiano na tuboiano nalo bija tomu nalo kialo tomu na tortoru maka lele asaro kano. Ajuŋa ajiravo kavuru m̄arabo ka amijikia ala titai ka rila Yesu monoka rim̄aro.

<sup>48</sup> Mia bede ga, abitulubar ka maka ajikia aleal m̄arabo tai, bior tomu nalo naŋa ajuŋa amije tilinielo ka kiano verloglogiano, tiniel jii kiano iliano nalo toru laka, ajidom naio julaka ga.

## 20

*Navurim̄araboiano na vio Israel ajidom averbure Yesu*

*Mataiu 21:23-27; Mak 11:27-33*

<sup>1</sup> Mia ka legiano dolu bereio, ana Yesu ban bere joomo ea Yimo Lu na Atua Kunuano yako Yerusalemo, naio joŋa berloglog tomu nalo a joŋa mioliolu ka Ioluano Vou na bo banlo. Ana tomu na tortoru na kulo lu nalo bija naverloglogiano na tuboiano nalo bija navurim̄araboiano dolu nalo abinimej eaio, abika denio aberinavo

<sup>2</sup> “?Jau kover von ka kumemi, ka naŋa jau kojom̄a komila jibe na ea vio nei ea kei siano? ?A kei ber kaso ka jau kala tibe na?”

<sup>3</sup> Ana Yesu berdoŋelo, berinavo “Mo, mia kiniou bunu nevika vikadeniano tai den kamiu beamu vo. Kiaku vikadeniano jibe nei, ber

4 ?Varueiano namã Jone jomã mila nua ban tomu nalo, naio be vite tai napano Atua berkanio ka m̃a naio rilaio, p̃eli na Jone ga naio jidom ka rilaio? Kamiu kuver von nina.”

5 Mia Yesu kiano vikadeniano nei mila amil toru banlo, ajumã aberinavo “?Mia kito rover tumãbe ka naio? !Kito rovitikario vatitig rivu! Ver kito roverinavo varueiano na Atua ber ka Jone, mia tete na naio monoka rivika bere den kito riverinavo bior vaio ana maka romonea Jone.

6 Mia bunu, ver kito rover Jone ga jidomii ka rilaio, mia tomu nalo tinielser kito, mia atuba kito, bior nalo aju amonea Jone jikili ruei ka napano naio be Atua kiano nailiano riano tai.”

7 Ana jidomiano na mila ana aberdope ban Yesu aberenio nalo maka ajikiaio ga.

8 Mia Yesu ber kalo, berinavo “Tibe na, mia kiniou bunu, maka nejikia never ka kamiu ka kei naruei naio ber ka kiniou ka nala imãuano nalo nei.”

*Jamerijiano na tomu na bova napano m̃a abitikar jiotilikrevi tai*

*Mataiu 21:33-46; Mak 12:1-12*

9 Ana Yesu ber jamerijiano tai ban tomu nalo na ka bogo na, berinavo “Toro na toru tai, bija kiano jiotilikrevi tai. Bogo tai naio jidom riel rivan ea buruvenuo dolu tai, napano jo vaatarobe laka, ana juvan kiano jiotilikrevi nei ban tomu dolu nalo ka mia amei aimãu eaio, ka mia avulu vanio.

10 Ana toro na toru nei naio ba jo-o, avona bitilubar ka be bogo na m̃arkrevi meruo naruei. Jibena miila kiano toro tai ka ban bereio ea



nalo napano ajua kiano jiotilikrevi nei, ka rivar puruveru na m̃arkrevi nei togio napano monoka avulu vanio. Ana toro nei bano, mia bogo na naio miyotuba kalo, nalo maka asidom avuluio, mia amue naio ga o-o bisi ana na amiila naio ban bereio juṃano ravavo ga jibe na.

<sup>11</sup> Ana toro na toru nei miila kiano toro dolu tai bano, mia abitivi naio bunu, amila lelan toru laka, ana amijil deven naio ban bereio juṃano yauo ga jibe na.

<sup>12</sup> Mo varolu nene, toro na toru nei miila kiano toro dolu bereio, mia naio bunu, amueio-o bar ja, ea naio toru laka, ana abukulario den jiosi.

<sup>13</sup> “Mo toro na toru na jiosi nei naio mial bajago na kirivova nei, mia naio maka bunu rijikia naruei, berinavo ‘!Aiou! ?Bo ka mia nala tuṃabe naruei? Peli vonganei, monoka neiila ga keneriku rivano. Naio be keneriku takurano ga, tinieku jii ñelea naio, mia ver naio rivan mia nalo monoka avitulubar avijuku rivu ka naio.’

<sup>14</sup> Naruei miila naio bano, mia bogo na tomu nalo amialio, nalo ajidomii kirivova kanio. Aberiio ealo, aberinavo ‘Naina be toro na toru kenerinio na. Toro na naruei, napano ver toro na toru na riva kovio, mia naio naruei rivar kiano borotano nene tibe kiano jajum̃ano ve kiano. Bo ka kito rouebin naio rim̃aro, kanio mia kito ga romijikia ravakar borotano nei rive kiado.’

<sup>15</sup> Naruei nalo ajumolu abokario, abukulario batove den jiosi nene, amuebinio.”

Ana Yesu berinavo “Tukunu nei naio bisi ea vio na, mia bo ka kami kuvisidomii vonio. Bogo

na toro na toru rijog tenei, mia naio rime i rila tumabe ka nalo nei?

<sup>16</sup> Neber ka kami u neber tomu kirivova nei, mia naio rime i ru elo, a ñarm ñaro ea bajago kouo tai, a mia naio rudu kiano jiosi nei toa tomu dolu na bo nalo jumalo.” Ana bogo na amijog Yesu naio ber jibe nei, amijog lubar ka iliano nei be ilivaniano tai, ber jibe ka kulo Ju maka asidom naio napano be Atua kenerinio, ana mia Atua rivuru tomu nalo na maka ave kulo Ju adu jelelo. Ana vite nei nalo maka asidom ajogio, naruei nalo amil jikili aberinavo “Vite na jau kojom ña koberio na, Atua maka lele rijamo ka mia riyotuba tibe na.”

<sup>17</sup> Mia Yesu bitikarlo, bika ber “Kami u maka kumisidom, ana bior vaio ana abivitaui a iliano lu nei napano naio ber jibe nei, berinavo

*‘Puruveru na, tomu nalo napano amimauka yimo aber naio bova, mia abuku ban ruei, mia vonganei, puruveru nene naio binime i be puruveru na kirinovo tai ea sudu na yimo, ka rudukar yimo sikili.’ Iouano 118:22*

<sup>18</sup> “Tomu nonovio na mia ava aserba ñe ea puruveru nei mia ajoru napano mia puruveru nene rila kokorov mokotenalo. Mia ver riva rivokar bogo na puruveru nei rijoru, toro kei napano puruveru mon kakario mia rila kitkitio rivova, naio riva kovio.”

<sup>19</sup> Ana naverloglogiano na tuboiano nalo bija tomu na tortoru na kulo lu nalo, abitilubar ka Yesu kiano jamerijiano nei jilogloglo memedu, naruei nalo tiniel jerio lie vo, ajumolu ajidom avokar naio rimemedu ea bogo nei garuei.

Ajidom toru ka ala titai kanio, mia amila dede ga, bior amial ka tomu nalo ajumña tiniel jii naio ga.

<sup>20</sup> Jibe na naruei ana bogu nono ga ajumña abitivitiio, a nalo tealo ajumña ajivanlo ga aba vaataro kanio, abar kokoalo ga amilalo jibe amonea naio bo, mia tena ajumña amilaio, ajumña abarkakar kiano iliano nonovio ga. Kialo jidomiano, ka ajidom aleal iliano na naio riverenio, ana amijikia ala veriiano van toro na toru na vio Romo nene Pailat, ka naio mijikia sian vironiano tai vanio tibe ka na ajidomio.

*Tena be Atua kanano a tena be Sisa kanano  
Mataiu 22:15-22; Mak 12:13-17*

<sup>21</sup> Ana nalo namña ajumña abar kokoalo ka napano abinimei vaataro ka Yesu, bogu tai ana abika vikadeniano tai denio, ajidom ajukubinio. Aberinavo “Naverloglogiano, kumemi nubitilubar ka kiamo iliano a kiamo verloglogiano be riano a memedu. A kumemi nubitilubar ka jau maka ketibure tomu nalo aveve dolu, mia komialo abe veverare ga konomña koberial Atua kiano mñarabo na memedu ka tomu nalo nonovio.

<sup>22</sup> Ana numisidom nuvika denso tibe nei ka: ?Kiado tuboiano naio ber jumñabe? ?Naio ber memedu ka kito kulo Ju nalo rovulu takis van parinio tubo na Romo na Sisa, ðeli na ber maka rimemedu?”

<sup>23</sup> Mia Yesu bitilubar ka ajidom ajukujuku naio, naruei naio ber kalo, berinavo

<sup>24</sup> “Kuvidu puruveru sesa nene tai rimei van kiniou. ?Kuvial von kei mirano na joaio? ?A sio nei ajiri joaio, be kei siano?”

Nalo aberinavo “Sisa mirano na, a siano na bunu.”

<sup>25</sup> Ana naio ber kalo, ber “Mo, tena be Sisa kanano, kamiu kuvidu van Sisa. A tena be Atua kanano, kamiu kuvidu van Atua.”

<sup>26</sup> Nalo nei ajidom toru ka avokar vatitig kija Yesu ea tomu nalo miralo ka kiano iliano tai, ana mia bogo namã amijog kiano verdoŕeiano nei, amiilo toru kanio, amial ka naio bokar tanealo, ana nalo aju buru ga, maka bunu ajikia aver bereio titai.

*Tomu na aňaro mia ameul bereio  
Mataiu 22:23-33; Mak 12:18-27*

<sup>27</sup> Mia iorou ka naina, Satusis nalo tealo abinimei ea Yesu, ka ajidom avika denio ka tivelinio na vite tai namã abiekar kouo eaio, aber tomu nalo na aňarmňaro, maka bunu ajikia ameul bereio ea bogo na maaro.

<sup>28</sup> Naruei nalo abika denio, aberinavo “Naverloglogiano, kumemi numisidom nuvikaso, ka juňabe ka iliano tai namã tormoruo Mosis re nua naio bivitauiaio be kiado. Naio berinavo, ver toro tai riňaro den koano, napano maka ve kenerilo tai vo, mia monoka nana lian ka naio rivuru taanou nene ve koano, ka mia rila ka tira nei mijikia rivar tete, ka mia rudu kuruano napano naio ņaro siano, ka mia siano rimeul to.

<sup>29</sup> Mo, ka bogo tai, be kurualo aluo. Motoru kalo buru tira tai be koano, mia ņaro den koano napano naljuo maka avar kenerilo tai vo.

<sup>30</sup> Ana maratoru naio kija buru tira nene, karina naio bunu ņaro denio,

<sup>31</sup> karina baratoru, naio bunu milαιο, bano-o bokar kurualo aluo nene, nalo abiniu amila jibe na ga, napano maka ve kenerilo tai leleio.

<sup>32</sup> Ana iorou ka koano nalo nao-o abiniu, tira nene bunu m̄aro.

<sup>33</sup> Mo jau kover von vite na. Ea bogo na maaro, ka bogo nañã ajuñã aberveriio vurua na aber mia tomu nalo atumormolu bereio, mia tira nei naio ve kei koano, bior naio joro ka kurualo aluo nei abiniu ruei?”

<sup>34</sup> Naruei na Yesu berdoḡelo berenio berinavo “Ea yetemeriba nei ga tomu nalo ajuñã ajorjoro,

<sup>35</sup> mia nalo napano Atua ber ka amijikia ameul bereio ea nañariano, ka ava jouro ea kiano vio, mia maka bunu ajikia alaio. Ka bogo na, maka bunu asorsoro kalo,

<sup>36</sup> mia maka bunu ajikia añarm̄aro, bior mia amei atavukia nailiano nalo. Mia Atua rivuru meul ealo bereio den nañariano, naruei amei ave kenerinio nalo riano.

<sup>37</sup> “Mia ka tivelinio ka na meul bereio na, Mosis bunu beriio nua ruei, naina jakii tukunu na buruiesi tai napano sebi joñã bovago eaio. Ea vio na romial ka Mosis naio joñã bio Atua Soḡi ber naio be Atua na Epraamo kanano, a Atua na Aisak kanano a Atua na Yakovo kanano.

<sup>38</sup> Ana bogo na Mosis naio ber iliano na, tom tolu nei añaro ea yetemeriba nei nua bogo be ruei, jibe na añaro ea yetemeriba nei, mia aju ameul ea Atua kiano vo. Atua naio maka ve Atua na tomu na añaro ga, mia naio jidom ka tomu nalo na aju bija naio nalo abe tomu na ameul. Ea Atua kiano vitiano, tomu nalo nañã añaro ruei ea yetemeriba nei, nalo ameul kia ga vo aju.”

<sup>39</sup> Ana naverloglogiano na tuboiano nalo, nalo ajumã amiagago ka Yesu kiano verdoþeiano ban Satusis nalo, ana amial ka naio be masou bo laka, ana aber “Naverloglogiano, kanamo verdoþeiano naio bo mia bo.”

<sup>40</sup> Aber jibe na bior Yesu kiano iliano nei mila Satusis nalo amerou ka avika vite tai den naio bereio.

*Yesu Naverikariano naio be tormoruo Parinio Tubo Teviti kiano Atua*

*Mataiu 22:41-46; Mak 12:35-37*

<sup>41</sup> Naruei Yesu mil ba lie banlo, bika vite denlo, berinavo “Bior vaio ana nalo ajumã aberloglog kamiu, aberinavo Naverikariano naio monoka riyotuba ea tormoruo Parinio Tubo Teviti nene kiano yati, napano nua naio be Parinio tubo beamu?”

<sup>42</sup> Kiniou nebika naina, bior beamu, Teviti naio bivitauia niosi na Iouano kanano, berinavo

*‘Atua Soþi naio ber ka kiaku Tubo, naio berinavo  
“Jau kototano ea vameruo na kanaku,*

<sup>43</sup> *jau koto rorea rivano-o,*

*mia kiniou nala kanamo uolu nalo amei tibe ka  
yebe tai namã kobijankon jaamo eaio.”’*

*Iouano 110:1*

<sup>44</sup> “Ea vio na romial ka napano Teviti naio jomã bio Naverikariano ka kiano Tubo mugaruei. ? Mo bior Teviti naio ber jibe na, mo jumãbe ana ajumã aberenio mia Naverikariano naio riyotuba ea Teviti, rive kiano yati tai ga?”

Mia ea bogo tai bereio, amiilo toru ka Yesu kiano iliano nalo.

*Yesu mil jikili ban navuriñaraboiano nalo na nalotuano*

*Mataiu 23:1-36; Mak 12:38-40; Luka 11:37-54*

<sup>45</sup> Ana tiniobi nalo aju amiagago ka kia ga vo, ana Yesu berial iliano tai, napano be kanano naiagagoano ga nalo kialo.

<sup>46</sup> Naio berinavo “Kamiu kuvitkar kamiu ka naverloglogiano na tuboiano nalo na namã abarvar kalo nãele ka nãalo burutili kulu-nãarauo nalo na, a verenio nalo amieliel ea vioruru nalo, ajidom ka tomu nalo monoka avatove kalo, avio vatitiglo averinavo ‘!Aiou, naverloglogiano novo, kavijo bo!’ A ea bogo na jokoluolu p̃eli joomo ea yimo na volkouano nalo bunu, nalo ajidom ka damãariga atutano ea vio na tomu na tortoru nalo kanalo ga. ?Kamiu kubitilubar ruei, a?

<sup>47</sup> Mia ajuãa aburu kialo volkouano nalo kiri p̃etep̃eteli laka, mia ajuãa amila sibi ga, bior ka bogo nene ga, nalo ajuãa amijukubin taanou nalo, amila bulaglo. Naruei bior kialo bajago nalo na, mia kialo vironiano sikili lie vo.”

## 21

*Taanou tai buku veru sesa juo ban Atua*

*Mak 12:41-44*

<sup>1</sup> Naruei bogo napano Yesu nalo ajua Yimo Lu na Atua Kunuano, ana amial ka napano tomu tealó abinimeí ka mia avuku kialo ijaiano ea basaro na Yimo Lu. Naruei Yesu bitio, ana naio mial ka nasanibaiano nalo abinimeí abuku kialo ijaiano novo nalo,

<sup>2</sup> ana na iorou kanio, naio mial bunu taanou tai, napano naio be talimãsa ga, mia naio binimeï buku kiri veru sesa juo ga.

<sup>3</sup> Naruei naio berii tira nei banlo, naio berinavo “?Kamïu kumial taanou na, napano naio buku kiri veru sesa juo na? Kiniou neber riano ban kamïu, ka naio jian loa jovulu nonovio ijiãano dolu nalo na nasanibaiano nalo na kanalo.

<sup>4</sup> Nalo be kialo burumãara veru nalo, mia amije bena ga togio, mia taanou na, veru telisu nei naio bokario ka rijekar kiano meouliano, naio jian nonovio ban Atua.”

*Yesu naio berial ka mia aue bulag Yimo Lu na Atua Kunuano*

<sup>5</sup> Karina iorou ka naina, tomu tealo ajuãa aberii Yimo Lu, aberinavo naio kirinovo tai mia, bija sano veru maraiu nene nalo, a tonovo nalo napano mãa tomu nalo abario kamãa miyovovua tanobuku nene. Ana Yesu mijog tukunu nalo na jibe nei, ana berinavo

<sup>6</sup> “?Kamïu kumitumãa kumial vite nalo na kuber bo? Neber ka kamïu mia iorou ka bogo tai na jo binimeï, mia ve re bunu puruveru tai totano vatitig ea jeleigio, bior mia tomu nalo tai amei aue bulag searia yimo na riviniu.”

*Jaleleano monoka mia rimeï*

<sup>7</sup> Mia bogo na nalo amijog ka Yesu ber jibe na, abika denio, aberinavo “?Ana Naverloglogiano, mia aue bulag Yimo Lu nene nagi, a mia kumemi nuvijikia nuvial kijokijo venia naruei naio verial ka vaataro ka vite nalo nene amalmaluvo?”

<sup>8</sup> Ana na naio ber kalo, berinavo “Bo ka kamïu kuvitkar vatitig kamïu rivu, ka mia ve re toro tai



rimei rila sibilili kamiu, bior mia tomu ve telabo napano mia adu siaku, mia nalo amei averinavo '!Kiniou nebe Naverikariano nei!', ĵeli averinavo '!Naina naruei, bogo nene naruei!' mia maka rivu ka kuvitakisorlo.

<sup>9</sup> Ana ver ka bogo na, mia kamiu kuvijog uetubaiano na mira, a jaleleano nalo aju vaataro, mia kumemebiju mēle re. Vite nalo na monoka amalmaluvo beamu, mia naina maka ve bogo na maaro nene navo."

<sup>10</sup> Ana naio ber bunu kalo, berinavo "A parinio tubo nalo, mia ala mira kanio parinio tubo dolu nalo, a venuo nalo atumolu ka venuo dolu nalo.

<sup>11</sup> Mia mīi ve toru, mia reraio ea yetemeriba nei mia ve burumāra vituiano a mieiano kouo nalo, a rivija naina mia ve vite na memebijuiano ave burumāra kijokijo nalo ea bulu niogovu yauo mave.

<sup>12</sup> Mia bogo na ve re vite nalo nei vo, mia tomu nalo ala kiki kamiu ve toru laka. Mia nalo amei avokakar kamiu sikili, avar niajebijo rivan kamiu, ana iorou kanio mia adu kamiu kuvitua juṁano navurimāraoboiano na yimo na volkouano nalo, ĵeli na avuku kamiu kuva kuvitua yimo na tetavokoiano, ĵeli ala kamiu kuvitumolu kuvitua mirano kialo parinio tubo nalo ĵeli na kialo navurimāraoboiano nalo. Vite va nalo na mia kuvarilo bior kubokar siaku jikili.

<sup>13</sup> Ka bogo na mia sikili laka rivan kamiu, mia rive kenemiu bogo na kuvijikia kuverial Ioluanu Vou na bo vanlo.

<sup>14</sup> "Mia vonganei, bogo na vite nalo nei maka vo, kamiu kuvisidom mēlea re ka mia kuver

venia ka bogo na,

<sup>15</sup> bior rimonloglog bogo nene ga, mia kiniou nesian iliano na masouano rivan kamiu. Mia bogo na kuver iliano nalo nei ka kenemi uolu nalo, mia tovulo, mia ajikia re ka atuþedoþe bereio kenemi iliano nene.

<sup>16</sup> “Ka bogo na, mia nalo na ga napano m̃a kumitu m̃a kubiolo ka teta þeli kuruemi þeli tu-mano þeli bilbilu, nalo na jibe na naruei napano mia amijikia avuru bulag kamiu kuvano, adu kamiu kuvitua tomu na tortoru nalo ju m̃alo, ka mia ala tanea kamiu rivano-o mia m̃a auebinvin kamiu tealo am̃arm̃aro.

<sup>17</sup> Mia tomu nalo tiniel ser kamiu laka, mia nalo asian liliu iliano rivan kamiu napano siaku joa kamiu.

<sup>18</sup> “Mia kiniou neber ka kamiu ka mia vijumiu tai riva kovio deio.

<sup>19</sup> Mia kamiu kuvitu sikili rivano-o kuvitovulu juluvati na bogokouo nene, ana ea m̃arabo na naruei mia kamiu kuvokar meuliano riano na kenemi.”

### *Burum̃ara mira ea vio Yerusalemo*

<sup>20</sup> Mia ea tivelinio na burum̃ara bogokouo nei mia rimei, Yesu ber kalo bereio, ber “Telikiti na ver kuvial taara na tomu na mira atu selivivko burum̃ara bulukomeli na vio Yerusalemo, mia kuvijikia ka bogo na burum̃ara sano labulagiano nene naio jo binimei vaataro.

<sup>21</sup> Mia bogo na kuvial vite nei, kamiu na kuvitua vio Yutea, bo ka kuvuro, kuva kuvitivan kamiu ea suku nalo, mia ver kamiu na kuvitu jouro Yerusalemo, bo ka kumolmoluo kuvuro

kilkil, ĩeli na kamiu na kuvitu mave nei, maka rivu ka kuvilavio ka kuvatove vonuo bereio.

<sup>22</sup> Nina bior ka bogo na, naio be buruńara legiano na lameraniano na Atua kiano siniabu, tavukia na vivitauiano re nua nalo aberkakario.

<sup>23</sup> Ka bogo na bunu, mia ve kirivova laka rivan tire nalo na be mńabolo, rivija bunu nalo nańa ajuńa amije yu ban kenerilo solbouo nalo. Ka bogo na, mia ve buruńara najogvaiano ea kiado venuo nei, a buruńara siniabu rimei ea kiado tomu nalo nene.

<sup>24</sup> Mia iobogu na mira rila vinvin ve telabo atibirbil, mia mńarimieni riorkar ve miroano juńalo, avurulo ava aimńau kurano ga ea taara dolu nalo. Mia kulo dolu nalo avie niegeniege kitkit lelan komeli lu na kito kulo Ju kiado Yerusalemo nei, mia ave tubo eaio rivano-o rivokar bogo na Atua jekar ka ve kialo bisi.”

### *Mia Kulorinio Kenerinio rimei bereio*

<sup>25</sup> Ana na Yesu berii legiano na maaro, naio berinavo “Ka bogo na, mia amijikia aial kijokijo ea mńerenio a ea siberio a ea mńarvitano nalo. Ea yetemeriba nei, mia taara na tomu nalo mia niukniuku rivielo ve toru laka, asidom bijobijon ve toru, mia bogo na aial tei tumolu ve toru to rivavauro, mia nalo ajikia re ka mia tuńabe kalo.

<sup>26</sup> Telikiti na nalo abitulubarbar ka venia napano mńa jo binimei ea yetemeriba nei, a napano vite na tortoru nalo na bul niogovu yauo amikulkulu janea vio, mia nalo amemebiju ve toru, meribobogo amńarmńariulu rivior meroano.

<sup>27</sup> Mia ala tibe na rivano-o, ana iorou kanio ana mia aial kiniou Kulorinio Kenerinio noyotuba ea melijo vija kanaku burum̃ara moroano a vija kanaku burum̃ara miamoiano.

<sup>28</sup> “Ana ea tivelinio na kamiu, ver bogo na kuvial vite nalo nei atikar kaña amalmaluvo tibe na, mia kamiu kumerou re. Mia niukniuku rivie re kamiu, mia kamiu kuvitumolu kuvar bulag pariparimiu kuvisirarag mave, bior vite nalo na nioti nene ber kenemiu toro na laruriano naio jo binimei, vaataro ka riyotuba.”

### *Kijokijo na burubilivo*

<sup>29</sup> Ana na Yesu ber jamerijiano tai banlo ea tivelinio na bogokouo na jo binimei keano vo, naio berinao “Kamiu kuvisidomii von burubilivo na, ðeli na buruiesi dolu nalo na jibe na.

<sup>30</sup> Telikiti na kumial jaati nalo abinimei amemeaio, a abinimei amelokloko, a sidiati nalo abarbovelo, ana na kamiu kumijikia ka be bogo na vio bitunu jo binimei vaataro.

<sup>31</sup> Jibe na bo ka na ver kamiu kuvial kijokijo nalo nei, ajuña amalmaluvo jibe na javukia naña kiniou naber ka kamiu ruei, mia kamiu kuvijikia ka navenatuboiano na Atua kanano naio jo binimei vaataro kean kamiu.

<sup>32</sup> Riano neber ka kamiu, mia vite nonovio na monoka ayotuba tibe na rivano-o, mia iorou kanio ana taara na tomu na ameul ea bogo na ava kovio ea yetemeriba nei.

<sup>33</sup> Mia vio yauo rivija yetemeriba nei nalo ve juo bunu ava kovio, mia kanaku iliano nalo maka ajikia ava kovio bogo tai.”

*Kamiu monoka kuvila vatitigio kenemiu meuliano nalo*

<sup>34</sup> Naruei Yesu midu iliano na banlo ka bogo na, iliderevijoiano banlo, naio berinavo “Mo ea tivelinio na kamiu, kamiu kuvitii vatitig kamiu. Maka rivu ka kenemiu meuliano tanea vio, ĩeli na kumunu mēlea mārjuṁelmēlu ĩeli na vite nalo na jibe na, a maka rivu ka kenemiu jidomiano to tulaka ea vite nalo na yetemeriba nei ga. Aver ĩeli, mia kuvitumña kuvila tibe na rivano-o mia kiviilo ka burumñara legiano na maaro riyotuba ka kamiu vaarakurano ga tavukia viobijio.

<sup>35</sup> Nao, mia tomu nalo tanea vio reraio ea yetemeriba nei, mia atu asidomialio re, atu avitilubarario re, mia legiano nei rivokarlo tibe ka na menu miilo ka buruniavo julubinio m̃aro garuei.

<sup>36</sup> Mia monoka kamiu kuvitu derevijo damñariga, monoka kuvitu kubolkouo ka kuvijikia kuvitu sikili ka kuvilarur kamiu ea vite nalo na mia ayotuba, rila ka mia kamiu kuvijikia kuva kuvitumolu kuvitu ea kiniou Kulorinio Kenerinio miraku.”

<sup>37</sup> Ana na Yesu joñia berlogloglo jibe na ea Yimo Lu ka legiano nalo, mia ka bogiano naio jo batavio den komeli, ba joa Suku na Buruolivi Nalo.

<sup>38</sup> Mia kavijova nalo, ana tomu nalo ajumolu soĩeli, aban bereio ea Yimo Lu ka ajog kiano iliano nalo.

## 22

*Navurim̃araboiano na kulo Israel nalo ajum̃a  
ajidom auebin Yesu keano vo*

*Mataiu 26:1-5,14-16; Mak 14:1-2,10-11; Jone  
11:45-53*

<sup>1</sup> Na karina, bogo binimei vaataro ka nam̃a yuka nonovio, amila kialo jokoluolu juo na tortoru, jibe ka jokoluolu na najenjeniano na beskit napano maka isi toaio, bija jokoluolu na nasidomialiano na ioruriano.

<sup>2</sup> Ana ka bogo na, tomu na tortoru na kulo lu nalo bija naverloglogiano na tuboiano nalo, ajum̃a amila vio ka auebin Yesu keano vo, mia maka ajikia aleal m̃arabo tai, bior amerou ka ver alaio, p̃eli mia tomu nalo ajikia ala titai kalo.

*Jutas jukunu bija tomu na tortoru, berkar ka  
mia tiveluku ka Yesu*

<sup>3</sup> Mia monloglog bogo na ga, siṃaro binimei ba joomo ea Jutas na vio Kariot kiano iviso, napano naio be na duelimo ba juo tai.

<sup>4</sup> Ana na maka vesiou, ana naio jumolu, bano ba miyotuba ka nalo napano tortoru ka kulo lu nalo bija tomu na tortoru na kialo menumia nalo, berial kiano jidomiano, ana na nalo aberii m̃arabo na vabe napano bo ka mia naio mijikia tiveluku ka Yesu selia rivanlo.

<sup>5</sup> Ana na Jutas kiano jidomiano milalo amijog bova toru laka, mia nalo amial bo ka aje veru tai rivan naio riviorio.

<sup>6</sup> Mia Jutas jaaro kanio, mia jikar ea bogo na, julaka ga naio jom̃a jiravo ka vulu kiano bogo ka ver bogo tai napano ver ve re bunu tomu nalo tai eaio, ana na mia mijikia tiveluku ka Yesu rivanlo.

*Yesu miila Pitere naio Jone ka ava ala vatitig sano sinaniano na maaro*

*Mataiu 26:17-25; Mak 14:12-21; Jone 13:21-30*

<sup>7</sup> Naruei abinimei monloglog legiano na beamu na jokoluolu na najenjeniano na beskit napano maka isi toaio, napano naio be bunu legiano napano monoka ala sida na nunu sesa nalo ka sidomialiano na ioruriano.

<sup>8</sup> Naruei Yesu ber ka Pitere bija Jone, berinavo “Neiila kamjuo ka kuva kuvila vatitig vite nalo na sado sinaniano na jokoluolu nene.”

<sup>9</sup> Ana na naljuo nei abika denio aberinavo “? Ana jau kojidom ka nuvila vatitigio to be?”

<sup>10</sup> Ana na Yesu berinavo “Kuve juo kuva kuvokar m̄aratavo na toru na vio Yerusalemo, mia bogo na ver kuva joomo von kiaga eaio, mia kuvial toro tai napano midu buruñara bauei tai na rimei rivetavo ka kamiu. Mia kuvitakisorio kuva a mia naio rivuru kamiu kuan ea yimo tai.

<sup>11</sup> Mia bogo na ver kuva joomo ea yimo nene, mia kuvil rivan toro nene kuverinavo ‘Kiado naverloglogiano naio bika berinavo, Kumemi valauo nalo, kenememi vajoomo naio be, ka nuvijikia nuvisen sinaniano na sidomkariano na ioruriano eaio?’

<sup>12</sup> Kuvil tibe na rivanio, naruei mia naio siloglog ka kamiu ka buruñara vajoomo tai mave, napano vite nonovio juaio ruei, ana na mo kuvila vatitig vite nonovio na sinaniano nei ea vio nene.”

<sup>13</sup> Mia Yesu ber jibe na ka naiagagoano juo nei bisi, ana na abano, mia amial ka vite nonovio

miyotuba jibe ka ga napano naio beriio kalo jukamu.

Jibe na naruei, ana na amila vatitig sinaniano na maaro na Yesu sano.

*Sinaniano na maaro*

*Mataiu 26:47-56; Mak 14:2-26; Jone 18:3-11*

<sup>14</sup> Karina Yesu nalo abinimei mave ea vio nene, ana bogo na sinaniano, Yesu ba jotano ea vio na sinaniano, mia atevi nalo abinimei ajutano naliko.

<sup>15</sup> Ana na Yesu mil banlo, naio berinavo “Bogo jiou ruei, kiniou najomña nojidomii sado sinaniano na sidomkariano na ioruriano nene. Ninei naruei saku sinaniano na maaro, napano kito ga rosinan vio takurano, ana iorou kanio ana mo nemijikia navan ea kanaku bogokouo.

<sup>16</sup> Kiniou neber ka kamiu ka joko nei nioti nene berii ioruriano. Mia kiniou nesen re bunu bereio, rivanvano-o rivokar bogo na kiaku ioruriano rimei ea yetemeriba nei, ea bogo napano mia Atua kiano navenatuboiano rimei.”

<sup>17</sup> Naruei naio midu baja tai, bolkouo ber siva ban Atua biorio, avona bisi ana ber kalo, berinavo “Kamiu kuviyon burevure tanea kamiu, kamiu ga kumunio.

<sup>18</sup> Nina bior jikar vonganei, mia kiniou nomunu re bunu m̄arjuml̄mel̄u rivano-o rivokar bogo na mia Atua kiano navenatuboiano naio rimei.”

<sup>19</sup> Naruei naio mije salo niajoko, naio bolkouo ber siva ban Atua kanio, avona bisi ana burekokorovio janealo, berenio “Ninei be mokotenaku, napano namijamo ka bior kamiu, mo mia



monoka kamiu bunu kuvitu kuvila tibe na, tibe ka kenemiu buruka ka kiniou.”

<sup>20</sup> Ana iorou kanio, bogo napano ajinan bisi, naio mila jibe na bereio javukia napano mila ka niajoko jukamu, naio midu baja namuniano tai, berenio “Baja nei naio be kijokijo na kiaku burukija napano mia riou ka kamiu, ka vitirilar Atua kiano virakariano vija kamiu.

<sup>21</sup> Mia be titai bova, toro na mia tiveluku ka kiniou, naio be kito tai ga napano rojinan vio takurano nei ruei.

<sup>22</sup> Mia kiniou Kulorinio Kenerinio monoka namaro tibe ka namā aberkario nua ruei, mia toro napano mia tiveluku ka kiniou, tiniek miia naio, mia rivova lie vo van naio!”

<sup>23</sup> Mia bogo napano amijogio, ana na nalo ajuṃa abivika denlo amilavon ka alealio na vabe kalo napano jo jidomii ka mia rila tibe na, mia maka avokario.

*?Kei kalo na mia naio tukamu kalo?*

*Mataiu 20:25-28; Mak 10:42-45*

<sup>24</sup> Ana ka bogo na, siniabu jumolu bure na-iagagoano nalo, ber mia kei kalo napano mia nalo asirarag kanio ka naio loalo lie, rive kialo navurimāraoiano.

<sup>25</sup> Mia Yesu mijogio ana na naio berenio berinavo “Kito romijikia ruei tomu na tortoru nalo na yetemeriba nei kialo bajago, Parinio tubo nalo abe tubo ka kialo tomu nalo, a navurimāraoiano nalo, tomu nalo monoka atovonlo, adu sio na loa laka rivanlo, abiolo aberinavo toro na bitikarlo.

<sup>26</sup> Mia kamiu kiaku naiagagoano nalo, monoka kuvila re kamiu tibe ka tomu na tortoru nalo nei. Naio be kenemiu napano ãeli mia averinavo naio be toro na toru, mia monoka naio rimei tibe ka kenemiu toro na kiritelisu tai, tibe kanio napano naio moluo iorou. Kamiu tai napano ver sidom ka naio rimei rive kenemiu navuriñaraboiano, naio monoka rimei tibe ka toro na mia ña riijaja kamiu.

<sup>27</sup> “Ka bogo na sinaniano, toro tai jotano ana toro dolu bar sano sinaniano binimei banio. Naruei naljuo nei, na vabe nene napano amial jibe ka naio toru lie loa tinene? Kamiu kumijikia, mia kiniou maka netibe ka naio, mia kiniou nebinimei ea yetemeriba nei jibe ka naio naña mila iñauano, miija kulo dolu nalo, bijuku bo kalo.”

*Yesu berkar ijaiano banlo*

<sup>28</sup> Ana na Yesu ber kalo, berinavo “Kamiu na, nemial kumitibe ka kiaku ikurukariano na bo nalo ea bogokouo nalo naña nabokario, binimei bokar banei.

<sup>29</sup> Mia jibe kanio napano teta naio bitirilar kiniou ka neve tubo ea kiano vio, mia kiniou bunu neber ka kamiu neber nevitiri bulag kamiu kumei kuve ñartubo nalo ea kiaku vio nalo nei.

<sup>30</sup> Tibe na, ana na mia kamiu naruei kuvijikia kuvitutano rivija kiniou bereio, mia kito resinan vio takurano jouro ea kanaku navenatuboiano, ana mia kamiu kuvitutano ea vio na mave loa laka bunu ka mia kuve tubo ka bajulukuti duelimo ba juo na Israel nalo.”

---

**22:26** Mat 23:11; Mak 9:35      **22:26** Mat 20:25-27; Mak 10:42-44

**22:27** Jon 13:12-15      **22:30** Mat 19:28

*Yesu berial ka mia Pitere rivarbonbonua naio  
Mataiu 26:31-35; Mak 14:27-31; Jone 13:36-38*

<sup>31</sup> Naruei Yesu mil ban Saimon Pitere, berinavo “O Saimon, jau monoka kovitikar vatitigso rivu. Siñaro tinien jer kamiu ruei, naio jidom toru ka rila bulag kamiu, mia Atua mijamo ka ruei ka mia naio mijikia tokol von kamiu ve telisu, a mijikia tiburelar nana naio bo a nana naio bova.

<sup>32</sup> Mia kiniou nobolkouo kaso ruei, a noju jikili dañariga ea kanaku volkouano ka ver jau kotuñabe, ana na mia kanamo viekouoiano rijoru nonovio denso re. Ana verenio jau komei kovu bereio, komei bereio, mia jau monoka komei kove toro tai na mia kala kuruamo nalo atumolu atu sikili lie dañariga.”

<sup>33</sup> Mia Pitere naio berdoñe Yesu berinavo “Tubo, verenio avukuso kavan ea yimo na lakoiano, mia kiniou neviedu rivijaso rivu ga. Peli mia ala kikiso mia kañaro kario, mia kiniou najaaro ga ka kito ve juo.”

<sup>34</sup> Ana na Yesu berkanio, berinavo “Pitere, kiniou neber telerinio ka jau, ka bogiano nei ga, mia tormano tokoko-reko re vo, mia jau kavarbonbonua kiniou ve varolu, koverinavo jau maka kejikia kiniou leleio.”

*Bogo kouo naio miyotuba ruei*

<sup>35</sup> Ana na Yesu bika denlo, naio berinavo “Kamiu kuvisidomii von nanua, ka bogo naña nemiila kamiu kubano ña kubioliolu janea vio nalo. Kiniou neber ka kamiu ka mia kuvar re kenemiu saba nalo tealó vija kamiu, jibe ka siveu

na veru, ĥeli na basaro, ĥeli na kulubue dolu na jaamiu, ĥeli na vite nalo na jibe na. ?Mia ĵumabe, kamiu kumial ka ĵumemiu bulati ka vite nalo tai?"

Naruei nalo aberdoĥe aberinavo "Tubo, maka ĵumememi ve bulati ka titai."

<sup>36</sup> Ana na Yesu ber kalo berinavo "Nao, naina naruei. Mia vonganei, kito roĵua bogo dolu tenia nei. Vonganei, verenio nana be kiano siveu na veru, ĥeli na kiano basaro, mia monoka naio rivar vija naio rivano. Toro na ver maka kiano iobogu na mira tai, bo ka naio riĵiliĵililar kanio mĵano saluvoiano, mia naio rivar veru nene rivan rivulu ka kiano iobogu na mira tai.

<sup>37</sup> Kiniou neber naio nei ka kamiu, bior vivi-tauiانو lu nalo re nua namĵa aberii kiniou, aĵumĵa amalmaluvo abe riano naruei, ban bokar iliano namĵa Aisea naio berenio, napano berinavo

*'Amila ka naio jibe ka naio bunu be toro va tai na lakokoroviano na tuboiano.'* **Ais 53:12**

<sup>38</sup> Mia naiagagoano nalo aĵumĵa aĵidomii ga iliano na iobogu na mira nei, naruei nalo aberinavo "Tubo, keĵiio, ninei be kiado iobogu na mira juo nei."

Mia Yesu mial ka napano maka ajikia dulu kiano iliano nei, ana na naio berinavo "E abe, roberii vite na bare naruei."

*Yesu ba bolkouo Ketsemani mave ea Suku na Buruolivi Nalo*

*Mataiu 26:36-46; Mak 14:32-42*

<sup>39</sup> Mia Yesu nalo aĵuvan vio nei mave, mia jibe ka napano naio joĵma milaio, naio miel bavın

bokar Suku na Buruolivi Nalo, naio naliko kiano naiagagoano nalo.

<sup>40</sup> Mia bogo napano aba aboru ea vio napano Yesu jo ban eaio, amijilimebi eaio, naruei naio ber kalo berinavo “Kamiu monoka kubolkouo tulaka ka mia jukuano nalo ala re kamiu kuvijoru.”

<sup>41</sup> Naio ber jibe na kalo, bisi ana na naio juvanlo, ba lie denlo telisu ga, naruei minie ka sudu jaano ana bolkouo ban Atua.

<sup>42</sup> Naio bolkouo jibe nei, berenio “Aiou Teta o-o, ver jau komijikia kala mia rivu ga, jau kodular baja na jogvaiano nei kanaku, ka nomunu re. Mia jau kala re kanaku sidomiano, mia kala ga kiamo.”

<sup>43</sup> Ana ka bogo nei Yesu mijog temiano toru ea naio, naruei amial nailiano tai jaluvo ea vio mave binimei yetano, binimei miija Yesu ka naio ve ĩirinio sikili bereio.

<sup>44</sup> Mia Yesu jo mijog bova toru, jiniomo de sano titi, mia bolkouo jikili lie vo banbano-o mia sano minonoano nalo aju abadigdig jibe ka burukija bavatove ea borotano.

<sup>45</sup> Mia bogo na naio bolkouo bisi, ana na jumolu bereio, ban bereio ea naiagagoano nalo, mia mial tinieiano na monmeliano muelo ruei, aju amonmelio ga.

<sup>46</sup> Naruei mila bovonlo, berinavo “Ai, juñabe ana na kamiu kumitu kumonmelio? Bo kanio kuvitumolu kuvila tibe ka na kiniou naber ka kamiu ruei. Monoka kubolkouo ka mia juku-jukuano nalo amei re ka ala kuvijoru.”

*Jutas nalo abinimei abokar Yesu*

*Mataiu 26:47-56; Mak 14:43-50; Jone 18:3-11*

47 Mia bogo na Yesu jomña mil banlo kia ga vo, amial burumñara taara na tomu nalo amiyoyotuba kalo, amial ka napano toro tai jukamu kalo abinimei vaataro, nina naio napano beamu, naio be nalo tai, be Jutas. Ana na Jutas binimei vaataro ka Yesu, bokario ana miomiom babibiniono.

48 Mia Yesu mil jukamu banio, berinavo “Jutas, ka vai na koniom kukulnioku jibe na mia naio bo ga, mia ka vaio ana jau kojidom kovulvulu ka kiniou Kulorinio Kenerinio ea mñarabo na jibe na?”

49 Mia bogo na nalo na Yesu kiano napano ajikil aju vaataro ka naio abitulubar venia nei Jutas nalo ajidom alaio, abika den Yesu, aberinavo “? Tubo, jumñabe, mia kito retelo ka kiado iobogu na mira?”

50 Mia Yesu naio maka riverdoḡelo vo mia naiagagoano nalo tai naio jumolu, burular kiano iobogu na mira, miven ea nalo tai, napano naio be toro tai na parinio toro lu kanano, mia naio jetitire ea ga meriniano ana jelar tiliniene vameruo.

51 Mia Yesu mil banio, berinavo “!Ee, to to to! Kito rola re bunu tibe na kalo.” Ana na naio mijiou jokol jeleig burutiliniene toro nei, mia mila vatitigio bereio bo.

52 Naruei naio bitikar tomu na tortoru na kulo lu nalo naliko tomu na tortoru na menumia nalo na Atua kiano yimo, bija navurimaraboiano na kulo Ju nalo kialo, napano abinimei ka naio, naio mil banlo berinavo “?Jumñabe ana na kubar iobogu bija kenemiu nia nalo jibe na? ?Peli kumitu kumisidom kuberiamña kiniou nebe toro

na ĩirinio jikili ka m̃a bina ĩeli nam̃a muemue toro?

<sup>53</sup> Nanua, legiano telabo ga, kiniou nojo bija kamiu ea Yimo Lu banbano-o, mia bior vaio ana maka kumei vaataro ka kiniou ka kuvokar kiniou ea bogo nalo na ruei? Mia nemial jibe ka kamiu kube tomu na melijokouo, napano kubinimei bija moroano dolu nalo na melijokouo, a vonganei be kenemiu aura memedu.”

Mo abinimei abokar Yesu, aburio bano.

*Pitere naio barbonbonua Yesu*

*Mataiu 26:57-58,69-75; Mak 14:53-54,66-72; Jone 18:12-18,25-27*

<sup>54</sup> Bogu na abokar Yesu, aburio ban bereio naliko, abano aba jouro ea burusio na parinio toro lu kanano. Mia Pitere bunu jom̃a jakisosor vavanlo ga ka bogu nei, naio maka riva vaataro keanlo.

<sup>55</sup> Mia bogu na abinimei jouro ea burusio nei, tealo aba ajovokar sebi bilvili ka atuřalo eaio, mia Pitere bunu ba jotano naliko.

<sup>56</sup> Naruei aju ana jegliano na sebi mereralii Pitere mirano, ana na niatira tai nam̃a miřau napano jo bijalo, naio bitilubario, ana berenio “! Ai, kamiu kuvialio! Kema na, naio bunu be nalo tai nam̃a bogu nonovio ajakisosor tete na.”

<sup>57</sup> Mia Pitere barbonbonua, berinavo “! Ee maka! Kuvivinieku!, kiniou neber vatitig kaso, maka nejikia kema na!”

<sup>58</sup> Karina maka vesiou ga, nalo tai mial Pitere, bitilubario, ber “Ai, jau bunu, kobe nalo tai na.”

Mia Pitere berdoŝe berinavo “Ai kema, abe makanio.”

<sup>59</sup> Mo aju jibe na bano-o, na aura takurano barlaka bereio, dolu binimej berial bereio, ber ĉelea banlo, berinavo “Kiniou neber vatitig ka kamiu, kema na, naio naliko tete re Kalele na jukamu ruei. !Kuvial, naio bunu be toro Kalele memedu ga ruei!”

<sup>60</sup> Mia Pitere berdoŝe mila sibi bereio berinavo “Kema, abe kiniou maka nejikia tena ĉa kojoma koberenio na koig.”

Ana monloglog bogo naĉa Pitere joma ber iliano nei kia ga vo, tu jokokoreko.

<sup>61</sup> Mia bogo na tu jokokoreko, ana Tubo ĉilig parinio binimej, bitikar Pitere, naio bitii kilkil eaio. Naruei Pitere jidomial bereio Tubo kiano iliano nanua berial kanio nua ruei, napano berenio berinavo “Riano kiniou neber kaso, ka bogiano na legiano nene ga, bogo na tu tokokoreko re vo, mia jau kavarbonbonua kiniou ve varolu ruei, kover jau maka kejikia kiniou.”

<sup>62</sup> Mia Pitere naio mijog kirivova toru laka, naio batavio, jegi-i o-o mia jegi.

*Parinio toru lu kiano tomu nalo amila kikii Yesu*

*Mataiu 26:67-68; Mak 14:53-65; Jone 18:19-24*

<sup>63</sup> Mo nalo napano ajuma abokakar Yesu ea bogo na, amila kikii naio, a amil vulevulei eaio, ajukukikio,

<sup>64</sup> ban amiorko mirano ka mia naio rijikia re rial vite, mia bogo naĉa ajuma amijuba biliviligio, amiyotel eaio abika denio aberinavo “Ei, aber jau kobe naverialiano tai, bo ga, jau



ka bagbag von ka kenia na jomã mijubaso vonga na.”

<sup>65</sup> Mia amila jibe na ka banbano-o, amil niege-niege toru laka.

*Aburu Yesu ban ea komeli na toru na tomu na tortoru na kulo Ju nalo kialo*

<sup>66</sup> Aju jibe na banbano-o mñerenio bavin garuei, ana na navurimãara-boiano na kulo Ju nalo, jibe ka kulo lu na tortoru nalo bija naverloglogiano na tuboiano nalo, abinimei vio takurano ea kialo komeli na toru neibano. Bogo na abinimei vio takurano bisi, ana na aburu Yesu ba jikili ju jukamu ea miralo.

<sup>67</sup> Naruei amil banio abika denio aberinavo “Verenio jau kobe Naverikariano be riano, namãa kulo Ju nalo ajumã amial aber mia monoka rimei, mo, numisidom ka jau koverial ka kumemi vonganei.”

Mia Yesu berdoþe banlo, berinavo “Kiniou nemijikia neverial ka kamiu, mia ver neverenio, mia þeli kuvisaaro re ka kumonmoneaio.

<sup>68</sup> Mia kiniou nejidom ka nevika vite tai den kamiu bunu, mia ver nevikanio, þeli mia kamiu kuverdoþe kulu re ga na.

<sup>69</sup> Mia be titai nana kiniou najaaro ka nejidom never ka kamiu naio ber jibe nei, ber ‘Jikar vonganei, mia tibe ka ga napano Iliano Lu berenio ruei, napano berinavo mia Kulorinio Kenerinio riva totano mave tivelinio vameruo ka Atua na moroano toru.’”

<sup>70</sup> Mia bogo na amijog iliano nei, abika denio, aberinavo “!Tomnei, venia na jibe na! ?Jau kojo kober jau naruei kobe Atua kenerinio memedu?”

Ana na Yesu berdoĝelo bere “Verver ku-visidom kuver tibe na, mia tibe na ga naruei.”

<sup>71</sup> Mia bogo na amial Yesu joĝna mijamo ka ber naio be Atua kenerinio, tiniel kirimimi, aber jibe nei aber “Kema na mil jibe na, kito robitilubar vatitig ka buruĝara tokoriano joa naio ruei. Mia kito resiravo re bunu toro dolu ka rila veriiano na naio bereio, naio kiano iliano ga jibure naio bereio ruei.”

## 23

*Aburu Yesu ba ban ea Pailat, napano be parinio toro na vio Romo naĝa jo bitikar Israel*

*Mataiu 27:1-2,11-14; Mak 15:1-5; Jone 18:28-38*

<sup>1</sup> Ana na nalo na komeli na kulo Ju nalo amijog Yesu kiano iliano bisi, ana ajumormolu, amio burovuronlo ba vio takurano ea buruĝara taara tai, naruei aburu Yesu ba jumolu jukamu ea Pailat mirano ea kiano vio na tibureiano.

<sup>2</sup> Naruei amila veriiano ban Pailat, aber bulavulag vite telabo banio, tivelinio ka Yesu. Nalo aberenio aberinavo “Kema na, joĝna mila bulag tomu na kenememi venuo kialo jidomiano, naio joĝna berburelo ka avulu re bunu takis van kiamo boru parinio tubo Sisa na Romo, a naio joĝna miaia naio toru ber naio bar sio na Naverikariano, jibe ka naio be kenememi parinio tubo na toru. Vite nalo na naruei, kumemi numialio ka mirememi memedu.”

<sup>3</sup> Telikiti na Pailat mijog kialo veriiano nei, naruei naio bika den Yesu, berinavo “Mo, jau kija kover kanamo vonio. ?Be riano ka jau kobe parinio tubo ka kulo Ju nalo ĝeli na makanio?”

Ana Yesu berdoře, berinavo “Naina naruei jau kojomãa koberver kiana.”

<sup>4</sup> Mia bogo na Pailat mijog venia napano Yesu berenio, naio maka rial ka naio mila tena bova tai, ana ber ka tomu nalo kialo tomu na tortoru nalo, berinavo “Kema na, ea kanaku vitiiano, naio memedu ga, naio maka rila kor leleio tuboiano tai.”

<sup>5</sup> Mia nalo maka asidom ka ajog Pailat kiano iliano, mia amila jibe ka tena sořeli ga tai, ajikili lie vo kanio, aberinavo “Peli ga, tete na naio kirivova ga. Naio jomãa julu vilivilig kenememi tomu nalo kialo jidomiano, a jomãa mioliolu banlo ea vio nonovio, jikar jo Kalele, binimei midu nonovio Yutea, binimei bokar bulukomeli na toru nei ruei.”

<sup>6</sup> Mia bogo namãa Pailat mijog aber Yesu jikar kiano imãauano yako Kalele, ana bikanio berinavo naio be tete re Kalele memedu řeli na makanio.

<sup>7</sup> Pailat bikanio jibe na bior naio maka mãa to riadu ka tanobuku na Kalele, mia parinio tubo dolu nei Erot naio be toro na toru ka vio na, mila na ka bogo napano aberial ka Pailat ka Yesu naio be toro Kalele, naio berial ber mia monoka avuru naio riva van parinio tubo Erot ka naio rivitii veve vonio bior kiano tanobuku memedu. Ana ka bogo na, Erot bunu binimei miadu ka Yerusalemo ruei, tenene na aburu Yesu ba ban naio.

<sup>8</sup> Mia bogo na parinio tubo Erot bitilubar ka Yesu nene, naio jaaro, bior naio mijog sano tukunu mugaruei, mila na kirisiou ruei naio jidom rialio kija, mila na naio jidom ka vonganei

naruei na, ĩeli mia rial Yesu rila kiano kijokijo tai rivanio.

<sup>9</sup> Naruei naio milavon ka tukunu vija Yesu, bivivika vite telabo denio, mia Yesu maka riverĥe titai vanio, naio juburu ga jibe na ju, maka lele ril.

<sup>10</sup> Naruei ka bogo na, kulo lu na tortoru nalo bija naverloglogiano na tuboiano, nalo bunu ajikilaju vaataro ajuĥa amil kilkil ajaaĥi ka ĥa aber bulavulag vite nalo na tivelinio ka Yesu.

<sup>11</sup> Mia vite nalo nei naruei mila Erot naliko kiano tomu na mira nalo maka asaaro ka Yesu, ana amila kikio naio, amiyotel searia naio. Karina, amiya tubo nalo ĥalo kulumarauo nalo tai eaio, ka amijikia avital eaio, naruei amila banbano-o, karina Erot miila naio ban bere ea Pailat bitii bereio.

<sup>12</sup> Beamu ka vite nalo na, tomu juo na Pailat naljuo Erot abe bilbilu va kalo, mia monloglog bogo na amirĥau biju jibe nei bereio ka tibu-reiano na Yesu, burulo abinimei abe bilbilu bo bereio.

*Yesu jumolu jukamu bereio ea Pailat mirano*

*Mataiu 27:15-26; Mak 15:6-15; Jone 18:39-19:16*

<sup>13</sup> Mia abinimei bere ea Pailat kiano vio, ana naio bio tomu na tortoru na kulo lu nalo bija tubo nalo bija tomu nalo ka amei aialio.

<sup>14</sup> Telikiti na nalo abinimei joomo, naio mil banlo, berinavo "Nanua na, kami na kuburu toro na binimei jikili jua miraku, kuberial ka naio joĥa bilivilig niegeniege ĥelea kenemiu tomu nalo kialo jidomiano nalo. Mia kiniou nebika vite nalo denio, jibe ka naĥa kumijogio,

mia maka neial ka naio mila vite nalo naña kumituña kuberenio na, nemial jibe ka naio memedu ga.

<sup>15</sup> Naruei nemiila naio ba mial Erot ka rivitiio, mia Erot maka rileal titaio, naruei miila binimeí ea kiniou bereio. Mo, kiaku tibureiano jibe nei, ber naio maka rila titai napano naio monoka riñaro riviorio.

<sup>16</sup> Mia kiniou nala tibe na ga van naio: mia nala avitiv naio, karina mo atuvan naio rivano, rijikia rivan bereio ea kiano vio.”

<sup>17</sup> Ana na bior bogo na be bogo na kulo Ju nalo kialo jokoluolu na toru, ajumña ajidom aber jibe ka naña Pailat jonña milala vururu, mia monoka tuvanlar Ju nalo tai naña amiadikakario jua kiano tetavokoiano.

<sup>18-19</sup> Ana ka bogo na, nalo tai naña Pailat miadikario, naio kema nei Barabas, napano nanua beamu naio buru tomu dolu nalo amila baravo tai yako Yerusalemo, napano amuebinvin kulo Romo kialo tomu na mira nalo añarmño, mila na Pailat miadikario joa kiano tetavokoiano.

Mia bogo na amial ka Pailat jidom ka tuvan Yesu rivan bereio tibe na ga, amiaga mñerere banio, aberinavo “Ei, maka, makanio! Kumemi numisidom kesilar Barabas rimeí bereio rivan kumemi. Mia toro na, kumemi nuber kaso ka numisidom jau kodular kiano meuliano ga.”

<sup>20</sup> Mia Pailat maka sidom, naio jidom ka Yesu taluvo ga tibe na bereio, naruei naio milavon ka ril, ber banlo.

<sup>21</sup> Mia abuku deven ga kiano iliano, abiovio kanio, aberinavo “!Kotukukar, kotukukar toa ñakolkolo!”

<sup>22</sup> Naruei Pailat mil banlo varolu nene, berinavo “?Ana kar venia, naio mila venia napano kirivova? Kiniou nemial vite nonovio ruei, maka neleal vovaiano tai toa nai na memedu ka mia naio riņaro riviorio. Mia kiniou nala avitivio ga, karina mia notuvan naio riva vonuo bereio.”

<sup>23</sup> Mia nalo ajuve Pailat kiano iliano bereio, amiaga jouo lie jibe na bereio banio, ajaamĭ lie, aber monoka Yesu rivan ea mĭakolkolo, mia nalo amila jibe na banbano-o na ajovulu naio.

<sup>24</sup> Karina Pailat mila kiano tibureiano, berial ber naio mijamo ka kialo vikaniano.

<sup>25</sup> Naio napano mĭa joa nalakoiano bior bajago namĭa mila mira a bajago namĭa mue toro, Pailat mijamo ka naio batavio bereio ba banlo jibe ka namĭa abikanio. Mia tivelinio ka Yesu, naio berial ka mia kiano tomu na mira nalo ala van naio tibe ka ga na kulo Ju nalo ajidomio.

*Aburu Yesu ban ea vio napano Kalvari*

*Mataiu 27:32-44; Mak 15:21-32; Jone 19:17-27*

<sup>26</sup> Ana na aburu Yesu, amiel ban ea vio na atukukakar naio toa mĭakolkolo. Bogo na ajumĭa abano, amial toro na ba yeturu karina jo miel binimei vonuo bereio, nina be Saimon na nanua beamu be toro na vio Saireni, naruei ajutua naio ka rudu Yesu kiano mĭakolkolo, mia amidu joa burusovonano, miel jakisor Yesu bano.

<sup>27</sup> Amiel jibe na bano, a ka bogo na vio bujo ka kulo dolu nalo bunu ajumĭa ajakisor Yesu, na nalo telabo be tire nalo, napano ajumĭa amiel bija burumĭara tegiano bija burumĭara tinieiano.

<sup>28</sup> Mia Yesu jomĭa miagago ka kialo iliano na jogvaiano nei, karina naio barĭilig

parinio, jiraragidilo, mil banlo, berinavo “Tire re Yerusalemo nalo-o, kuvitig re bunu kiniou tibe na. Ver kuvisidom kuvitig, mia kuvitig kamiu ga, a kenerimiu nalo bunu.

<sup>29</sup> Kiniou neber jibe na ka kamiu, bior bogo na jikili tai mia rimei, ana na mia nalo na mia atua naio mia aver tibe nei averinavo ‘!Ver tire nalo ve re kenerilo ga! Mia rivu lie vo ver avar re tete ka mia m̃a rimunu yu ealo, bior bogo nei mia sikili laka van kito rivija kanado solbouo nalo.’

<sup>30</sup> “Ana mia bogo na rimei rivova laka vanlo, rivan rivan mia atumolu ateg van burusuku nalo vija suku nalo, aver ‘Aiou, kuvitibirbilko kumemi, kuvituba kitkit kumemi, kuvitivinko kumemi.’

<sup>31</sup> Kamiu monoka kuvitigar rivu, bior vonganei buruiesi memesai kia ga vo ajuṃa amila kilkil ea kiniou ruei, mia iorou ka bogo na buruiesi rimei rijel bisi, mia amijikia ala rivova laka lie vo van kamiu.”

### *Ajukukar Yesu ea m̃akolkolo*

<sup>32</sup> Ana na ka bogo nei, ajuṃa aburukakar tomu juo naṃa amila kokorovio tuboiano, naruei aburulo naliko Yesu, ka auebinvinlo vijaio.

<sup>33</sup> Naruei amiel banbano-o, abokar kanano vio, vio tai naṃa abio ka Bordada na Kulorinio. Ana amidu Yesu ajuku kakario joa m̃akolkolo, abitiri lario jumolu ju iviso, mia ajuku kakario tomu na bova juo neibano, abitiri bulaglo tinene jua Yesu juṃano meruo, a tinene jua juṃano mali.

<sup>34</sup> Jibe na naruei ana na Yesu joṃa jaklele ea m̃akolkolo, naruei naio mil ban Atua, berinavo

“Aiou Teta, jau koviekokoa nalo nei. Nalo maka avitilubar vatitig vite nei ña ajumña amilaio nei.”

Ana na iorou kanio, ana tomu na mira nalo aju jibe na ajumña amila jibe ka namña amiere mñabujo, ka aleal ka kei kalo na mia rivar Yesu mñano kulumñarauo tai, a kei rivar tai.

### *Amiyotel va ea Yesu*

<sup>35</sup> Mia kulo dolu nalo ajikil aju ga koalabo, aju ga ña abitivitiio, mia kialo natukamuano nalo ajumña amil bova ka Yesu, ajumña amiyotel va eaio, aberenio “Kumialio kema na! Tomu nalo ajumña aber naio milarur tomu dolu nalo miroano ruei, mia vonganei junñabe naruei? Aber naio be Atua kiano Naverikariano, ñeli na naio be toro novo tai napano Atua miilaio binime. Aver tibe na ñeli bo ka rilurur kija naio bereio!”

<sup>36</sup> Mia na mira nalo ajumña amil niegeniege naio bunu, abinime amiyuku mñarjunñelmñelu na mije ban naio ka rimunuio,

<sup>37</sup> aberinavo “!A verenio jau kobe parinio tubo ka kulo Ju riano, javukia namña aju aberenio, bo ka jau kalarurso vonganei.”

<sup>38</sup> Mia ka bogo na abivitaui tiniemaiano tai, ajuku jo mave ea mñakolkolo mave ka Yesu parinio, na naio berinavo “Kulo Ju kialo Parinio Tubo.”

### *Tomu juo namña amila kokorov tuboiano amil ban Yesu*

<sup>39</sup> Ana na ka bogo nei, naljuo napano ajaklele ea mñakolkolo bija Yesu amil banio na. Tinene mil kirivova banio, javukia nalo dolu nalo, naio



berinavo “?Mia jau kobe Naverikariano, þeli na makanio? Bo jau kala soþeli, kalarur kito!”

<sup>40</sup> Mia tinene mil banio berbureio, ber “Kale-  
liki, vonganei be kiado bogo na maariano naruei,  
mia jau maka kotovon Atua vo. Kito tolu nei  
tibreiano na amije ban kito be takurano ga,

<sup>41</sup> mia tivelinio ka kito juo, memedu ga ka  
torokoriano naña romilaio, mia tivelinio ka  
naio, naio maka rila titai leleio.”

<sup>42</sup> Ana na mil ban Yesu, bika denio, berinavo  
“Yesu, bogo na ver komei kove barago, komei  
bereio, aiou kovijuku rivu, jau tiniemo ribobgia  
re kiniou.”

<sup>43</sup> Ana na Yesu berdoþe banio, berinavo “Kin-  
iou neberkar banso, neber ea legiano na banei  
ga, mia jau koto vija kiniou ea kiado vio vuiano.”

### *Yesu m̃aro*

*Mataiu 27:45-56; Mak 15:33-41; Jone 19:28-30*

<sup>44</sup> Mia vonganei, rime rivokar leri, ana tikar  
ea bogo na m̃erenio maka bunu merera, mila  
na melijokouo jovuko reraio vio nonovio garuei,  
naio jo jibe na bano-o bokar m̃erenio tolu niogo-  
ravo.

<sup>45</sup> Ana iorou kanio, ana jagidago napano aje-  
lanio jo joomo ea Atua Kunuano Lu, naña joko  
vio lu na be lu laka, naio buruþe mielibievi niati  
juo.

<sup>46</sup> Mia ea bogo na, Yesu miaga maariano, ber  
“Teta, kiniou nomidu niunuku joa juñamo.” Mia  
naio miaga jibe na bisi, ana buruñaria kanano  
jegi naruei, naio m̃aro.

<sup>47</sup> Ana bogo na toro na toru na mira naio mial vite nei, miolua Atua siano, berinavo “!Riano ga na, kema na naio be toro tai na memedu ga!”

<sup>48</sup> Mia tiniobi na toru napano abinimei vio takurano ea vio nei, nalo bunu amial vite nalo nei napano ña amila ka Yesu, tiniel miia naio toru laka na. Avona bisi, ana na abanvan bereio, amiel bija burumãara jogvaiano, abano bere ea kialo vonuo nalo.

<sup>49</sup> Mia taara dolu na tomu nalo ajua vio nei ka bogo nene bunu, ajikili aju koalabo kija ga, ajumã abitivitii vite nalo. Nina be Yesu kiano bilbilu nalo, naliko tire nalo nanua abinimei ea vio Kalele, ajumã ajakilili Yesu banbano-o bokar vio nei, mia nalo bunu amial Yesu kiano ñariano.

*Yoseve jivin Yesu*

*Mataiu 27:57-61; Mak 15:42-47; Jone 19:38-42*

<sup>50</sup> Naruei toro tai na komeli na kulo Ju nalo kialo na Arimatea, mia siano be Yoseve. Naio be toro na toru tai na komeli na toru na vio Yerusalemo, be toro na memedu tai napano kiano bajago kirinovo laka.

<sup>51</sup> Naio tai napano jidom toru ka Atua kiano Navenatuboiano rimei, mia beamu ka napano aber ka mia ala vaio ka Yesu, naio takurano kiano jidomiano maka tibe na, naio milavon ka riverburelo ka ala re rivova kanio.

<sup>52</sup> Mia bogo na mijogial ka aber Yesu ñaro ruei, naio ba jikil jukamu ea Pailat mirano, naio bika denio ka ver mijikia rudu Yesu mokotenano.

<sup>53</sup> Ana na Pailat mijamo ka banio, naruei naio ba midular Yesu mokotenano ea m̃akolkolo, naio mijuvuluko ka kulum̃arauo, ana midu ba midu vatitig joa buluvae vou tai napano aje vonga, napano maka adu toro tai rimoneaio vo.

<sup>54</sup> Naruei legiano na Yesu kiano m̃ariano, naio be Vraire, jibe ka bogo na amiomon vite rorea Legiano Lu. Mia vonganei m̃erenio jo mialolo batove, vaataro ka Legiano Lu tikario, nina monloglog bogo na m̃erenio javin.

<sup>55</sup> Naruei tire nalo nanua m̃a ajakisor Yesu, jikar Kalele binimei boru ea kiano m̃akolkolo, mia vonganei bogo na amidu mokotenano binimei, ajakisorio bereio. Ajakisor binimei boru ea pakeltavo naruei, amial vio na amidu mokotenano jo mon joomo ea buluvae.

<sup>56</sup> Nalo amialio avona bisi, ana aban bere vonuo ka ala vatitig sano bonotanunu vija pomat. Nalo aboru vonuo ruei, avona bisi ana Legiano Lu jikar naruei, mila na maka bunu ve bogo tai ka avan bereio ka ayovovua Yesu niabene. Mila na nalo aju ga vonuo jibe na, jibe ka nam̃a tuboiano berenio ber monoka nalo ala ea Legiano Lu.

## 24

*Buluvae kurano ga jo*

*Mataiu 28:1-10; Mak 16:1-8; Jone 20:1-10*

<sup>1</sup> Legiano Lu barlaka ban kario, ana na viomijeni kanio, naio be legiano na be moti na sude dolu. Mia viomijeni mermeravo kia ga vo, ana na tire nalo nei tealo abar bonotanunu bija pomat nalo na amim̃auka batitiglo ruei, amiel

aban bereio ea buluvae ka ayovovua vatitig Yesu niabeno.

<sup>2</sup> Naruei bogo na abinimei aboru ea vio nene, amial ka burum̃ara puruveru na ajubonko kar ka buluvae, ajubon lario ruei,

<sup>3</sup> ana na nalo aba joomo, mia amiilo ka napano Yesu mokotenano bakovio tai ruei.

<sup>4</sup> Mia ajikili aju ajidomii dede toru laka-o, mia amiilo ka vaarakurano ga tom juo ajikili aju bijalo. Tom juo nei, m̃alo kulum̃arauo miuvu mia miuvu batitigio bo.

<sup>5</sup> Mila na tire nalo nei amerou ka avitikarlo, naruei aminie ka sudu jaalo, ajak banini tano kamu kalo. Ana naljuo amil banlo, aberinavo “Oi, tire nalo, kamiu maka kuvijikia kuvial toro na meul ea vio na m̃ariano.

<sup>6</sup> Naio maka toa vio na, Atua bitirilar naio ruei. Kamiu kuvisidomii von bereio, venia naio berial ka kamiu ka bogo na naio jo kamliko nua yako Kalele, maka kumei nei vo.

<sup>7</sup> Naio ber jibe nei berinavo, jibe ka naio be Kulorinio Kenerinio, mia monoka ajamo ka naio rivan ea tomu na bova jum̃alo, ka mia atukukakar naio toa m̃akolkolo, mia ka bogoti ve tolu nene, mia naio tumolu rimeul bereio. Naina naruei be iliano nanua m̃a naio berenio ka kamiu ruei.”

<sup>8</sup> Mia tire nalo amijog ninei, mila na tiniel maio ka bereio Yesu kiano verikariano, nanua naio ber batitigio bo banlo berinavo mia naio mijikia rimeul bereio.

<sup>9</sup> Tiniel maio ka bereio, ana na ajuvan vio nei, aban bere amial atevi duelimo ba tai bija nalo dolu nalo. Mia vite nalo naña amial ea buluvae, aberiio meravo vatitig bo banlo,

<sup>10-11</sup> mia nalo nei maka amoneaio, amial jibe ka tire nalo nei ajunã ajukunu vovu ga.

Mia tire nalo na amial vite nalo nei, sialo ajibe nei, Mere re Maktala, Joana, Mere na Yemesi kenieno, bija tire nalo dolu bereio.

### *Pitere jikiti ba bitii veve buluvae*

<sup>12</sup> Mia Pitere, naio takurano jidom rialeal ka tenei naio be riano ðeli na makanio, naruei naio jumolu, jikiti bano-o jidom rial vonio vajoomo na buluvae nene. Naio binimej boru ea vio nei, monkorkor ba joomo, mia mial Yesu ñano kulumãarauo nalo aju keano ga, mia mokotenano ba kovio tai ruei. Ana na naio batavio bereio miel ba vonuo, naio jo jidomii toru laka ber vite nei naio junãbe nei, ðeli na nioti nene venia.

### *Naiagagoano juo amiel abatove Emeas abiviuo Yesu*

<sup>13</sup> Ana iorou ka ninei bereio, ka legiano nene ga, tom juo kalo ajuvan vio Yerusalemo ka avan ea komeli na telisu tai, siano Emeas. Marabo na ban ea vio na maka ve tebievi laka, naio jibe ka sadu duelimo titai,

<sup>14</sup> ana bogo naña amiel abano, ajukunu toru ka vite nalo na abarlaka ruei.

<sup>15</sup> Ajukunu abano-o, ana na Yesu miel binimej iorou kalo, jo miel nalikolo abano.

<sup>16</sup> Amial naio jomã miel bijalo, amialio jibe ka valauo tai ga, bior miralo maka ajikia avitilubar naio.

17 Ana na Yesu bika denlo, berinavo “?Kube juo kumituña kumiel jibe na, kumitukunu ka venia?” Mia bogo na bika jibe na, amebi ajikili aju ga jibe na, miralo bova kanio.

18 Naruei nalo tinene, siano Kleopas, berdoře ban Yesu, berinavo “Tomu nalo telabo na vio reraio ajumña amiadu ka Yerusalemo ka bogo na, mia ĩeli jau takurano maka kojog burumñara vite nalo na amalmaluvo vonganei yako, a?”

19 Ana Yesu bika ber “?Ana vite venia nalo namña jau kojomña koberenio na?”

Nalo aberdoře, aberinavo “Tenei be tivelinio na tete re Nasarete nei, Yesu. Naio binimej, be naverialiano tai, naio miñauka kijokijo telabo ea burumñara moroano na kiano, mioliolu berloglog tomu nalo bo laka, mila ajidom naio toru laka, ba bokar bunu ka namña Atua Soři berial ber naio jaaro toru laka ka naio.

20 Mia karina, nanua viomijeni niovo ga, kulo lu na tortoru bija kiado natukamuano nalo, tiniel jer naio, aburu naio jel ea burumñara komeli nalo banbano-o na ajibure naio aber monoka mia riñaro, ana aban ajukakar naio joa mñakolkolo ana mñaro.

21 Nanua beamu, kenememi jidomiano joa naio ka mia naio naruei mia rilarur kito kulo Israel, ka mia naio rivuru bulag kito den kulo Romo nalo kialo moroano, mia vonganei vite nonovio ba bova bereio ruei. Naio buro den kumemi banei be kiano bogoti tolu nei naruei.

22 “Mia be vite tai bereio miła kumemi nu-miilo mñele kanio, mila numituña numisidom bijovijonio ka kia nei vo. Banei ga napano tu tokokoreko ve vaarakurano kia ga vo, kenememi

tire nalo tealo ajevijo aban bereio ea buluvae ea vio na amidu Yesu mokotenano mon eaio, aban ka ayovovuaio vatitig rivu.

<sup>23</sup> Mia bogo na aboru ea vio nene, amial ka mokotenano maka bunu toa vio na jo mon eaio, naruei ajikiti abinimei bere ea kumemi, mia maka nina ga, mia aberialio ka amial bunu nailiano naljuo, napano aberial aberinavo Yesu meul bereio ruei.

<sup>24</sup> Ana kumemi tealo ajidom aialio vatitig, naruei aban ea buluvae, amialio javukia napano tire nalo nei aberenio, maka lele aial naio.”

<sup>25</sup> Naina naruei be iliano napano tom juo neibano aberiio ka Yesu, bogo na ajikili ajua ñarabo. Naruei naio bunu mil ber kalo, berinavo “Tomnei, kamiu kube bulubau nalo ga. Naverialiano nalo aberial batitig bo vite nalo na kirisiou ruei, mia jumñabe maka kumonmoneaio vo?

<sup>26</sup> Peli na kamiu kumijikia ruei, napano mia Atua rivitirilar kiano Naverikariano naio ve toro na toru ea yetemeriba nei. Mia kamiu maka kuvitilubar ka Iliano Lu nalo aju aber mia ala Naverikariano rojog rivova, ala bulag naio beamu, karina mia Atua mijikia vitirilar naio, rivokar kiano burumñara mermerano.”

<sup>27</sup> Naruei Yesu jo jukunu banlo jibe na naruei, berlogloglo ba lie vo. Naio jikar ea Mosis kiano niosi nalo, binimei bokar Naverialiano nalo kialo niosi nalo, naio joña ber bisivisii meravo banlo jumñabe napano iliano moruo nei joña jiloglog naio ga, ñeli na ajumña aberii damñariga naio.

<sup>28</sup> Naruei abe tolu amiel aban bereio, mia maka vesiou ana abinimei vaataro ka komeli na tom

juo nei aban kalo. Mia nalo amial jibe ka Yesu miel ka riel rijaka,

<sup>29</sup> mia ajikili kanio ka naio to vijalo beamu vo. Amil banio, aberinavo “Koig vonganei, ñerenio jo mialolo batove keano, vaataro ka vio rimelijo naruei. Jau komei koto kija vija kumemi beamu, romon ea vio nei ga vo.”

Ana na Yesu ba jo naliko ea kialo vio.

<sup>30</sup> Aju bano na monloglog bogo na sinaniano, mo nalo abinimei ajutano vio takurano ea vio na sinaniano. Naruei be bogo na abolkouo ka sinaniano, mia Yesu ga naio jumolu midu salo niajoko, naio bolkouo ban Atua ber siva kanio, naio burekokorovio bar janealo.

<sup>31</sup> Mia bogo na naio mila jibe na, memedu ka bogo na naruei ana miralo jibe ka betavo, abitulubar ka naina jo naliko na, be Yesu nene na. Ana aju amial naio, mia bogo bulati ga, mia naio jaluvo ba kovio denlo bereio.

<sup>32</sup> Naruei abe juo ajumã aberveriio, aberinavo “Ajerei, robe juo garuei maka rovitilubario, mia naio be kiado Tubo namãariga neibano. Mia riano ga, bior bogo namã roju rojukunu bija naio rojakii mãarabo robinimei, napano naio jomã ber bisivisii Iliano Lu nalo ban kito, kiano iliano nalo ajese laka, ajibe ka sebi jo bovago joomo ea kiado iviso.”

<sup>33</sup> Mia bogo na amijikia ka amial Yesu mirano ruei, maka bunu amonmelio, mia ajumolu soŕeli, amiel ea burumãara miamo aban bereio Yerusalemo ka averialio ka nalo dolu nalo.

Mia nalo aba amaluvo ka duelimo ba tai napano aju abior vio takurano kia ga vo naliko



dolu nalo,

<sup>34</sup> mia naljuo maka ail vanlo vo, mia nalo aberial kanalo jukamu aberinavo “!Ai, tom juo, abe bogu na ga kubano, titai miyotuba ea vio nei! Iliano napano tire nalo aber beamu, naio be riano ga. Kiado Tubo naio jumolu den namariano rui, Pitere nei mialio ka mirano memedu.”

<sup>35</sup> Ana na naljuo nei bunu ajusolio kialo iliano, nalo aberii jumabe ka Yesu miyotuba ka naljuo ea marabo, a ka napano maka avitilubar naio, banbano-o bokar ga bogu napano jan ka joko janealo.

*Yesu maluvo kean kiano naiagagoano nalo*

*Mataiu 28:16-20; Mak 16:14-18; Jone 20:19-23;*

*Imauano 1:6-8*

<sup>36</sup> Mia bogu nama naljuo nei ajuma ajukunu banlo ka vite nalo nei kia ga vo, amiilo va ka napano Yesu jikili ju iviso kalo garuei, naio ber kalo berinavo “Tumaro rito vija kamiu.”

<sup>37</sup> Yesu binimei ealo jibe na, mila na ajidomii aberinavo naio be simaro tai, mila na amerou toru laka.

<sup>38</sup> Mia Yesu bitilubar ka amerou kano, ana naio bika denlo berinavo “!Ai, ka venia kamiu kuvisidomii melea jibe na? Kenemiu iviso veve juo re bunu!

<sup>39</sup> Kuvial vonio jumaku vija jaaku, jeleig venia nalo nei jualo! Kam kuvialio, ninei be kiniou ga nei! Kumei kuvitokol veve niabeku torogio nalo nei, bior vite na jibe ka simaro maka ve burui, a maka ve niamoiou tibe ka mokotenaku nei.”

<sup>40</sup> Ana naio jomã mil banlo jibe na, naio jiloglog jumãno bija jaano kalo ka ajikia avitii vevelo.

<sup>41</sup> Ana ka bogo na, naiagagoano nalo, kialo jidomiano jomã miñau toru jibe na, napano ajaaro toru ka amial aberii Yesu, mia ajidom deio kia ga bunu. Ana Yesu mil bereio, bika denlo berinavo “Ei kamiu kuburosebi ruei?”

<sup>42</sup> Mia nalo amijege niado menoko ju ruei, ana na amidu niatai ban Yesu,

<sup>43</sup> mia naio midu denlo, naruei kamu ka miralo naio jenio.

*Yesu mil maariano ban kiano naiagagoano nalo*

<sup>44</sup> Karina na, Yesu mil banlo, berinavo “Bogo na nanua ña nojo kitoliko nua, kiniou nojomã neberii iliano miroano ea yati na nonovio na Navivitauiano Lu nalo ban kamiu ruei. Kiniou nobar iliano nalo na ea niosi na Mosis kiano, ea naverialiano nalo kialo niosi nalo, a ea niosi na Iouano lu nalo, naruei kiniou neberial ka iliano nalo na naruei, aberii kiniou ga, mia amei ave riano rivesiou re ga na. Tenene na kiniou neber jibe na ka kamiu, mia vonganei naruei kumial vite nonovio nalo na abinimei be riano ruei ea miremiu nalo.”

<sup>45</sup> Naruei Yesu jomã berlogloglo ba lie vo, mila kialo jidomiano nalo ba toru laka bereio joomo ea Vivitauiano Lu nalo nei, naruei vite nalo nonovio binimei meravo bo kalo.

<sup>46</sup> Naio ber kalo berinavo “Nina naruei, iliano nalo nei aberii jibe na naruei, ka Naverikariano, mia añele naio rijalele rivano-o mia rimãro, mia sano bogoti tolu nene, mia naio tumolu den namãariano rimeul bereio.

<sup>47</sup> Ana iorou kanio, ea siano ga, mia kiano tomu nalo mia atikar to yako Yerusalemo, mia avan ea yetemeriba vodolu, avan aioliolu van taara nonovio na tomu nalo, averial vanlo ka monoka aviliglo ka mia amijikia ajev viekokoano ka kialo vovaiano nalo.

<sup>48</sup> “Naruei kamiu napano mña kumial vite nonovio nalo na ka miremiu, kamiu nene naruei kuva kuverialio van tomu dolu nalo ka vite nalo nene be riano.

<sup>49</sup> Imñauano nei, naio be imñauano tai na kirisikili laka, mia kiniou nodu moroano tai toa kamiu ka mia rijai kamiu kuvituvulio. Moroano nei, Teta kiano verikariano naio jo, ka mia naio riila lario sel mave tiniabene rimei rivujo loa ea kamiu, tenene na kiniou nejidom never ka kamiu, ka kamiu kuviel dedade re den komeli nei vo, mia monoka kuvitu rorea ea vio nei beamu vo-oa, ka kuvokario.”

*Atua buru Yesu ban bere mave ea tiniabene  
Mak 16:19-20; Imñauano 1:9-11*

<sup>50</sup> Bogo na ka mia Yesu jidom ka tuvanlo, jukamu kalo abatove ea komeli sesa na Betani. Abinimei abokar vio nene, ajumña jibe na, banbano-o na Yesu jumolu jian jumñano loalo, milivu kalo.

<sup>51</sup> Naio joña mioa vatitiglo banbano-o, jo jikar juvanlo bavin mave tiniabene bereio.

<sup>52</sup> Naruei naiagagoano nalo amial kialo Tubo naio buro denlo bereio, ana na nalo aminie ka sudu jaalo abatove amilotu ka naio, karina aban bere Yerusalemo, napano ajaaro mia ajaaro.

<sup>53</sup> Mia ajua vio na banbano-o ana dañariga ea bogo nalo na volkouano nalo ajumña aban ea Atua Kunuano Lu amiaiaio naio.

Naina naruei be Lilianiano Vou na Yesu Kristo napano kiniou Luka nebivitauia, maaro ea vio na.

**Verikariano Vou Na Baki**  
**The New Testament in the Baki language of Epi,**  
**Vanuatu**  
**Le Nouveau Testament en Baki langue de l'île d'Épi**  
**au Vanuatu — Niutestamen long Baki lanwis, blong**  
**Epi Aelan, Vanuatu**

copyright © 2016 Wycliffe Bible Translators, Inc.

Language: Baki

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

---

PDF generated using Haiola and XeLaTeX on 18 Apr 2025 from source files dated 31 Aug 2023

f1528695-aae7-544e-aadd-9084a3830ae4